

**NATIONAL ASSEMBLY OF
SEYCHELLES**

Wednesday 12th April, 2023

The Assembly met at 9.01am

National Anthem

Moment of Reflection

Mr Speaker in the Chair

MR SPEAKER

Bonzour Manm Onorab. Bonzour nou bann zofisyé Lasanble e nou piblik ki pe swiv nou ozordi. Byenveni pou nou travay ozordi, nou pou lo nou *Order Paper* nou annan *Bill*.

Avan nou al lo *Bill* mon pou donn - wi Onorab Gill, mon pou donn Onorab Gill laparol pou fer en leksplikasyon ki konsern li. Onorab?

HON CHURCHILL GILL

Mersi Mr Speaker pou donn mwan laparol. Bonzour tou Manm e tou dimoun a lekout.

Mr Speaker parey nou Konstitisyon i dir i fer kler ki Gouvernman i annan 3 brans, Legzekitiv, Lezislativ ek Zidisyer. E latet Legzekitiv i ganny elekte par piblik Seselwa ki fer li *legitimate*.

Lo sa menm Konstitisyon i fer ki nou lenstitisyon isi, 26 Manm ki reprezant sak distrik i

bezwen ganny elekte. E mon konversasyon i vin dan sa laliny kot nou'n vwar i annan en vizit ki'n pran plas, par Prezidan Larepiblik Dimans Baie Ste Anne Praslin.

E dimoun Baie Ste Anne i demann mwan, "Be oli ou?" Prezidan pe vizit nou distrik, akoz nou'n elekte ou pou ou fer pouse nou bann azanda. E mon pa'n ganny kontakte pou sa vizit, mon oule zis met lo rikord akoz dapre Konstitisyon sa 3 brans Gouvernman i sipoze travay ansanm.

E eski sa i en larout ki nou pe pran *henceforth*? Mersi.

MR SPEAKER

Mersi.

(Off-Mic)

MR SPEAKER

En moman Onorab. Mon ava adres, mon ava adres *statement* Onorab Gill premye.

Note, note ki mon pa'n pran sa koman en *matter of privilege*, akoz mon pa war okenn privez dan nou bann regilasyon ki donn *MNA* en lasirans ki i ganny envite lo en vizit Prezidan.

Me selman mon siport lapel Onorab Gill ki Legzekitiv ek Lasanble i travay ansanm pou deservi zot distrik, e anvi ki

in annan vizit kot Prezidan in enplik *MNA*, mon siport sa lapel. Se tou mon krwar i senp e mon krwar sa lapel i a kapab ganny byen ekoute. Onorab Woodcock?

HON WAVEL WOODCOCK

Non Mr Speaker mon bezwen *raise en point of order*, en *matter* e en *clarification* asi.

Mr Speaker mon a dir ou en keksoz, Onorab Doyace Porice ti lev sa *issue* personelman avek Prezidan. Li ki'n fer demars pou rod bann *sponsor* pou rod sa bann lekipman pou lopital.

MR SPEAKER

Be sa ...

(Interruption)

MR SPEAKER

Hold on!

(Interruption)

HON WAVEL WOODCOCK

Si Onorab Gill ti annan en konsern i ti ava rod son lekipman li menm, Mr Speaker!

(Interruption)

MR SPEAKER

Silvouple, sa ki ou pe dir-sa ki ou pe dir napa naryen pou fer avek sa ki nou'n pran.

Sa ki ou pe dir i kapab en leksplikasyon si oule, me i pa afekte-i pa afekte sa parol ki mon donn Onorab Gill. Alor mon pa war ou *point of order* - mon pa war ou *point of order* valid. Mersi.

Nou a kontinyen avek *Bill*, mon a demann Madanm Raporter apel Vis-Prezidan. Bann Manm silvouple, nou pe mal komanse dan sa zafer kri atraver lasal. Silvouple annou gard en pe lord dan Lasanble! Mersi. Tou le de kote. Mersi.

(murmurings off-mic)

MR SPEAKER

Onorab ou'n tann mwan, silvouple? Mersi.

Bonzour e byenveni Vis-Prezidan Ahmed Afif e bann zofisyé ki pe akonpanyy ou, nou annan Mr Patrick Payet Sekreter Deta dan Minister Finans, Plan Nasyonal e Komers. Mrs Sheila Mohideen *Chief Secretary Public Service Bureau* e Mrs Julia Jean *Legal Draftsperson AG's Office*.

Mon krwar mon'n ganny sa korek, mersi. Nou pou pran *Bill, Public Service Salary (Amendment) Bill* pou *Second Reading*. Me i neser ki nou fer

Mosyon pou *waive 7 days notice*. Onorab Arissol ou pou pran sa Mosyon?

HON SANDY ARISSOL

Mersi Mr Speaker. Bonzour Mr Speaker. Bonzour VP avek ou delegasyon, bonzour tou dimoun ki a lekout. Bonzour tou mon bann koleg Onorab.

Mr Speaker parey nou *Standing Order* i fer provizyon anba *Order 97(1)* mon oule *move* - byensir pou ganny ou permisyon dabor - pou nou sispann *Order 69(1)* pou permet ki *Bill Public Service Salary (Amendment) Bill, 2023* i ganny lir en Dezyenm Fwa, malgre ki sa peryod 7 zour pa ankor ekspire depi ki in ganny lir pou Premye Fwa. Mersi bokou Mr Speaker.

MR SPEAKER

Mersi, mon a ganny segonnman pou sa Mosyon, onorab Esparon.

HON REGINA ESPARON

Mersi Mr Speaker. Bonzour tou dimoun a lekout. Mr Speaker, Mosyon i ganny segonde. Mersi.

MR SPEAKER

Mersi. Mon apel bann Manm pou vot lo Mosyon. Manm ki an faver lev lanmen silvouple? Manm ki kont?

Lo Mosyon pou *waive 7 days notice* pou pran *Second Reading Public Service Salary (Amendment) Bill, 2022*, 21 Manm in vot pour, 0 kont e 8 abstansyon.

Donk, Mosyon in aprouve e nou a prosede avek sa *Bill* e on a demann Mosyon pou *Second Reading*? Onorab Arissol?

HON SANDY ARISSOL

Mersi Mr Speaker. Mr Speaker anba *Order 69(2)* mon *move* ki *Bill Public Service Salary (Amendment) Bill, 2023* i ganny lir en Dezyenm Fwa. Mersi.

MR SPEAKER

Mersi. Mon a ganny segonnman? Onorab Esparon?

HON REGINA ESPARON

Mersi Mr Speaker. Mosyon i ganny segonde pou *the Public Service Salary (Amendment) Bill*, ganny lir en Dezyenm fwa. Mersi.

MR SPEAKER

Mersi. Avek sa mon a demann Vis-Prezidan pou fer son prezantasyon lo *Bill*. Vis-Prezidan ou annan laparol.

THE VICE-PRESIDENT AHMED AFIF

Mersi bokou Mr Speaker. Bonzour Mr Speaker. Bonzour tou bann Manm Lasanble e tou dimoun a lekout.

Mr Speaker dan son ladres Bidze 2023 devan sa Lasanble, Minis responsab pou Finans ti anonse ki Gouvernman pou travay lo en nouvo Polisi e striktir saler pou servis piblik.

E i ti donn langazman ki Gouvernman pou entrodwir e enplimant sa nouvo Striktir e Polisi an Avril 2023. Mr Speaker mon annan plezir pou deklar e ozordi dir ki sa Polisi e Striktir in fini ganny aprouve par Prezidan e Konsey Minis, e pou pran lefe le 1 Avril 2023.

Alor saler tou bann fonksyonner ou zofisye ki travay dan Servis Piblik komansman lafen Avril, pou ganny ogmante annakor avek sa nouvo Polisi e Striktir.

Lenplimantasyon nouvo striktir lo saler dan Sekter Piblik:

Mr Speaker parey in ganny anonse avek bann travayer Sekter Piblik, sa nouvo Polisi pou restriktir saler dan Sekter Piblik par azout serten *allowance* ki serten travayer i resevwar dan zot saler debaz e ogmant tou saler debaz enkli sa bann *allowance* ki'n ganny azoute dan saler par 10pousan.

An se moman anba *Public Service Orders* e bann *Scheme of Service* dan serten kategori travayer, plizyer zofisye dan Sekter Piblik i resevwar *allowance* an adisyon avek zot saler.

Anba sa Polisi sa bann *allowance* swivan pou ganny azoute dan saler debaz;

5poursan
supplementation allowance, marketable skills allowance, graduate allowance, PSE performance allowance.

Sa ki fer ki saler debaz en travayer i pou ogmante, e avek sa logmantasyon pou annan en logmantasyon 10poursan lo sa nouvo sonm total dan saler. I enportan dir ki an ka ki si apre ki tou *allowance* en travayer i ganny azoute, sa logmantasyon 10poursan i mwens ki R1000 mil saler, sa travayer pou ganny ogmante par R1000 mil.

Savedir R1000mil i minimonm par lakel pou annan en logmantasyon. Baze lo sa nouvo striktir e Polisi, i neser pou met an plas en nouvo latab pou kalkil sa ler travayer dan Sekter Piblik e saler a sak fwa ki zot resevwar en promosyon.

I enportan note ki dapre sa Polisi ki pe al ganny enplimante, bann *band* e bann *steps* serten zofisye pou kapab sanze, pou reflekte sa

logmantasyon ki zot pou resevwar dan zot saler.

Alor en zofisye ki par egzant i lo *band 10, step* limerò 4 ozordi dapre son let ki'n ganny apwente oubyen promote, oubyen son *Scheme of Service* i kapab avek sa logmantasyon lo en *band e step* ki diferan.

Sa revizyon i pou aplik pou tou travayer dan Sekter Piblik a leksepsyon bann *constitutional Appointees*. E bann zofisye ki Lalwa ki prevwar ki zot saler i fer referans avek *Public Service Salary Table Act*.

An vi sa desizyon Gouvernman pou enplimant saler dan Sekter Piblik atraver en Polisi dan plas Lezislasyon, *Public Service Salary Act* pou nepli aplik pou Sekter Piblik zeneralman.

Alor bi sa Prozedlwa se pou *revoke* sa Lalwa an relasyon avek travayer Sekter Piblik zeneralman. Mr Speaker i enportan fer resorti ki legzersis revizyon saler, bann *constitutional appointees* e bann zofisye ki zot Lalwa i refer avek *Public Service Salary Table* i ankor pe ganny fer.

Alor vi, ki sa latab saler dan *Public Service Salary Table* i ganny refer, e aplike dan plizyer Lezislasyon - par egzant

Presidential Emolument Act, Vice-Presidential Emolument Act, Constitutional Appointees Emoluments Act, Judiciary Act, National Assembly Members Emoluments Act, e Ministerial Emoluments Act, sa latab pou kontinyen aplik pou sa bann *post* anba sa bann Lalwa.

Sa i sa lalis dan *Schedule 2 Public Service Salary Table*. An vi ki saler bann Anbasader ti ganny enkli dan *Constitutional Appointees Emoluments Act* an 2016, e Lalwa *Public Service Salary Table* ti ganny fer an 2013, sa Prozedlwa pe propoz enkli *post* Anbasader dan sa *schedule*.

Sa latab pou osi aplik pou saler lezot *post* ki Lalwa i refer lo sa latab. Sa i enkli *Courts Act*, e regilasyon saler anba *Anti-Corruption Act*.

Pou konklir Mr Speaker, i enportan pou met Gouvernman, i enportan pou Gouvernman enplimant sa Polisi lo revizyon saler ki sa Prozedlwa e ki sa ganny pase par Lasanble Nasyonal. Mon alor demann tou Manm pou vot an faver sa Prozedlwa. Mersi bokou.

MR SPEAKER

Mersi Vis-Prezidan. Bon nou ava ouver deba pou bann Manm. Mon ti a kontan ganny

bann Manm ki annan lentansyon entervenir, sa pa pou anpes zot lev zot lanmen pli tar. I zis akoz kestyon letan. Si i annan en kantite Manm ki lev lanmen pli tar mon riske aplik en diferan limit letan ki mon donnen, ki mon akorde pou premye fwa.

Manm ki annan lentansyon, Onorab John Hoareau ou kapab komanse.

HON JOHN HOAREAU

Mersi Mr Speaker. Bonzour Mr Speaker, bonzour Minis ek ou lekip. Bonzour tou dimoun a lekout.

Mr Speaker Gouvernman *du jour*, Gouvernman formen par *LDS* i en Gouvernman ki ekout son piblik. I en Gouvernman ki sey tou fason pou amelyor lavi son bann dimoun.

E ozordi se laprev ki Gouvernman pe anmenn devan en *increment* 10poursan lo lapey travayer dan *public service*. Mr Speaker i bon note ki napa en pei dan lemonn la aktyel, ki'n donn logmantasyon 10poursan pou tou son *Public Servants* zis apre en peryod *post COVID*.

Fodre fer remarke ki nou'n sorti anba en leta ki ti'n pli zou mwen degrengole ekonomikman, nou'n travay

pou ouver *airport* e fer antre touris. Nou'n travay pou fer lekonomi vin sa ki i ete ozordi. E par kont nou Gouvernman i en Gouvernman ki pran swen avek son dimoun alor i pe repatri en pe sa larzan avek sa pep.

Mr Speaker ozordi ki nou pou vwar si Lopozisyon i vremen serye ler i koz lo travayer. Ozordi ki nou pou vwar si zot pa vot pou sa *Bill* ki la devan nou, nou a konnen ki zot vremen bann ipokrit!

Ozordi ki nou pou vwar ki kantite senser zot sensor avek zot lekor e avek zot labous ki zot koze.

(APPLAUSE)

HON JOHN HOAREAU

Mr Speaker se pa zis sa ki nou pe fer koman en Gouvernman responsab, en Gouvernman ki get malere. Ozordi nou'n *revise ASP weights*. Nou'n fer sir ki laplipar bann benefis sosyal in ogmante.

Nou'n fer sir osi ki lenerzi in vin a en pri abordab, pli abordab pou pep. In desann par 42 sou an Zanvye e la nou'n fer li desann par 49sou ankor, vedir ki apepre R1 in ganny desann lo sak linite kouran ki ganny servi dan pei.

Alor Mr Speaker i montre ki sa Gouvernman pa pe zis asize, me i pe travay pou sa pep. Mr Speaker *Bill* ki devan nou i pe - sou le - anmenn serten provizyon pou rearanz sa latab *public service*, pou fer sir ki sa 10 pousan ek sa bann lezot *allowance* i ganny konsolide dan en nouvo latab, ki'n sorti atraver sirkiler e atraver polisi Gouvernman.

Me par kont sa latab ki an egzistan depi 2013 atraver Dezyenm *Schedule*, li i pou kontinyen an egzistan pou bann *constitutional appointees*, bann Anbasader e bann lezot *principal representatives* ki Gouvernman i apwente.

Sa latab i pe fer ki sa nouvo vizyon ki Gouvernman pe anmennen, vedit ou ganny reminerasyon *according to* louvraz, zefor ki ou pe fer i pe vin an egzistans. I pou nepli en fason kot ou lapey i vin zis en *entitlement* pou ou - vedit tou le lannen ou sorti lo en *band* ou sot lo en lot, sot lo en lot e ou monte, ou monte.

I pou en keksoz ki ganny konsidere administrativman, kot performans en dimoun i lakle oubyen labaz sa saler ki i pe *earn*. I bezwen travay pou li ganny sa saler, e se sa kalite responsabilite se sa kalite

vizyon ki nou pei pe anbank lo la.

Mr Speaker, i enteresan pou note ki menm si sa nouvo latab i pa ganny mete dan en Lalwa, i pou ganny kontrole administrativman e atraver Polisi, i enportan note pou dir i annan baz legal atraver *Public Service Order*.

E i osi enportan pou nou note ki si okenn dimoun i santi li *aggrieved* par sa latab, oubyen i santi li in ganny *adversely affected*, dezavantaze i kapab *still* anmenn en ka kot *PSAB*, i kapab *still* rod rekour koman en *judicial review* lo sa latab.

Se pou sa rezon ki mon krwar poudir sa latab pe anmenn nou sa nouvo Lalwa, sa nouvo lamannman, i pe al dan en bon direksyon. I pe al dan en direksyon ki vizyon *LDS* i annan pou sa pei, atraver nou manifesto ki nou'n promet sa pep. E i pe al dan en direksyon kot nou pe ede pou ki kou lavi i vin abordab, pli abordab pou tou dimoun.

E i pe vin en fason kot i pe ed sa pep grandi, i pe ed sa pep epanouir e pe ed sa pep pran konsyans poudir ou bezwen travay pou ou kapab ganny ou larzan. Avek sa Mr Speaker mon a remersi ou.

(APPLAUSE)

MR SPEAKER

Mersi. Mon annan en lot Manm ki pou entervenir. Onorab Samynadin.

HON KELLY SAMYNADIN

Mersi Mr Speaker. Bonzour Minis, *VP* avek ou *panel* e tou dimoun a lekout. Mr Speaker apre ki nou pep in reisi kapab sirmont bann defi anmennen par pandemik *COVID-19*, ensi ki lenpak aktyel lager Larisi, *Ukraine*, byensir avek bokou sakrifis, nou Gouvernman in vwar ki in plis ki ler pou rekonpans Seselwa atraver en revizyon saler.

Dan son ladres pou komemor 2an dan lofis, Prezidan larepublik ti dir e mon sit li, "Atraver sa bann desizyon nou'n montre dan en fason kler ki sa Gouvernman ki da lofis ozordi i annan Lepep Seselwa a ker, e ki latansyon prensipal nou travay i ganny konsantre lo ki mannyer pou pran swen avek nou pep.

E ki mannyer nou pou sirmont bann lobstak, fer fas avek bann defi e donn nou pep maksimonm posibil". "Fen sitasyon".

Mr Speaker en revizyon saler i anmenn plizyer benefis. I fer provizyon loportinite pou

bann anploye resevwar konpansasyon anliny avek zot performans. I ofer bann anplwaye ki annan en performans tre o, pou travay avek bann ki pa pe perform e ed zot pou zot amelyore.

I permet bann anplwaye pou eksprim okenn konsern ki zot annan an term zot rol e saler li menm e i ede amelyor moral bann anplwaye, par donn zot loportinite pou rekonnet zot bann lakonplisman.

Par kont Mr Speaker, mon oule profite pou fer tou dimoun mazine ki e logmantasyon saler i osi vin avek en revizyon nou travay, ensi ki nou performans. Annou reflexir lo kwa ki nou kapab anmennen de plis dan nou louvraz, an term dedikasyon e motivasyon.

Wi i nou drwa pou benefisye an term *increment* me osi nou swa e nou responsabilite personnel pou asire ki prodiktivite dan nou landrwa travay i pran plas.

Annou elimin bann move mantalite ki pa akseptab e pa merit ganny tolere, e pli enportan napa plas pou politik dan okenn konteks profesyonnel.

Sak travayer i bezwen annan klerman antet ki bann vizyon e bi son lorganizasyon, avek ki i apartenir e an retour

travay pou kapab zwenn sa bann lobzektif. E sak anplwayer i merit kapab ekout konsern ek pwennvi son bann anplwaye.

Se sa zefor kolektiv ki konte a lafen. Mr Speaker mon pou vreman kourt, avek sa mon pou konfirm mon sipor pou sa *Bill*. Mersi.

MR SPEAKER

Mersi Onorab. Onorab Naddy Zialor.

HON NADDY ZIALOR

Mersi Mr Speaker. Bonzour Vis-Prezidan avek ou lekip, bonzour Lepep Seselwa.

Mr Speaker mon osi mon pou tre kourt an term provizyon sa *Bill* e mon sipor. Me bomaten mwan, mon ti a kontan salye nou bann dimoun ki'n travay viz a vis re-organizasyon dan *public service grid* li menm.

Parske an verite ti'n ariv en moman pou nou revwar lafason ki bann saler ti pe ganny donnen, e tre souvan si mon retourn an aryer, tre souvan dan lepase i annan bokou keksoz ki'n ganny fer dan en fason soule, si nou admet en pti pe dezord.

E mon krwar atraver sa *Bill* tou dimoun ki dan servis piblik i ava konnen egzakteman ki direksyon, ki vizyon e ki dezir ki nou Gouvernman i anvi ariv

anver. Me sa ki pli enportan - sa ki pli enportan mon krwar sa travay i demontre komitman - komitman nou Gouvernman pou annan en servis piblik ki efikas, en servis piblik ki delivre. E mon krwar baze lo bann travay ki'n deza komans fer sirtou sa *Performance Base*. En travayer piblik, ler i antre dan servis piblik i ava konnen egzakteman ler mon antre ki mon merit pe fer.

I ava napa bann *appraisal* ki ti ganny fer dan lepase, kot en dimoun i ganny *appraise*, in byen fer ou mete rekomandasyon lo son *appraisal*. Ou pe rekomann en logmantasyon oubyen en *increment*, me selman pou en rezon ou en lot pa neseserman sa ti arive.

So, mon krwar dan sa legzersis ki pe ganny fer ozordi, i ava ankor enn fwa en *wakeup call* pou nou bann dimoun ki dan servis piblik, ki letan ou antre nou bezwen antre avek en konpetans e kot napa konpetans nou fer sir ki nou met bann mekanizm an plas e ki vreman nou ki pe travay dan servis piblik.

Nou delivre pou nou pei e wi i ava annan en vizyon kler, en *road map* e mon swete ki bomaten, letan nou koman bann dirizan nou pe aprouv sa

Lalwa, nou pe osi anmenn en mesaz pozitiv deor laba pou demann avek sa zofisyè, sa *employment officer*, sa *welfare officer*, sa dimoun ki lo resepsyon, pou ki annou delivre, annou travay. E ou ava annan ou *appraisal* an menm tan ou ava annan ou *grid* ou a konnen egzakteman si mon pe delivre. Mon annan en *pathway*, mon annan en *grid* ki mon asire poudir baze lo mon performans, baze lo mon bann *indicators* la, la ki mon pe resevwar.

Lo lot kote in demontre osi komitman nou Gouvernman, ki nou bezwen partaz larises nou pei. E dan servis piblik pou nou kapab delivre fodre ki nou pe rekonpans nou bann travayer byen.

E letan ou ganny rekonpanse nou ekspekte ki ou pe delivre. Mon pou lans en lapel avek tou mon bann koleg, pou donn en sipor sa *Bill*. Me pli enportan tou nou bann dimoun dan servis piblik, pou komans sa ki pa ankor komanse.

Komans sanz zot *mindset* e konpran ki nou anvi annan en servis piblik ki delivre, e sa i enn parmi bann letap ki nou pe fer pou ki vremen ou ki asiz lo sa sez ki pe vwar sa piblik. Ou satisfè sa piblik e an menm tan

Gouvernman i satisfè ou baze lo ou performans.

Alors mon pou donn mon sipor sa *Bill* e mon pou osi lans lapel, avek mon bann koleg pou non selman pa fer politik, me annou regard Sesel, Sesel ki bor nou anvi arive e kwa ki nou anvi *achieve* letan nou dir par egzanz fer Gouvernman *run* parey en biznes.

Savedir donn *the public*, *meet the public expectation*, delivre e o fir anmezir, kot nou pei i fer byen nou pou bezwen osi rekonpanse. Mersi Mr Speaker.

(APPLAUSE)

MR SPEAKER

Mersi Onorab. Onorab Wallace Cosgrow.

HON WALLACE COSGROW

Mersi Mr Speaker. Bonzour Mr Speaker, bonzour *VP* avek ou *panel*. Bonzour tou Manm Onorab e bonzour tou Seselwa, travayer ki pe ekout nou.

Mr speaker bomaten mon krwar mon bezwen rekalièbre e pti pe bann diskisyon ki pe arive, akòz in pas 3 diskisyon, 3 *speech* lo lot kote latab laba.

E mon krwar zot pe konpletman *mislead* pep Seselwa, lo kwa ki devan Lasanble ozordi. Mon krwar ki i

enportan ki nou rek calibre deba, pou ki pep Seselwa i konpran egzaktman kwa ki devan nou ozordi.

Avek tou respe ki mon annan pou Onorab John Hoareau ki enn mon koleg lo *Bills Committee*, mon krwar Onorab Hoareau in mank konpletman bi sa *Bill* ki devan nou ozordi. Sa *Bill* ki devan nou ozordi pa pe koz lo okenn logmantasyon travayer, 10poursan dan Sekter Piblik.

Sa *Bill* pa pe koz ditou, ditou lo la! Sa *Bill* pa pe koz lo tou sa bann zafer ki zot in dir. Sa *Bill* Mr Speaker ki devan nou la, i en *Bill* ki pe senpleman tir tou lobligasyon Gouvernman - tou lobligasyon Gouvernman dan en lankadremman legal pou enplimant striktir saler dan en lankadremman legal e pe pran li pe met li dan lanmen *Public Service Bureau* dan en lankadremman administrativ. Se sa ki pe fer, napa naryen ladan ki pe koz lo logmantasyon saler.

Napa naryen ki pe koz lo logmantasyon saler, ki pe koz lo performans, ki pe koz lo Seselwa i bezwen Gouvernman in kit, in gard son promes. Napa naryen ladan, se annefe Mr Speaker...

(APPLAUSE)

HON WALLACE COSGROW

...annefe Mr Speaker si zot ti ekout byen ladres Vis-Prezidan - Vis-Prezidan in koz lo en striktir ki'n ganny aprouve - en striktir. Sa striktir pa devan Lasanble ozordi. Sa striktir pa devan Manm Onorab dan Lasanble pou diskit lo la.

Akoz i pa lo la? I pa la akoz i en striktir administrativ. Annefe ki Vis-Prezidan avek *Public Service Bureau* avek son Gouvernman in fer? In tir tou *oversight* ki nou sa Lasanble *or* nenport ki Lasanble ki vini, i kapab annan lo Lalwa ki regle saler pou servis piblik. In tir tou *oversight*, in pran tou in met dan lanmen administrativman *Public Service Bureau*. Se sa ki in fer!

Mon pa ganny en konpran sa ki zot pe koz lo la bomaten. So, Mr Speaker sa ki petet si nou ti pou swiv menm deba avek lot kote, sa ki petet nou devret pe koz lo la ozordi bomaten, se sa nouvo striktir.

Oli sa nouvo striktir? I dir in ganny aprouve, oli sa nouvo striktir? E ki bann provizyon sa nouvo striktir ozordi i fer, pou ki Seselwa i kapab ganny en konpran ki vremen, kan manner vremen travayer servis piblik pou kapab benefisye *or* ganny afekte atraver bann desizyon ki zot in

pran. Se sa ki petet zot ti devret pe koz lo la.

Me ozordi bomaten senpleman, nou pe pran en Lalwa ki ti ganny fer an 2013 pou ankadre, pou ankadre legalman saler dan servis piblik. E nou pe fer sa Lalwa, nou pe *water li down* mon kapab dir, fer Lalwa pa aplikab pou servis piblik, bann *public officers* apar en serten group ki tonm dan ka konstitisyonnèl par egzanp Lasanble, par egzanp bann Ziz. Par egzanp Prezidan avek son *Cabinet Minis*, e lezot ankor. E la in azout bann Anbasader ladan. Se sa ki nou pe fer. Nou pa pe vreman diskite lo saler pep Seselwa, prezan ler nou koz lo sa striktir Mr Speaker, Vis-Prezidan bomaten in dir nou poudir ti ganny anonse konmkwa ki bann *allowance* pou ganny entegre.

In nonm 5poursan, in nonm *marketable skills*, in nonm *PSC* e lezot *allowance* ankor ki u ganny ankadre dan sa, dan sa striktir, nouvo Polisi ki pou ganny administre administrativman par *Public Service Bureau*.

Mr Speaker an 2022 Prezidan ti koz lo en logmantasyon saler li. I ti koz lo en logmantasyon saler ki apre sa logmantasyon saler ti vin en

lasistans finansyel, *ok?* Ki apre la nou tande ki lasistans pou annan en logmantasyon 10poursan, lasistans finansyel prezan pou nepli egziste.

So, Mr Speaker ki mannyer nou kapab *trust* zot, *trust* sa ladministrasyon, *trust* sa Gouvernman avek sa bann parol ki zot dir avek sa bann desizyon. Akoz sak fwa zot fer en keksoz apre zot vir an ron, apre zot tourn lo la e zot fer en lot keksoz.

E ki mannyer nou kapab *trust* zot avek sa Lalwa ki devan nou, ler saler travayer Sekter Piblik ti ganny ankadre dan en Lalwa ozordi ou pe dir nou administrativman ki mannyer nou kapab *trust* zot pou administre sa dan benefis travayer Sekter Piblik?

Sa bann *allowance* ki ozordi pe dir pe ganny azoute, bokou travayer Sekter Piblik i annan dout. I annan bokou sa bann *allowance* ki ti napa *tax* lo la, sa dimoun ti ganny son saler, *tax* i ganny tire a en serten poursantaz baze lo son saler.

E Mr Speaker ozordi ler pe *amalgamate* tousala, i annan dimoun ki pe mont dan bann *bracket* pli o e ki zot pe war *tax* pe ganny tire lo zot. *Tax* pe ganny tir plis. E annefe sa *real increase* ki zot, zot pe dir ozordi

sa *real increase* ki zot pe dir i ap neseserman sa *increase* ki travayer pou war.

Mr Speaker. Ler nou pe koz lo *PSC performance allowance* ti ganny entegre. Vis-Prezidan ouswa *Chief Secretary* pa pe dir nou or petet zot in dir avek bann dimoun. Me selman vi ki i administrativ nou pa konnen.

PSC performance allowance ki arive avek bann dimoun, bokou - i annan en kantite bann dimoun ki lo *PSC contract* ozordi ki zot saler par egzantp i par lao R45 ekek mil, ki pa kalifye pou ganny *13th month pay or whatever* zot apel li konmela. *13th month bonus, assessment bonus whatever* zot apel li konmela ki pa kalifye.

Now, ki arive avek sa dimoun? Akoz mwan mon war poudir zot pa pe anliny keksoz en? Zot pa pe neseserman anliny keksoz parey i sipoze ete. Zot pe get li *piecemeal*, zot pe get li enn par enn e sa dimoun ki pe ganny ki sipoze ganny son - i pa ganny 13enm mwan li akoz i par lao 45 li.

Son *PSC performance allowance* ki ozordi pou ganny entegre dan saler, ki arive ler i fini son Kontra, ki manner ou aziste li dan son nouvo *grid*? Ki manner ou aziste li baze lo son performans, tousala i pa kler. I

pa kler e sa nouvo polisi sa nouvo striktir i bezwen vin an piblik.

Petet sa ti ava en loportinite dan plas ou vin avek sa ki la avan, nou ti ava vin avek sa nouvo Polisi, sa nouvo striktir, pou fer travayer servis piblik konnen kote zot *stand* ozordi. *Ok*, Mr Speaker?

Onorab Hoareau ankor bomaten ler i pran laparol Mr Speaker, i koz lo bokou keksoz ki mazorite ki'n koz lo la pa relevan pou deba ozordi. Me selman napa problem. In koz lo travayer ki *aggrieve* i annan en loportinite pou li kapab lans son konplent.

In koz lo *PSO*, annan en lankadrem legal i kapab al *lodge* son konplent. Mr Speaker, me si zot pe fer en keksoz ki sipoze bon pou travayer servis piblik, akoz travayer servis piblik pou *aggrieved*? Napa rezon pou travayer servis piblik *aggrieved*, akoz zot pe donn logmantasyon saler, zot pe azout tou *allowance*.

I sipoze *a new way of doing things*, i sipoze pli bon. So, ki rezon travayer servis piblik pou *aggrieved*? So, mon pe santi dan sa ki msye Onorab Hoareau in dir, li si i annan serten dout, serten krentif dan sa ki pe ganny propoze.

E vi ki nou napa striktir, nou napa sa lankadreman ki zot in dir zot in fer in aprouve, so nou pe koz dan dout. E Mr Speaker pou mwan dir avek Onorab Hoareau, sa Lalwa 2013 ti aktyelman donn travayer Servis Piblik en garanti -en garanti dan seksyon 8 ki dir “ *And any employed person in, or elected to the public service of Seychelles, on the coming *into force* into operation of the Public Service Table shall not be adversely effected. And shall continue to enjoy the salary not less favourable.*” Sa ti dan Lalwa.

Ozordi sa nepli egziste, nepli egziste. So, savedir *Public Service Bureau* i annan en *free hand* pou li fer sa ki i anvi, san okenn *accountability* or *oversight* of nou Lasanble Nasyonal or okenn *oversight* legal.

So, se sa ki nou pe fer! E mon'n dir. Parfwa zot donn mwan non be selman mon'n dir. Be *this is* en regresyon *from* sa ki nou ti ete. *Ok*, zot kapab dir sa ki zot oule, be i en regresyon *from* sa ki nou ti ete. Nou sorti dan en lankadreman legal e nou bouz dan en lankadreman administrativ, ki donn zot, ki donn pouvwar an deor Lalwa, en departman piblik pou fer sa ki anvi, fer Polisi, sanz Polisi,

azout Polisi, revwar Polisi. Zis Polisi, napa en *footing* legal avek.

So, Mr speaker tousala ler ou pe gete pou mwan mon annan en kantite dout en. Par egzantp ler ou tann Prezidan i koz lo pansyon ler ti pe konpanny, zot koz lo pansyon zot pe dir nou travay pou fer desann laz pansyon. Apre pa tro lontan pase nou war en Lalwa ki vini ki fer monte laz pansyon Mr Speaker! I annan dout ankor.

E ozordi piblik Seselwa ki'n asize ki'n kalkile, ki ti annan *hope* ki sa Gouvernman pou vini pou fer bann Lalwa, pou met an plas bann keksoz dan benefis piblik Seselwa, ozordi zot war tou lekotrer, tou lekotrer.

Mr Speaker avek sa, sa - mon pa ni menm kapab dir avek sa Lalwa akoz sa Lalwa i pa tous tousala, i tous en lot keksoz, me selman avek sa zafer striktir saler remaniman in monte. Sekter Parastatal par egzantp bann *SOEs*, ozordi napa garanti ki bann *SOEs* ozordi pou ganny sa logmantasyon saler ki nou ti'n koz lo la.

Sa 10 poursan parey zot pe dir pou gannyen dan servis piblik. Napa garanti i annan lorganizasyon ki'n dir ki zot *Board* pe konsidere, e zot pa

neseserman pe donn 10poursan. I annan ki pe komans donn 10, 5 depandan lo ou nivo pozisyon dan sa lorganizasyon.

Me sa i *go against* sa ki zot, zot ti dir dan Lasanble Nasyonal ler ti vin sa zafer 5poursan *increase*. Zot ti dir donn tou dimoun parey. So, ou war Mr Speaker i annan tout en *misalignment* avek sa Gouvernman.

Avek bann keksoz ki zot dir ek bann Polisi ki zot fer, e Seselwa pa kapab *trust* zot direksyon Mr Speaker. Akoz i pa kler, e nou pa konnen kote nou pe ale!

(APPLAUSE)

HON WALLACE COSGROW

Mr Speaker Sekter Prive ozordi, pli gran group travayer Sesel se dan Sekter Prive. Zot in dir zot vin met larzan dan pos Seselwa, Gouvernman in ekoute pe donn logmantasyon.

Ozordi pli gran group Sekter Prive, travayer pa konnen kote i ete. Gouvernman ki'n dir nou pe ankouraz zot, me ankouraze ankor napa en lankadreman legal. Zot bezwen rod en fason - zot bezwen rod en fason kan mannyer pou fer travayer Sekter Prive osi tou an prenon kont biznes - i annan pti

biznes osi la ki i annan serten difikilte, me nou bezwen osi rod en lankadreman legal pou kapab osi ankadre bann dimoun. Sa pa mwan ki'n dir sa Mr Speaker, pa mwan ki'n dir. Zot ki ti dir zot pou met larzan dan pos Seselwa, zot pou ogmant saler. Zot pou rod diferan fason. Zot ki ti dir.

Me ozordi le pwen ki mon pe sey fer se ki ozordi nou pe war tou lekotrer. Nou pe war tou lekotrer dan bann keksoz anmenn devan nou bann Polisi ki zot anmenn devan nou.

So, it's an issue of trust. En *issue of trust* dan sa Gouvernman dan sa ki zot dir e sa ki zot fer apre. E Mr Speaker pou mwan terminen, ler mon get sa anefe en pe diskisyon ki nou'n gannyen dan *Bills Committee*, mon pe ganny en konpran ki pou dir sa ki la i en bout. E i annan lot bout ankor pe vini, e mon konnen poudir pa tou dimoun ki aksepte avek travay *piecemeal*.

Nou ti ava voudre war en travay ki konplet ki vin devan Lasanble, ler Lasanble i vot lo en Lalwa or i vot lo en amannman Lalwa, i vot lo en travay konplet, sa pou mwan i pe ganny fer pou *accommodate* dezir ou lanons ki Prezidan ti fer konsernan striktir saler.

Minis ti fer konsernan striktir saler e pou *accommodate* sa promes ki zot in fer *by* le 1 Avril. Annefe zot an retar, pou fer Lalwa mon krwar zot pou al fer li vin *retrospective* zot an retar. Me pou mwan mon ti a voudre war en travay pli konplet, pli entegral kot tou sa bann zafer ti'n fini ganny adrese.

Enkli pou Manm Lasanble, enkli pou Minis, enkli pou Sekter Piblik, Sekter Servis Piblik. Tou ansanm 2 ankadre e ki nou ti kapab bouz devan. Mr Speaker avek sa parey mon'n dir pep Seselwa i bezwen konpran sa Lalwa ki devan nou napa naryen pou fer avek logmantasyon saler.

Sa Lalwa i zis pe fer provizyon pou legaliz - ler mon pe dir legaliz pou zistifye zot striktir an deor administrativ ki zot pe fer. *So basically*, zot in fer en louvraz *piecemeal*. Zot in fer en louvraz tir serten bout dan Lalwa pou *suit* zot louvraz administrativ e se tou ki ete.

Napa naryen pou fer avek logmantasyon saler. Si zot vin avek sa striktir - sa nouvo striktir, anmennen fer *statement* akoz i pa Lalwa. Anmennen fer *statement*, dir nou kwa i ladan nou ava diskite, apre nou ava kapab koz

lo, lo. Mr Speaker avek sa mon remerci ou.

E mon ava ekout lezot deba. Mersi.

(APPLAUSE)

MR SPEAKER

Mersi Onorab. Onorab Conrad Gabriel.

HON CONRAD GABRIEL

Mersi Mr Speaker. Mon a dir bonzour tou dimoun a lekout, spesyalman zabitan Pointe Larue. Mr Speaker mon krwar Onorab Cosgrow in fer lesansyel. In etabli travay ki la devan nou.

Seselwa pe kont lo nou pou tir sa fristrasyon lo zot. Nou pep pe soufer, pe soufer tro bokou. Bokou zot pe regrete sa desizyon ki zot in pran an Oktob 2022. Sanzman in vin transformasyon e i en transformasyon ki fermal. Sa i en fe, e nou bezwen admet.

Annou pa al pli lwen, zis get laz sekirite. Sa bann pov vyeyar tantin, tonton ki'n lalit ki'n lite, ki'n trimouse e kontribye bokou dan prosperite sa pei, in ganny kit ater.

Akoz zot in swazir pou tous sa kous popilasyon ki pe rankontre bokou difikilte pou fer 2 bout zwenn? Annou pa oubliy bann *single mothers*, sa i

vreman tris Mr Speaker. Sa *Bill* pe fer provizyon pou nouvo Polisi ek striktir saler. I reste pou nou vwar ki manner Seselwa i benefisyè.

STC tou keksoz i monte e in tous plafon. La zot pe fer krwar e fer desann, me selman nou konnen pou dir sa i zis en bat latet. I montre klerman ki sa Gouvernman pa senser, i pa serye ek sa pep e zot lentansyon pa bon.

Plizyer fwa isi dan sa Lasanble, nou'n vwar ki serten desizyon ki sa Gouvernman in pran in mal plase. *LOTO* - Onorab Pillay in seye a plizyer repriz pou anmenn bokou keksoz pozitiv pou kontribye aranz sa pei.

Mr Speaker atraver ou ki nou vwar? Zot sispann li pou en senp naryen ditou e la i montre nou zot vre lentansyon.

(APPLAUSE)

HON CONRAD GABRIEL

Zot konnen poudir sa *LOTO* i kalib e kosto.

(APPLAUSE)

HON CONRAD GABRIEL

En vre gerye e en *Leader* Lopozisyon ki kapab. An dot mo en pikan lo zot deryer. Direktiv i kler, *ban* li sa sesyon ozordi ki

vreman enportan pou nou pei. I malere e i tris Mr Speaker.

Me sa pa dekouraz nou, i fer nou pli determinen ki zanmen.

(APPLAUSE)

HON CONRAD GABRIEL

Zot bann lesey pou anpes nou fer en bon travay dan sa Lasanble, nou war zot dan gran kler. Mr Speaker, eski Minis i kapab ed nou konpran, ki manner zot in ariv lo sa poursantaz 10 poursan?

Eski zot in *focus* lo sityasyon pri lavi, akoz Seselwa pa pe al ganny gran keksoz. Plizyer lakour kot mon'n pase Seselwa i mekontan avek sa ki pe arive dan nou pei. Seselwa pa pe ganny en *fair deal*. Sa ki annan pou toultan annan, e sa ki napa pou reste napa.

Sa i kont prensip nou parti. Lo sa kote latab nou anvi ki tou Seselwa i fyer pou reste Sesel. I paret sa Gouvernman in vin *run* sesel parey en biznes. E sa Mr Speaker i vreman danzere, i paret Gouvernman pa enterese ek soufrans sa pep.

Mon konnen ki tou dimoun i konsernen ek sa Lalwa. An prensip zot lekspektasyon i telman o akoz zot ti vote pou ganny plis larzan dan zot pos.

I pa en logmantasyon, i pa re-el. Seselwa pe pas atraver bokou difikilte lo sa kote latav atraver *LOTO* nou'n debat tre for pou lans en mesaz tre kler ek sa Gouvernman. Mon a profite pou dir ki nou'n akonpli bokou pou sekwe sa Gouvernman koman en Lopozisyon responsab.

E nou pou kontinyen nou lalit san lafreyer.

(APPLAUSE)

HON CONRAD GABRIEL

Nou la pou reprezant sa pep, e fer sir ki sa *joie de vivre* i retournen parmi nou popilasyon. Koman Manm Elekte pou distrik Pointe Larue mon pou fer sir ki distribisyon larises i ganny fer byen san diskriminasyon oubyen malis. Fer sir sa ki merit ganny lasistans i gannyen e dan en dele letan tre kourt.

Fotespere ki Gouvernman i senser dan sa travay ki devan nou. Mersi.

(APPLAUSE)

MR SPEAKER

Mersi Onorab. Onorab Bernard Georges?

HON BERNARD GEORGES

Mersi Mr Speaker. Bonzour Mr Speaker. Bonzour Vis-Prezidan. Tou bann Manm Onorab e tou dimoun ki pe swiv nou.

Mr Speaker premyerman permet mwan pou felisit Onorab Gabriel ki fek koze, pou lafason ki in lir diskour Onorab *Leader* Lopozisyon bomaten.

(APPLAUSE)

HON BERNARD GEORGES

In fer li san mank en mo, in byen *practice* son *speech*. Felisitasyon Onorab!

(laughter)

HON BERNARD GEORGES

Mr Speaker dezyenman atraver ou les mwan, reasir Lopozisyon ki si zot anvii fer sa ki zot in koz lo la depi bomaten, sel keksoz zot bezwen fer se travay dir e ariv o pouvwar ankor. 2025 zot konnen zot pa pou arive, 2030 osi i dan dout. Sey pou 2035 kekfwa avek laverti en tabatyer zot ava kapab arive.

(APPLAUSE)

HON BERNARD GEORGES

Me pou le moman, Seselwa in Elekte Gouvernman *LDS* e se Gouvernman *LDS* ki pe delivre pou Seselwa ozordi. E pou

kontinyen fer li pou ankor sa bann lannen ki pe vini.

Mr speaker sa *Bill* ki devan nou ozordi i en *Bill* ki en nouvo pa dan sa revi, dan sa restriktirasyon servis piblik ki sa ladministrasyon i bezwen fer apre tou sa bann lannen ki sa bann ladministrasyon ki'n vin avan nou in premyerman politiz servis piblik.

E in fer li vin en zouti pou gard zot o pouvwar e dezyenmman, i pa'n annan okenn lide. Okenn fason pou fer Servis Piblik delivre dan son *optimum* parey nou dir an Angle.

Sa *Bill* ki devan nou ozordi i en nouvo pa dan sa restriktirasyon, non selman Servis Piblik me pei an antye. E sa ki montre nou Mr Speaker se en *move* kot nou sorti, dan en *planning* santral ki bann Ladministrasyon avan ti kontan.

E nou antre dan en sityasyon bokou pli fleksib, bokou pli baze lo performans. E sa se diferans ant nou de kote. Tou bann Manm ki'n koze depi bomaten, i anvi retourn dan en sistenm direksyon santral, kot en dimoun dan milye i fer tou desizyon pou tou dimoun.

Zot kontan santraliz tou keksoz, fer tou dimoun a nenport ki moman ganny

menm keksoz pa konsern si zot travay byen, si zot pa travay byen. Annou pa regard zot performans, annou fer sir ki tou dimoun i ganny en keksoz an en lankadreman santralize.

E se sa Mr Speaker ki sa Ladministrasyon *LDS*, pe transformen. Pe sorti ladan apre 43an kot nou pei in *stagnate* ekonomikman, akoz sa model pa marse e anmenn Sesel dan en nouvo landrwa avek en nouvo lespwar kot avek plis fleksibilite. E avek plis depandans lo lendepandans sak endividi, nou pei a kapab bouz bokou pli lwen.

Mr Speaker nou vwar ozordi bann Manm ki'n koze, sa 2 manm ki'n koze, in retourn nou, in retourn nou dan lepase ki zot, zot ti a kontan vwar ankor.

Zot *mindset* pa ankor sanze, e si nou regard an aryer nou a vwar lo deba pou 13enm mwan se egzakteman sa ki zot ti fer. Tou dimoun i bezwen gannyen malgre ki zot travay oubyen, oubyen zot pa travay.

Lo sa *salary grid* ki ti annan otomatikman ou mont en pa tou-le-z-an, si ou perform ou monte, si ou pa perform ou mont parey se egzakteman sa ki zot anvi nou retourn lo la ankor.

Trwazyenmman nou ava rapel ler zot ti fer en

logmantasyon saler, zot ti anvi ki tou dimoun partou i ava ganny egzakteman parey. E nou, nou ti dir non, bann ki pli ba i devret ganny plis, bann ki pli o i devret ganny mwens.

E se sa, sa fleksibilite. Se sa.

(APPLAUSE)

HON BERNARD GEORGES

Se sa, sa fleksibilite.

(Interruption)

MR SPEAKER

Ekout mwan en pti kou Onorab. Mon'n tann bann Manm kri "lalang" atraver lasal, i pa akseptab. E osi silvouple lo sa kote pa akiz person, mon a demann zot - mon a demann zot pou gard lord silvouple. Onorab Georges eskiz sa lenteripsyon ou kapab kontinyen.

HON BERNARD GEORGES

Mersi Mr Speaker. Mersi pou ou lentervansyon. Mr Speaker mon ti pe dir ki sa *Bill* pe fer ozordi se anmenn plis fleksibilite dan en sityasyon, pou permet ki sak endividi i ava ganny rekonpanse par sa zefor ki i met dan son travay e non pa neserman ganny travay pa travay, menm *reward* ki bann lezot dimoun.

Alor malgre ki Onorab Cosgrow i dir ki sa *Bill* napa naryen pou fer avek logmantasyon saler, Mr Speaker i pa vre.

Sa *Bill* i annan tou keksoz pou fer avek logmantasyon saler. Se akoz sa logmantasyon saler ki Gouvernman in promet avek Seselwa, avek bann travayer servis piblik, ki sa *salary grid* ki egziste ozordi nepli kapab delivre.

E se pou sa rezon ki sa *grid* i bezwen sorti dan sa fason santralize e *fussier* e vin enn ki pli fleksib ki kapab ganny modifye ler i bezwen par en sirkiler administrativ. Se sa mon bann zanmi ki zot bezwen konpran.

Alor pa per - pa per si en Gouvernman i vin avek nouvo lide ki zot, zot pa'n kapab anmennen. Set akoz sa - (Onorab Cosgrow ou'n ganny sans koze taler mon pa'n fer wep. Donn mwan sa menm respe silvouple?)

E Mr Speaker la mon ava profite pou dir ki a en serten moman mwan mon ti krwar Onorab Cosgrow ti en *rising star* dan son parti e i ti annan en gran landrwa pou ale. E la apre ki nou'n ekout li bomaten, mon realize akoz ki i en Manm Lasanble Nasyonal ozordi.

(laughter)

HON BERNARD GEORGES

Mr Speaker, Mr Speaker napa naryen ki mal, napa naryen ki ilegal, napa naryen ki pou kasyet naryen atraver en sirkiler administrative, olye en kad legal. Akoz sa sirkiler administrativ parey Onorab Hoareau in fer nou konpran ozordi, li menm li i baze lo *PSO* e *PSO* i en Lalwa ki aplik pou tou bann travayer servis piblik.

Mr Speaker, dan sa sanzman, dan sa transformasyon dan nou servis piblik, i annan osi posibilite - e mon konnen ki Gouvernman pe etidye sa byen - pou sorti dan sa lankadreman ki bann Ladministrasyon *SPPF* in met nou ladan. E pou ariv dan en lankadreman kot pou annan en *Public Service Commission*.

Sa mon'n fini war e menm dan nou manifesto nou'n fer alizyon a sa. Kot servis piblik pou bezwen ganny bokou plis *training*, bokou plis fasilite.

I bezwen annan en lakademi pou bann travayer servis piblik konnen kote zot ete e ki zot rol. Se sa, sa transformasyon. E sa ki nou pe fer la bomaten se enn sa bann transformasyon.

E ler nou regard bann ladministrasyon avan ti annan

en *Public Service Commission* avan ki Mr Rene in vin o pouvwar. Premye keksoz ki in fer, in koup sa *Public Service Commission* e in fer en fason pou li kontrol servis piblik.

In fer en fason premyerman pou politiz servis piblik e dezyenmman pou met dimoun lo Kontra akoz ler i pa ti anvi en dimoun, zis i pa ti renouvle Kontra.

Se sa bann keksoz ozordi ki nou, nou bezwen defer Mr Speaker. E re mars an naryen.

Olye annan en *Public Service Commission* kot tou dimoun, tou travayer servis piblik ti pou kapab vin devan e eksprim zot, zot in aboli sa zot in met en *PSAB* an plas.

Me se sanmenm sa *PSAB* Onorab Cosgrow atraver ou Mr Speaker, ki ler pou annan en dimoun ki pa satisfe avek lafason ki sa *performance* in ganny baze, oubyen ki son lapey in monte oubyen pa'n monte, oubyen ki i aprann ganny en promosyon ki neserer, se kot sa *PSAB* ki i pou ale.

I annan donk striktir kot si i annan en travayer servis piblik ki pa kontan sa ki pe arive avek li, i annan en landrwa kot i pou ale. Si i pa anvi al kot *PSAB* i kapab touzour al fer en laplikasyon

pou *judicial review* devan Lakour.

Tou sa bann keksoz i ankor la, e napa naryen ki'n sanze. Sel keksoz Mr Speaker ki'n sanze se ki, (zot be arete *men*, donn mwan e sans koze! Ou pe zis gronnyen! Onorab Cosgrow, pa fer, pa fer parey ou *Leader*)

HON WALLACE COSGROW

(*Off-Mic*)

MR SPEAKER

Onorab Cosgrow. Onorab Cosgrow ou'n enteronp Lasanble plizyer fwa zis par koze for.

Mon konnen i annan Manm ki fer komanter, si mon pa tande mon pa fatig mwan avek. Selman i annan serten Manm ki toultan pe koz for, pe kriy an traver lasal. Mon pe donn zot en *warning* silvouple. Mon pou demann zot sorti si i kontinyen. Mersi!

Onorab Georges silvouple kontinyen.

HON BERNARD GEORGES

Mersi Mr Speaker. Mr Speaker mon ti pe al terminen. An terminan mon anvi ki Lepep Seselwa ki pe ekout nou, i konpran tre byen ki diferans i annan ant sa ki asiz lo kote

drwat dan sa Lasanble e sa ki asiz lo nou kote Mr Speaker.

E sa diferans se sa - sa ki nou, nou anvi, sa ki sa Gouvernman pe fer, e sa ki sa Lalwa pe propoze ozordi, se ki sak endividi i ganny valorize pou son travay ki li i fer.

Se sa diferans ki i annan ant nou avek zot. Zot, zot anvi ki tou dimoun i egal, ki zot perform, ki zot pa perform, ki zot ganny ankadre, ki zot ganny siporte, ki zot ganny peye, ki zot ganny en *allowance*, ki zot ganny en trezyenm mwan, ki zot ganny tou sa bann keksoz, ki zot ganny en pansyon menm si pei pa kapab *afford*.

Ki zot ganny en Sekirite Sosyal, menm si pei pa kapab *afford*, akoz zot p fer politik bon marse. Se sa diferans ant zot avek nou.

Nou, nou en Gouvernman responsab. Nou en Gouvernman transformatif. Nou en Gouvernman ki Lepep Seselwa ki konpran tre byen sa ki pe pase dan sa pei, in met o pouvwar avek en gran mazorite e *State House* e isi dan sa Lasanble.

E fodre zot konpran sa. E fodre zot donn nou lespas ek laliberte pou nou fer sa ki Lepep Seselwa in vote pou nou fer.

Alor mon bann zanmi ozordi eskiz mwan, me aksepte

ki sa ki zot pe fer pa pou anmenn nou pei okenn landrwa. O kontrer sa ki sa tim ki la devan pe asiz avek Vis-Prezidan pe fer, se sa ki pou anmenn vre transformasyon dan nou pei.

Kot sak endividi pou ganny lespwar ek lespas pou li devlop son lekor, fer byen e monte dan sa pei. E Lepep Seselwa Mr Speaker i konpran sa tre byen. E sa Lalwa ki pou pase ozordi - mon konnen zot, zot pa pou vote - me nou, nou pou vot pou sa Lalwa.

Sa Lalwa i en lot blok dan sa miray ki parti *LDS* pe konstri. Mersi Mr Speaker.

MR SPEAKER

Mersi. Mon ava profit sa lokazyon pou lans en lapel avek bann Manm pou elev zot konportman silvouple koman *Leaders* ki sipoze donn legzanp.

Souvan fwa zot azir parey marmay, e parey marmay malelve ki pa kapab ekout lezot dimoun koze, zot bezwen enteronpe.

Silvouple annou donn en legzanp nou popilasyon. I annan en kantite dimoun ki pe get nou e ki servi nou koman legzanp. Mersi. Mon ava pas lo prosen entervenans. Onorab Uranie.

HON ROCKY URANIE

Mersi Mr Speaker. Bonzour *VP* ek ou delegasyon. Tou koleg Onorab e byensir tou zabitan Zil Pros e Seselwa ki a lekout.

Ozordi mon konnen ki bokou dimoun in met zot radyo, televizyon *on*. E osi lezot form medya sosyal parey *YouTube* pou zot swiv Lasanble.

Sa *Bill* ki lo lamannman saler travay servis piblik, i enn ki tre enportan. I enportan akoz se nou saler ki kit nou azour avek nou bezwen personnel.

Parey aste manze pou sonny nou lekor e nou zanfann, pey nou bann *bill* delo, elektrik, telefonn. Pey nou *loan* lakaz, transpor e lezot nesesite ki en fanmir i bezwen pou li viv dan dinyite e pa vin en mandyan

Mr Speaker, sa *Bill* in ganny degaze avek, san vreman pran kont laspe proteksyon pou bann travayer servis piblik. Zot in retir plizyer seksyon dan Lalwa ki anpar e ki protez saler travayer dan servis piblik e tou pouvwar pou al lanmen en pti group. Zot in tay avek sa Lalwa akoz prononsman ti'n ganny dir ki logmantasyon saler pou pran lefe le premye Avril. E la nou le 12 Avril.

Zot in vwar ki letan pe kit zot e alors annou anvoy sa Lalwa. Vi ki zot an mazorite parey in ganny dir zot ava fer li

pase pou sey tir sa fristrasyon ki pe akimile dan zot sef e popilasyon.

Mr Speaker, vi ki lot kote in koz lo sa logmantasyon saler, pou mwan avek sa nivo lenflasyon ki annan ozordi, eski vremen sa logmantasyon ki zot pe donn Seselwa ki dan servis piblik i en *fair deal*, i en bon dil?

Ki mannyer sityasyon i ete ozordi dan pei, zot in donn travayer servis piblik en pti logmantasyon ek lanmen drwat e zot pe pran ek lanmen gos.

Levidans i la devan nou. Toulezour nou pe vwar, nou pe ganny *call* kot zonn, fanm pe tap nou laport pou sey rod led pou fer de bout zwenn.

Mr Speaker, mon ti ava swete ki sa Gouvernman i donn Seselwa son vre dinyite finansyel. Zot ava aret pran davans e osi en kantite kredi kot bann magazen. Zot ava kapab pey zot konmisyon parey plizyer nou isi anndan i fer.

Mr Speaker, mon pa oule ki travayer le i ariv le 30 i riye, me zis 3 zour apre ler le 3 son mwan ansuit i ou le plere, lanmin lo fron, lakoler, fristrasyon aköz i pa war rekonpans son kouraz.

Napa travay ki dezoner. Napa travay ki degoutan, aköz tou travay i siport en lot. E dimoun i kontribye dan

devlopman pei. Alors fodre pa ki nou fer zot saler riy zot ler i ariv lafen dimwan.

Mr Speaker kou lavi Sesel i vremen o, e la nou zabitan Zil Pros konmsi koze pa met kouto. Kot nou tate i so. E sa plizyer fwa mon sey rod rekour isi menm anndan dan Lasanble, me i annan ki'n pran sa pou en fars. Aköz pa ti pe tous zot personnelman, ziske ler zot met lipye lo zil La Digue e la ki zot anvi fer konversasyon lo pri lavi.

Mr Speaker, letan mon pe koz lo Zil Pros, Gouvernman pa'n pran konsiderasyon ki La Digue preske popilasyon antye apard *teachers*, detrwa travayer Lasante, detrwa travayer Gouvernman Lokal, 2 travayer *Licensing*, 2 travayer *Employment*, 2 travayer *SRC* e enn kot *Land Transport*, en total apepre zis 125 dimoun ki dan servis piblik e tou larestan travayer i prive. Byensir masiv mazorite i dan Lendistri Touris. Kote zot ganny kouper dan sa pei an relasyon avek logmantasyon saler?

Eski Gouvernman in fer konversasyon avek sa bann biznes pou obliz zot donn sa 10poursan?

Mr Speaker, i kler ki pa tou biznes ki pou kapab ogmant son travayer sa 10poursan.

Pran legzanp bann pti kontrakter netwayaz, zot larzan pa'n ganny aziste pou sa logmantasyon.

La annou pa bliy bann pti biznes ki pe sey fer 2 bout zwenn, eski zot tou pou kapab ogmant zot travayer sa 10 poursan?

Mr Speaker, i annan dimoun ki son anplwayer pou bezwen fer li aret travay, pou li reaziste li dan serten fason pou pey sa 10poursan. Akoz sa biznessmenn pe mazin lenter son biznes.

Sinon Mr Speaker si i pa fer sa, kou lavi e servis pou vin pli o ankor, akoz sa biznes i bezwen ranpli kek trou ki pe ganny fouye dan son biznes e servis.

Nou'n vwar ki'n arive avek bato. Kot zot pri tiket in mont tre o, e nou Digwa ki bezwen asse servis Mahe oubyen Praslin, bezwen vwar bokou larzan. Nou pa pran en bis R12.

Alors Mr Speaker, ki garanti ki travayer lo mon zil ki pe pli ganny afekte e touse avek kou lavi i annan?

Mr Speaker, nou tou nou bezwen manze e preski dir nou al dan menm laboutik. Mon mazin bann pansyoner ki pa'n ganny logmantasyon. Oli sa

R10mil bat latet imaziner ki zot ankor pe espere ziske prezan?

Mr Speaker, bann travayer paraetatik, eski zot pou ganny zot logmantasyon 10 poursan?

Mr Speaker, 10poursan ti ganny kriye tre for. E menm mon rapel lannen pase ou ti pres pou bane nou le nou ti nom 10poursan isi dan sa Lasanble.

Nou ti vwar, me ki nou vwar? Anba, anba pase dan silans kot i annan pe dir pou ganny 5poursan logmantasyon i annan pou ganny 3poursan ki pou ganny aplike.

Mr Speaker, i vre ler en dimoun pou get son *pay slip* i pou vwar en nouvo sonm pli o, me mon swete ki sa i pa zis en gro limero, me vreman en saler ki pou ed li rezourd son sityasyon lavi an relasyon avek lenflasyon parey mon dir i komansman.

Mr Speaker, pye ti ganny sekwe byen boner pou Egzekitif. E zot in byen aranz zot. Zot in pran tou sa ki apel pou zot. Me sa pti Seselwa ordiner la zot pe kas ek golet pou zot donner.

Isi Sesel zis *United Seychelles* ki lager pou Seselwa ozordi. E sak fwa nou fer li, nou plenny sor sa pep nou ganny bokou rezistans. E menm ganny anpese koze isi anndan!

Ozordi mon ti ava swete ti avan 10 nou isi anndan. Me nou vwar ki arive letan nou koz laverite, nou ganny met deor.

Alors, mon kontan ki Seselwa dan servis piblik, mon kontan pou zot ki zot pou vwar en nouvo sonm lo zot *pay slip*. Me nou en sel Sesel, napa de Sesel.

Mon swete ki bann travayer Sekter Prive ki lo mon zil i ranpli avek, pou osi ganny en bon dil.

Mr Speaker, sa Lalwa ki devan nou in retir pouvwar Egzekitif pou fer *oversight e* in met li dan lanmen *PSB*.

Mon ti a swete ki sa nouvo striktir ki *VP* in anonse ti ava la devan nou. Me malerezman i pa la. E alors nou vwar ki sa Gouvernman i fer keksoz vatevyen e fer nou mank konfyans dan zot.

E pou mwan personnelman Mr Speaker, mon pa *against* okenn logmantasyon saler pou travayer. Me selman mon pa krwar ki tou travayer pe ganny gete. Mersi Mr Speaker.

MR SPEAKER

Mersi Onorab. Onorab Cosgrow ki arive, ou annan en *point of order*? Ale, ki ou annan en *point of order*.

HON WALLACE COSGROW

Mr Speaker mon annan en *point of order*. Mon le anba seksyon 61(2) mon anvi koriz en *misapprehension* fer par Onorab Georges an relasyon avek en *statement* ki mon'n dir.

Mr Speaker, Onorab Georges in dir nou ki poudir i annan rekour anba *PSAB*, e *PSAB* si en dimoun i *aggrieve* avek son saler, i kapab al kot *PSAB* ouswa devan en *judicial review*.

Koman en Avoka Mr Speaker, Bernard Georges i devret konn Lartik 146 nou Konstitisyon. Ki dir: -

“The Public Service Appeals Board shall hear complaints by persons aggrieved by - an appointment made to an office; a promotion to an office; disciplinary proceedings taken in respect of an officer; termination of appointment of a person who was holding an office; any decision relating to the qualification of a person who has applied for an office or serving an office in the public service”.

Mr Speaker, napa okenn landrwa dan nou Konstitisyon ki mansyonn ki en dimoun i *aggrieve* avek son saler i al kot *PSAB*.

So se pou sa rezon Mr Speaker ki mon krwar mon bezwen koriz li akòz i pe *mislead* piblik deor. E *because* mon en *rising star* dan mon parti ki ozordi mon pe koriz li koman en avoka. Mersi.

MR SPEAKER

Mersi, Non. Onorab Georges mon pa pou antre dan en deba lo la. Si i en pwen ki relevan avek Lalwa, *VP* i ava adrese ler i fer son *summing up* e son leksplikasyon. Mersi.

Onorab Andre, laparol.

HON CLIFFORD ANDRE

Mersi Mr Speaker. Bonzour *VP* avek ou delegasyon. Bonzour, tou dimoun ki a lekout. Mr Speaker, ozordi nou annan en Lalwa ki devan nou, en *Bill* ki devan nou, ki pe demande ki serten modifikasyon i ganny fer. Lamannman i ganny fer dan en lot Lalwa *Public Service Salary Act, 2013*.

Pou ki a permet tou dimoun dan *public service* ganny en logmantasyon 10poursan parey ti'n ganny anonse par Minis Finans dan son *Budget Speech*.

Mr Speaker, in plis ki ler pou nou koman bann politisyen de-politiz saler dan servis piblik. Tro bokou fwa nou vwar ki pou bann rezon sey ganny

vot, pou dimoun sipòrt nou. Nou'n pran politik nou'n met atase avek zot saler.

E sa in ler pou nou arete. Ki ava fer ki sa dimoun i ava pe travay koman dan servis piblik. I ava annan bann target ki i bezwen *achieve*. E si i pa *achieve* bann target i pa ava byensir ganny sa saler ki sipoze gannyen baze lo son performans ki in fer.

Mr Speaker, letan mon'n ekout - mon'n fer li mon devwar pou menm si mon ti absan pou en kourt letan dan Lasanble la. Pou mwan ekout bann diskour ki'n ganny fer.

Mon'n enpresyonnen par lafason Lopoziyon in fer zot bann entervansyon. Mon dir sa Mr Speaker, akòz zot in dir ki letan ou donn pouvwar administrativ en antite savedir ou pe tir li dan en Lalwa e pe donn *freedom* pou sa antite kapab fer sa ki i oule avek saler.

Mr Speaker, me selman mon le fer zot mazine ki letan an 2019 Lakour Konstitisyonnel ti'n dir ki poudir Lasanble in fer son travay *appropriately* an referans avek *S.I* ki nou ti *quash*, sa menm sa ladministrasyon sa lepok ki pou *US* ti pran en desizyon administrativ Mr Speaker.

I enportan ki nou konn *textualize* sa, akòz sa i vèdir ki tou ladministrasyon ki vini, i bezwen annan en *body* ki pou kapab travay lo saler.

Me ki nou, nou pe dir etan ki Ladministrasyon LDS? Nou pe dir ki nou pa le fer sa *ad hock*. Nou le ki sa Komisyon i ava annan sa manda pou li revwar saler tou dimoun, tou Seselwa.

Alors tou dimoun i ava konnen ki bor i ganny sitye si i performen. E si i pa performen kote i pou ganny sitye.

Mr Speaker, i enportan ki menm si mon'n dir ki poudir nou de-politiz saler, Me i enportan pou note ki dan sa prosis LDS i oule ki tou dimoun i ganny zot 10poursan.

Dan *public service* zot pou gannyen akòz sa Lalwa ki la ki devan nou ozordi. Se li ki pe fer sir vizyon pou permit zot lafen dimwan Avril ganny son 10poursan *increment* oubyen letan i ase si i neser zot ava ganny en *backpay* pou bann ki vin apre.

Mr Speaker, in plis ki ler pou tir saler oubyen revizyon saler avek Lasanble. Akòz parey nou vwar, nou pe sey fer dimoun krwar ozordi ki poudir si ou ganny en logmantasyon Gouvernman i pa bon.

Be kote i egziste sa Mr Speaker? O kontrè tou dimoun i oule ganny logmantasyon. Annefe mwan kot mon sorti, mon sorti en pti kou lot kote kot Lakour, zot dir mwan 10poursan pa ase.

Mon dir be komans ek 10poursan apre i ava monte. So si zot pe dir poudir i en keksoz ki mal ki Gouvernman LDS pe fer, mon pa konpran kot nou pe ale.

Savedir pep Seselwa 2025 pa fer sa fot pou retourn sa bann dimoun la.

(APPLAUSE)

HON CLIFFORD ANDRE

Mr Speaker, mwan mon'n pran, etan ki *Chairman Bills Committee*, mon'n fer li bon devwar avek mon Komite *obviously*, pou fer sir ki nou revwar sa Lalwa dan son totalite.

E annefe yer CS i kapab dir ki mon asire i pa ti en *meeting* fasil ki nou ti ladan yer avek delegasyon.

Nou ti met bann pwen for ki par ler in *raise* bann konsern. Annefe parey i ti dir pli ou gete pli ou war i annan *issues*. Me mon osi letan nou'n get sa Lalwa yer, nou'n war poudir i annan landrwa nou pou bezwen pli tar aranze e amelyor li pou

fer sir ki son *deliverables* i vin enn ki alaoter e ki tou dimoun i kapab satisfè avèk.

Avek sa detrwà mo Mr Speaker, ankor enn fwa mon ti ava demann avèk mon bann koleg Onorab ki dan parti *US* pou zwenn nou e fer fyèr nou Lasanble, pou ki se nou ki pe travay pou fer *public service* ganny sa 10poursan.

Par kont Mr Speaker, i enportan e sa i en lankourazman ki Ladministrasyon *LDS* in donn, in demann avèk Sekter Piblik, zot osi konsidere.

Posibleman zot pa pou kapab donn 10poursan. I annan ki pou kapab donn plis ki 10poursan Mr Speaker. E si sa i leka annou gete ki mannyer nou kapab fer e *over a period of time* pou ki tou dimoun, tou Seselwa i ava benefisye enkli bann zabitan La Digue ki travay avèk Sekter Touris zot osi zot ava santi zot, zot in ganny sa logmantasyon.

E mon sir ki par lefe ki zot menm zot ki'n dir Mr Speaker ki touris in repran La Digue, alors definitivman reveni pe antre. Alors annou partaz en pti pe sa reveni avèk nou zabitan.

Avek sa de mo Mr Speaker, mon le garanti *VP* avèk ou delegasyon, ki mon pou lev mon lanmen tre o.

Unfortunately, mon pa kapab lev 2 lanmen akòz mwan mon krwar ki pep Seselwa i *deserve* son 10poursan.

E letan i apropiye nou ava fer sa ki pli bon dan le fitir. Avek sa de mo mon le remerisi ou Mr Speaker.

MR SPEAKER

Mersi Onorab. Onorab Audrey Vidot.

HON AUDEY VIDOT

Mersi Mr Speaker. Bonzour Mr Speaker, tou Manm Onorab, Vis-Prezidan ek ou delegasyon, zabitan Roche Caiman e tou Manm piblik ki a lekout, bonzour.

Mr Speaker, granmoun i kontan dir "lalang i mars ek voler." Ler Prezidan Faure ti vin avèk logmantasyon 5poursan dan saler, se lamazorite *LDS* ki ti vot kont e dir ki zot oule tou dimoun i ganny parey.

E la, mon rapel tre byen dan sizyenm Lasanble ler Onorab Valmont pou distrik Point Larue, Hon Charles De Commarmond pou distrik Cascade ti fer resorti serten pwen dan zot deba lo size 5poursan ki pou osi tous pou bann Manm Lasanble ti pou benefisye.

E mon rapel tre byen atraver ou Mr Speaker - mon le

dir avek Onorab Georges ler zot manz zot bannann pa anvoy lapo lo nou. Al rod verbatim e nou ava konnen lekel ki koz mansonz dan Lasanble Nasyonal.

Mr Speaker Vis-Prezidan i in vin devan nou Lasanble Nasyonal ozordi, le 12 Avril 2023, e anonse ki son Ladministrasyon in aprouv en nouvo Polisi e striktir saler ki servis piblik ki'n vin met an fors le 1 Avril 2023.

I regretab ki zis sa premye komanter par Vis-Prezidan i montre nou sa mank respe pou bann travayer servis piblik ki zot pe ganny dir zot pou ganny sa logmantasyon 10poursan. Selman mazorite zot pa ni konnen e konpran sa vre nouvo Polisi ek grid saler.

Zot pa ni ankor ni menm ganny sa sans pou zot kapab eklersi kantite dout ek kestyon ki zot annan.

Mr Speaker, pou lenformasyon piblik espesyalman travayer servis piblik, devan nou Lasanble ozordi sa Lalwa parey mon koleg Onorab Cosgrow in fer resorti, i annan en sel bi; promouvwar, donn pouvwar en ladministrasyon dan Gouvernman pou zot kapab fer travay lo saler servis piblik devan nou Lasanble Nasyonal.

Menm si serten Lartik nou Konstitisyon i sofgard byennet travayer Seselwa, me ki garanti drwa saler travayer servis piblik pou byen ganny administre par sa swadizan nouvo Polisi e striktir gouvernans sa ladministrasyon ki la?

E la mon bezwen dir Mr Speaker, ki mon pou dakor avek Onorab Wallace Cosgrow. Ki mannyer nou lo sa kote latab nou kapab met konfyans avek en tel Polisi e striktir ki menm detay napa lo la?

Ki menm dimoun pli enportan ki sipoze ganny touse napa lenformasyon lo la?

Mr Speaker mon annan parfetman rezon ler mon fer rapel sa ladministrasyon ki zot ti ganny elekte avek en manda pou fer pli byen. Zot kontinyelman konfiz pep Seselwa atraver zot bann remark ki zot fer e ki zot kontradwir avek zot bann aksyon ki zot vin avek.

Apré ki zot in senm en pake lagrenn bat latet, met larzan dan pos Seselwa, met plis larzan - olye met plis, zot tir plis.

Olye soulaz sa pep avek sa presyon e kou lavi, zot kontinyelman met plis traka e presyon lo sa pep.

Ki nou'n vwar? Zot in fer monte pri bis. Zot in fer monte kontribisyon e laz pansyon. Zot in fer monte laz Sekirite Sosyal. E dan sa swadizan logmantasyon, selman en pti group ki kontinyelman ganny serten soulazman. Me lamazorite ankor i kontinyelman soufer.

Wi Onorab Uranie atraver ou Mr Speaker, sa logmantasyon dan sa laz Sekirite Sosyal i ti zis en promes ki Gouvernman LDS ti fer dan zot konpany eleksyon.

Sa bann dimoun aze in ganny met lo en *bus stop* kot bis pa pase. Wi Onorab Uranie atraver ou Mr Speaker, ler Seselwa pe ganny demande pou travay dir, fer sakrifis, *leadership* LDS ti byen aranz zot.

Aprè 3an ki Ladministrasyon LDS in fer Seselwa vin vir an ron koman toupri, zot espekte nou lo sa kote latab met konfyans pou donn zot pouvwar pou zot zwe avek bouse manze travayer Seselwa.

Mr Speaker, atraver ou mon le dir avek Onorab Andre avek tou respe ki mon annan pou li, ler i dir koz lo de-politiz saler dan servis piblik.

Ki mannyer i espekte nou lo sa kote latab met konfyans ek son ladministrasyon ki pa

ankor kapab tir politik dan travay?

Yer mon ti vin avek en kestyon, mon ti sit legzanp. Menm si zot pa ti donn mon sans pou fini, mon ler dir zot ankor, Prezidan Larepublik resaman in fer vizit avek son MNA proporsyonnel lo zil Praslin dan lopital pou al fouy dan kabinen, get partou.

Aprè, ki Onorab Gill resaman in anmenn en kestyon zis size pou adres konsern son zabitan lo bann defayans ki'n annan. Eski sa pa apel politik dan travay? Aprè zot ava vin dir ek nou, sant leloz annou travay ansanm? Travay ansanm selman zot kontinyelman fer politik dan travay.

Ler zot kontinyelman viktimiz dimoun aprè zot ava dir nou napa viktimizasyon.

Mr Speaker, devan nou, i kler pouvwar ki Ladministrasyon LDS pe demande, nou lo sa kote latab nou napa sa konfyans avek zot.

Nou, nou pa kont okenn travayer servis piblik ganny en pti mwensa an plis. Nou siport zot o tou moman posib ler loportinite i vini. Me, nou sa kote latab nou pa kapab zis vini lev nou lanmen toultan, ler nou war zot swa zot zwe avek Lalwa, swa zot vin avek Lalwa ki parey en gato ki pa ankor byen kwi

pou vin i pou vin dir ek nou lev nou lanmen e siport zot.

Non, sa nou pa kapab fer pou nou donn zot sa benefis di dout - non, non, non, non. Nou, nou la nou bezwen siport sa bann Seselwa ki ti elekte nou la pou koz pou zot.

Ler Seselwa pa *trust* sa ladministrasyon, e nou, nou pa kapab met *trust* pou nou zwe avek bouse manze travayer servis piblik.

E nou ler nou dir partaze, partaz pou tou dimoun. Ou pa kapab get zis en pti group, zot komans aranz zot premye. Zot aranz servis piblik, me nou pa realize poudir i annan ankor serten group ki ganny kit ater.

Si vre zot ti senser ler zot ti dir donn tou dimoun parey a sa lepok dan sizyenm Lasanble, mon senserman krwar zot ti kapab fer pli byen. Pli byen avek sa bann Lalwa ki zot anmenn devans nou Lasanble pou amande, pou zwe avek, pou brode pou zot zwe avek vant Seselwa.

E mwan mon le met zot byen kler, sa kalite pratik ki zot kontinyelman fer avek pep Seselwa, pa espekte mwan pou kontinyen lev mon lannen nenport kwa pou mwan siport zot! Non, i pa akseptab! Mersi Mr Speaker.

MR SPEAKER

Mersi Onorab. Mon remarke bann Manm pe lev lanmen enn par enn. Mon napa problem ek sa, konpletman byen. Selman mon ti ava zis sizere ki fer sir zot annan o mwen en dimoun dan zot kote ki'n lev lanmen pangar mon bezwen termin deba e mon pa konnen si en dimoun pou al lev lanmen.

Alor nou ava pran en poz la e nou ava rebran deba 11er 05. Mersi.

(BREAK)

MR SPEAKER

Byen, nou'n ariv kot Onorab Wavel Woodcock.

HON WAVEL WOODCOCK

Mersi Mr Speaker. Mr Speaker, dan *speech* ki Minis Finans ti fer pou Bidze 2023, Minis Finans ti anonse ki pou annan en revizyon dan *salary grid*, ki pou annan en nouvo *salary grid* pou Sekter Piblik sa lannen an 2023.

E annefe sa nouvo *salary grid*, sa nouvo *salary table* pou vin an fors apartir e 1 Avril 2023 - sa mwan Mr Speaker. Ki annefe i pe vin an fors an traver sa Lalwa ki la devan nou ozordi.

Mr Speaker, kontrerman ki enn de bann Manm *United Seychelles* in sey fer nou krwar,

annefe pe sey anbet Lepep Seselwa k la deor. Tou travayer servis piblik pou ganny logmantasyon.

Tou *public servant* lo later Sesel, tou *public servant* pou ganny sa logmantasyon 10poursan. Ler mon pe koz *public servant* mon pe fer referans avek lapolis, ners, *teachers*, travayer dan Minister Lasante, Ledikasyon, Imigrasyon, SRC; anba tou bann Minister, Lanvironnman, Lagrikiltir, Lapes, later *you name it*, zot pou ganny sa logmantasyon 10poursan lafen dimwan Avril ki pe vini la.

E kontrerman Mr Speaker avek sa ki *United Seychelles* ti anvi fer anba Ladministrasyon Mr Faure. Sa ki nou Gouvernman pe propoze, sa ki nou Gouvernman dizour i anvi fer Mr Speaker, se pou azout *allowance* ek saler debaz e donn 10poursan lo sa *consolidated allowance* ansanm avek sa *basic salary*.

Zot Mr Speaker, zot ti anvi donn zis 5poursan lo *basic salary* selman Mr Speaker. E nou sa letan dan sizyenm Lasanble nou pa ti dakor avek sa, e mon rapel tre klerman nou ti pou *quash* sa *S.I.* ki ti pou donn zis sa pti logmantasyon 5 poursan lo *basic* ki Prezidan Faure sa letan ti anmenn

Ankour le Lakour Konstitisyonnal ti donn li en gro klak.

Mr Speaker, *minimum* logmantasyon ki en *public servant* pou ganny la i R1000. Ki 750 plis ki sa R250 ki en dimoun lo *minimum wage* ti pou gannyen dan zot letan.

Nou pe donn R1000 ogmantasyon Mr Speaker kontrerman avek sa 250 ki zot ti anvi donner lo saler pli ba.

Me mon pa pe ganny en konpran Mr Speaker, ozordi Lopozisyon i vini pe vin lager kont en logmantasyon ki en Gouvernman pe donn son pep ki zot, zot pa ti kapab donner ler nou pei tou keksoz ti an roz.

Ti napa *COVID*, ti napa kriz ekonomik, zot, zot pa ti kapab donner dan en letan kot tou keksoz ti korek dapre zot. E la nou *despite* tou sa bann *challenge* defi mondyal, kriz ekonomik, nou Gouvernman in vin devan pou donn en logmantasyon 10poursan - non selman lo *basic* Mr Speaker me i pe azout zot saler ansanm e pe donn zot 10poursan lo zot saler.

Mr Speaker, sa nouvo *Public Service Salary Table* parey mon dir in fini vin an fors le 1 Avril. Annefe lemoman ki nou vot an faver sa Lalwa ki devan nou.

E ti annan en sirkiler Mr Speaker - ti annan en sirkiler ki ti pe ganny sirkile ki tonm anba PSO e mwan mon ti'n pran li koman mon responsabilite, mon devwar koman en Manm Lasanble, mon ti *share* li partou dan tou bann group pou bann *public servant* war vwala sa nouvo *salary grid, table* ki pe vini e vwala bann logmantasyon ki zot ti pou gannyen.

E ki'n ganny kouven anba PSO *Public Service Order* ki en ka legal kontrerman avek sa ki Onorab Wallace Cosgrow ti pe dir.

Mr Speaker, sa ki serten Onorab lo lot kote latap pa dir ou, sirtou bann Manm ki pa'n ganny elekte. Kekfwa dimoun pa'n zanmen apros zot pou koz ek zot.

Ou konnen ki pli gro konplent mon gannyen Mr Speaker avek manm piblik, sirtou bann dimoun ki travay dan Sekter Piblik? Se ki ler zot al rod en *loan* zot pa gannyen akoz zot *basic salary* i tro ba.

Loan i baze lo zot *basic salary*. E sa desizyon pou *consolidate allowance* ansanm avek *basic salary* i fer ki zot saler i fer li posib pou zot prezan kapab ganny e *loan* ler zot al kot labank Mr Speaker.

Nou pa ed en frer la deor ler nou pe *consolidate*

allowance ansanm ek saler pou zot ganny en logmantasyon ankor 10poursan?

Mr Speaker, i enportan pou note ki personn pa pe perdi zot dwa aki avek sa *Bill* ki devan Lasanble Nasyonal ler i vin an fors.

Napa personn ki zot saler pou ganny redwir. O kontrer zot saler pe al ganny ogmante. Parey mon'n dir zis pou donn en legzanp, en dimoun ki ler ou'n *consolidate*, ou'n azout son *allowance* ansanm avek son saler ki tonm R10mil Mr Speaker, i pou ganny li R1000 logmantasyon.

En dimoun ki ler ou'n azout son *allowance* ek son *basic salary* i tonm R12mil Mr Speaker, i pou ganny li en logmantasyon R1200 Mr Speaker.

En dimoun ki ganny, ek sa nouvo konsolidasyon son *salary* avek son *allowance* i ariv R15mil i pou ganny en logmantasyon R1500 Mr Speaker.

O kontrer avek sa ki *United Seychelles* ti propoze, sa 5poursan lo *basic*. Savedir si en dimoun li son *basic*, son saler debaz ti selman R7mil e son *allowance* i R3mil Mr Speaker, anba propozisyon ki *US* li ti fer ler tou keksoz ti an roz. I ti pou ganny li selman 5poursan lo

R7mil savedir i ti pou ganny li selman R350 Mr Speaker.

E nou, nou pa ti dakor ek sa nou krwar ki nou ti merit donn plis ki sa. E ozordi sa menm dimoun ki son *basic salary* i R7mil e son *allowance* i R3mil, ou pran 7mil ou azout ek 3mil i vin 10mil, prezan i pou ganny li R1000 Mr Speaker.

E menm si en dimoun ou'n azout son *allowance* ek son saler debaz, i tonm pli ba ki R9mil savedir i pa ti pou kalifye pou li ganny, i lo 10poursan i pa ti pou ariv R1000, *still* nou Gouvernman i dir non. Menm si ler ou'n azout son saler ek son *basic salary* ansanm i tonm anba 9mil, *still* nou pou donn li en *minimum* R1000 Mr Speaker. Ki pli bon ki sa?

United Seychelles pa ti kapab fer sa. E ozordi zot pe vin lager kont en logmantasyon ki nou pe donn ou frer ek ser dan Sekter Piblik Mr Speaker? Mr Speaker dan mon lopinyon sa i fer onte.

Annou pran legzanp en fanmir Mr Speaker, *let's say* dan en fanmir i annan 4 dimoun ki travay dan en fanmir, dan Gouvernman. Savedir zot *take home* lafen diwan zot logmantasyon dan sa *household* zot *combines income* logmantasyon dan *household* i

anviron R4mil logmantasyon Mr Speaker.

Dan plas R1000 ki ti pou R250 sakenn Mr Speaker si zot ti lo *basic salary*. Annou mazine en *household* ki annan en fanmir 3 dimoun i pe anmenn li 3mil kot lakaz.

En msye ek en madanm pe anmenn li en R2mil *extra* kot lakaz. en fanmir 4 i pe anmenn li R4mil *extra* kot lakaz. Eski i pa keksoz Mr Speaker?

Despite, depi 2020, 2021, 2022 Mr Speaker nou'n dan defisit. Lannen pase nou'n dan defisit. Ti en pe plis mwens ki bann lannen en oparavan par lefe ki lekonomi in refer en pe.

Nou ti ganny nou 320mil touris ki ti debark Sesel. Mon krwar ti 2 ou 3 poursan defisit. Sa lannen nou pe *forecast* en sirplis. *Still*, Mr Speaker nou'n pran kont nou sitwayen ki la deor par donn zot en pi logmantasyon. La mon pe fer referans avek nou bann frer ek ser ki travay dan Sekter Piblik.

Mr Speaker, *despite* tou difikilte, kriz lasante, kriz ekonomik, kof vid ki nou Gouvernman ti erite. Tou sa bann manboulouk *FA4JR*, bann labi, bann vol, bann *mismanagement* larzan dan lepase ki menm la zisteman resaman Oditer Zeneral in vin devan e in dir kot tou Seselwa

in tande, zanmen dan listwar Sesel larzan Leta in ganny zere dan en fason sitan byen Mr Speaker!

Rapor Oditer Zeneral, en *statement* ki Auditor General ti fer ki zanmen dan nou listwar nou larzan kof Leta in ganny *manage* sitan byen! Ki nou pa'n war sa bann labi e gaspiyaz ki ti arive anba Gouvernman presedan Mr Speaker.

I annan en bann in koz lo bann biznes. Mon pa pou zanmen bliy dan - *in fact* dan deba dan ler Minis ti prezant Bidze pou sa lannen i annan bann Manm ki ti koze zafer fodre enpoz lo biznes, fodre fer biznes osi pey sa 10poursan.

Mr Speaker, ennler mon krwar nou le tro tir dile avek, ou konnen nou'n telman, *despite* lefe ki bann biznes in *struggle* pandan lan edmi nou'n ater, *airport* ti'n fermen. En kantite biznes ti'n fermen.

Car hire lo Praslin, La Digue, bann lotel, *tourism* ti ater net. Dimoun ti pe *struggle* Mr Speaker. La koman bann biznes pe *recover*, sirtou bann *SMEs*, Mr Speaker ki nou le fer la? Nou le prezan al detri sa bann biznes ki pe pey *tax* pou Gouvernman pou ed nou kapab *run* nou pei.

San pran konsiderasyon poudir nou bezwen donn letan

bann biznes Sesel pou *recover*. Pou refer ki nou kapab benefisye avek *tax* ki zot peye ki atraver sa *tax* ki ozordi nou pe osi ede pou donn sa logmantasyon bann *public servant* Mr Speaker.

Eski nou anvi detri bann *small and medium enterprises* Mr Speaker? Gouvernman pa kapab zis vini *right now* apre ki bann biznes in *struggle*, bann biznes i ganny tape zis vini enpoz lo zot, donn en logmantasyon 10poursan la deswit la? San donn zot sa letan pou zot *recover*, refer? Mr Speaker be nou pou en Gouvernman iresponsab.

Me *despite* tou keksoz Mr Speaker, nou bezwen komans en landrwa. E landrwa ki nou pe komanse, nou pe komans li dan Sekter Piblik e i annan plizyer bann keksoz, desizyon ki nou Gouvernman in pran pou sey soulaz sa pep. An mezir nou aler, fir an mezir keksoz i amelyore i pou *trickle down* lo tou larestan nou popilasyon Mr Speaker.

Nou'n fer plizyer keksoz ziska aprezan despite sa bann *challenge*. Nou'n *revise* bann *weights ASP*. Ozordi nou'n donn en rediksyon - *PUC* in donn en rediksyon lo elektrisite 42poursan an Zanvyé. La 49poursan par *unit* an Avril.

Mr Speaker, nou deza pe fer bann keksoz pou nou sey ed sa pep *despite* lefe ki nou pei, ki lemonn antye globalman tou pei pe fer fas avek en kriz ekonomik e nou ankor pe refer apre pandemik *COVID-19*.

I annan en Onorab Mr Speaker - annefe atraver ou Onorab Uranie in dir ki sa *salary review* in vin an fors - *well* mon bezwen dir in dir poudir nou an retar. Nou pa pe gard nou parol. Se pa ki prezan ki sa Lalwa pe vini, nou ti promet ki lafen dimwan, nou ti promet ki an Avril nou pou donn sa logmantasyon 10poursan. Sepa la le 12, Seselwa pa ankor benefisye avek sa 10poursan.

Be mon bezwen demann mon lekor kestyon, be normalman kan dimoun i ganny peye, le 12?

Mr Speaker Lepep Seselwa tou dimoun i ganny peye semenn le 20 lafen dimwan. Sa Lalwa i pou vin an fors, sa nouvo *salary grid* i vin an fors le 1 Avril, ki *mean* ki i lafen dimwan Avril tou travayer an Sekter Piblik pe al zot sa logmantasyon 10poursan.

En promet se en det e nou pe gard sa promes. E sa promes nou pe gard li atraver sa *Bill* ki devan nou ozordi. E mon *challenge* zot pou zot vot pou sa

Bill Mr Speaker, pou ki tou Seselwa i kapab ganny sa 10poursan.

Me nou tou nou konnen Mr Speaker ki zot pa pou lev zot lanmen prey labitid, akoz zot zis bloke. Obzekte tou keksoz menm si i pou benefisye nou frer ek ser Seselwa ki la deor Mr Speaker.

Mr Speaker, dan ladres Bidze sa menm Onorab ki sorti La Digue i ti dir en parol vreman enteresan. E la ozordi mon war li in tourn lo son parol. I ti dir "tou biznes fodre peye! Tou biznes La Digue fodre pey sa 10poursan zot osi! Enpoz lo bann biznes La Digue pey 10poursan!"

La ozordi i vini i sanz *tune*. I vin avek en *tune* konfize Mr Speaker. En bann biznes peye, en bann biznes pa peye. Be pran ou en desizyon. Mr Speaker!

I annan en bann in vini in dir koumsa *ok*, parastatal, paraetatik *ok*. Konmsi enpoz lo parastatal ek paraetatik osi pou pey, pou osi donn sa 10poursan deswit la konmela menm.

Me zot pa realize poudir bann dimoun ki vot pou Bidze tou le lannen *Consolidated Fund*, bann parastatal pa depan lo Bidze Gouvernman. Zot *generate* zot prop reveni, zot prop *income*, zot annan zot prop

Board, at the end of the year zot pey en *dividend* Gouvernman.

E annou pa bliye osi poudir sa defet ki bokou sa bann, nou bann parastatal, lakonpanyen paraetatik in pas ladan Mr Speaker.

Zis pou donn e legzanp, *Air Seychelles* Mr Speaker. Si pa Gouvernman *bail Air Seychelles out, Air Seychelles* ti pou'n fermen! Tou travayer, presi lanmwatye si pa plis travayer ti pou'n ganny met deor!

Me atraver bon desizyon nou Gouvernman pou negosye det *Air Seychelles*, pou redwir li par R50milyon, pey en poursantaz sa det si mon pa tronpe en R27milyon - *VP* i ava koriz mwan. \$27milyon, *VP* i ava koriz mwan. *Air Seychelles* pa ti pou debout lo son lipye ozordi. Nou ti'n kapab perdi tou Mr Speaker.

E ozordi *Air Seychelles* pe komans fer profi. E anmezir ki nou bann parastatal pe rekipere, reveni pe antre, larzan pe antre, zot kapab prezan ede e asiste zot bann travayer avek en logmantasyon.

Ou pa kapab zis vini enpoz sa lo zot akoz i depan lo zot reveni ki sa bann parastatal pe anmase. Ou pa kapab zis vini donn en lord zis fer sa. Ou le detri bann pti biznes Sesel,

ou le detri nou bann parastatal?

Nou, Gouvernman larzan ki nou anmase, nou anmas atraver *tax*, ki nou takse en bann biznes. Atraver *dividend* ki nou anmase avek sa bann parastatal. Sa logmantasyon ki nou pou donner se gras a Sekter Prive Mr Speaker. Prezan nou pou al trangle zot nou pou al touy zot? Iresponsab Mr Speaker!

Ou konpran, ennler sa bann largiman ki lot kote latap i avanse - sa bann largiman ki olye ed nou pei, ou ava krwar zot anvi nou plonz nou pei pli dan fon.

Mr Speaker mon bezwen dir. Onorab Conrad in vin ek en *conspiracy theory* sa ki'n arive yer nou ti anvi sepa Onorab *Leader* Lopoziyon pa la, pou koz lo sa.

Be kantmenm i la, pa la, sa ki ti mon pou dir pa ti pou fer okenn sans Mr Speaker! E Mr Speaker le rezon ki i pa la Mr Speaker i senp. E yer dan pe parwaze Beau Vallon mon'n pad laboutik detrwa dimoun i aret mon pe koz avek mwan, me zot dir mon Mr Speaker zot dezapwente.

Zanmen nou'n deza ganny en *Leader* Lopoziyon Sesel ki sitan malelve parey Onorab *Leader* Lopoziyon Mr

Speaker! E se sa rezon ki in ganny met deor. Se son lafot, pa lafot personn!

Mr Speaker, mon pa ganny en konpran ki mannyer en parti i kapab lager kont en ogmantasyon saler pou son frer ek ser ki la deor. Mon pa ganny en konpran Mr Speaker - lipokrizi dan tou son slander!

Mr Speaker, pou konklir mon bezwen fer sorti sa pou koriz en *misapprehension* ki Onorab Audrey Vidot in fer resorti boner, atraver ler i ti pe fer son entervansyon. In koz lo politik dan travay. Annefe depi yer nou pe koz lo tir politik dan travay. E nou tou nou konnen poudir vre ti annan en pe *issue* Lopital Baie Ste Ann Praslin.

E mon rapel dan sizyenm Lasanble mon ti anmenn en Mosyon dan sizyenm Lasanble pou demann Gouvernman avan, pou fer en demars pou elev standar nivo Lopital Baie Ste Anne, met bann fasilite neser, sanz bann *issue*, sanz bann keksoz ki ti bezwen ganny sanze dan sa lopital ki ti'n apre 26an ti ankor la, ki ti neserit fer serten travay renovasyon lo la.

E *despite COVID, despite* tou sa *challenge* ki nou pei in fer fas avek, nou'n depans plis ki R2milyon lo *maintenance* lo Lopital Baie Ste Anne.

E annefe depi 26an in koz lo kabinen, sa bann kabinen pa'n ganny sanze, *ceiling fan* problem. E Onorab Porice Mr Speaker in komans tap en pe laport. Mon rapel nou'n koze nou de. In tap laport plizyer biznes lo Praslin. E enn de sa bann biznesmenn ti la. In tap laport Mr Prezidan Wavel Ramkalawan.

In tap laport plizyer bann biznes lo Praslin pou ede ranplas enn de sa bann keksoz dan sa lopital, akoz nou pe dir nou bezwen ankouraz bann biznes, bann dimoun deor pou vin devan pou donn en soutyen.

E dimoun in vin devan enkli Prezidan Larepublik in vin devan pou donn en koudmen. Enkli Mr Flavien Etheve mon ti war li la pou li vin donn en koudmen. Lezot biznes in vin donn en koudmen. Be dir gran mersi Onorab Porice in tap en laport. Be Onorab Churchill Gill kot ti ete? Akoz i pa tap laport pou li donn en sipor Lopital Baie Ste Anne li osi?

E annefe Mr Speaker, i pa ni ti dan pei, i ti antre Dimans 2er bomaten. Vizit ki Onorab Porice ti fer lopital ti Sanmdi. I ti pou anvoy son nanm Lopital Baie Ste Anne Mr Speaker?

(laughter)

HON WAVEL WOODCOCK

Mr Speaker ou konpran, sa i montre ou ipokrizi dan tou son splander Mr Speaker. Mwan mon donn en, mon aplodi Onorab Porice pou sa ki in fer. Kantmenm i pa en Manm Elekte, me selman i pe fer son bout zis parey i ti fer kot *fitness trail* Marie-Jeanne Baie Ste Anne Mr Speaker.

Mr Speaker nou bezwen, nou bezwen aret gele. Nou bezwen aret konplent. Nou bezwen aret zis opoz tou keksoz Mr Speaker. Ozordi nou Gouvernman pe fer keksoz ki byen pou sa pep deor la. Nou pe ed nou frer ek nou ser pou anmenn en pti bouse manze an plis se li Mr Speaker, ozordi nou vin lager kont sa *Bill*?

Fer lapenn Mr Speaker. Mon dezapwente. E mon pli gro dezapwentman i al avek bann Manm Elekte ki annan en distrik. Ki mannyer zot pou al pou al eksplik sa avek bann *public servant* ki dan zot distrik ki'n elekte zot?

Avek sa de mon Mr Speaker mwan Onorab Woodcock Manm elekte pou Grand Anse Praslin mon pou siport sa *Bill*. Mersi.

MR SPEAKER

Mersi Onorab. Laparol pou Onorab Gervais Henrie.

HON GERVAIS HENRIE

Mersi ...

MR SPEAKER

Wi, ale en moman. Onorab Lemiel ki *point of order*?

HON SYLVANNE LEMIEL

Mersi Mr Speaker. Mon le klersi en keksoz ki'n arive dan Lasanble ozordi. (Onorab Woodcock, ou riye wi ou met ou lanmen lo labous. Akoz ou konnen ki ou'n fer)

MR SPEAKER

Onorab-Onorab ou pe adres Speaker. Si ou laparol ou adres Speaker.

HON SYLVANNE LEMIEL

Atraver ou Mr Speaker Onorab Woodcock ki konnen ki in fer, akoz i pe riye lanmen lo labous.

In nonm *LOTO*, ou'n pini *LOTO* en fwa ou'n ekrir li ou'n dir li asiz se li ozordi, i napa drwa met son lipye lo *premises*, in ganny '*named*'. *LOTO* i kot li. Eski *LOTO* i size sa *Bill* devan nou ozordi? Pou ki rezon ki Onorab Woodcock in bezwen nonm *LOTO* i malelve?

Be size *LOTO* pa sipoze la. In dir ou konportman *LOTO*, Speaker, Minis, Prezidan pa merit ganny *debated* dan Lasanble. Mon pa krwar i ti

merit pe nonm *LOTO* dan son bann keksoz ki i pe dir, ki i pe fer. I mal sa!

E ou pa'n aret li, ou'n les li ale! Mersi.

MR SPEAKER

Onorab mon pa konsidere ki Onorab Woodcock in fer okenn naryen mal dan nonm *LOTO*. Terminen silvouple.

HON EGBERT AGLAE

(Off-Mic)

MR SPEAKER

Ale ki i annan dan 59(5) Onorab?

HON EGBERT AGLAE

Mr Speaker 59 (5) i fer resorti, i dir ou *the conduct* ki Onorab Woodcock in koz lo la in dir ki *LOTO* i malelve, savedir i pe koz lo *the conduct*.

‘The conduct of the President, Vice-President, Speaker, Deputy Speaker, Leader of the Opposition, Leader of Government Business, Members or Judges Superior to Court, Magistrate and all constitutional appointees and their families shall not be referred to except upon a Motion’. Motion i lo *public salary*.

Napa en Mosyon ki pe dil ek *conduct LOTO* la. So, sa ki li

on dir Onorab Woodcock i bezwen *retract* sa. Annou swiv *Standing Orders*. Nou annan *Chairperson Standing Orders* la ozordi. Parey zot anvi *amend Standing orders apply* li. Mersi.

(APPLAUSE)

MR SPEAKER

Mersi. Mon a fer remarke, mon a fer remarke ki i annan souvandfwa Manm in lans lakizasyon ver kanmarad ki annan de ler mon sey korize.

Me i annan en kantite fwa ki i annan telman ki mon pa antren aköz i pou enteronp deba. Mon pa pou fer okenn *ruling* lo okenn *point of order* la. Nou a kontinyen. Onorab Gervais Henrie ou annan laparol.

HON GERVAIS HENRIE

Mersi Mr Speaker. Bonzour tou dimoun partikilyerman bann dimoun Mont Buxton ki pe ekout nou. E sirtou si zot pe travay dan servis piblik.

Dabor mon ti ava remerisi zot pou travay ki zot fer. Sekter Piblik i en sekter tre enportan, parski se li ki masin sa 3 brans Gouvernman. E i permet annan bann servis, bann lenfrastriktir ki dan pei, se servis piblik ki fer sa.

E mon konnen poudir resaman servis piblik in anba en pe presyon, anba en pe kritik, e en pe sa in sorti kot nou Lasanble. E alor mon anvi reasir bann *public servant* poudir nou fer sa dan tou bonn fwa.

Akoz nouvo ladministrasyon i le vreman akseler sa demars pou ki Sesel koman en Pti Leta Zil ki form parti kominote Nasyon, son Sekter Servis Piblik i modernize, son standar i eleve.

E Mr Speaker, sa traze in komanse depi lontan sa. Byen, byen lontan. E si nou rapel byen apre reform ekonomik 2008, dezyenm e reform pli enportan, sete reform anonse an Septanm 2009 dan Sekter Piblik.

E en kantite keksoz ki nou'n koz lo la depi bomaten ti'n devret arive i annan 14an dizi. I ti annan en plan tre anbisyè. Me malerezman pa tou sa ki'n ganny egzekite.

E mwan mon ti ava espekte e petet lans en lapel avek mon bann koleg Onorab, pou nou zisteman koman bann dirizan dan kominote elev nou deba lo sa nivo, pou permet Egzekitiv reflesi lo kalite servis piblik nou anvi e ede mobiliz lopinyon piblik ver sa transformasyon ki nou le vizavi

nou servis piblik. Donk, nou annan en responsabilite ozordi pou nou fer sa.

E Mr Speaker, donk mwan ler letan mon regard sa Prozedlwa ki devan nou, mon vwar li koman en lot letap dan sa reform striktirel dan Sekter Piblik ki nou bezwen fer koman en pei.

Parey mon dir i en traze ki'n komanse depi an 2009. E i annan plizyer pei Kenya par egzamp, pei kot Sirleaf, Mrs Sirleaf ti Prezidan, Sierra Leone? *Liberia*.

Liberia, tousala i bann pei kot plizyer bann Lorganizasyon Enternasyonal in ankouraz zot e motiv zot pou pran sa bann desizyon. E letan mon pe nonm bann lorganizasyon enternasyonal i annan bann ki nou pe travay avek toulezour; *IMF*, *World Bank*, *Commonwealth*, menm serten Lorganizasyon Nasyon-z-Ini. I rekomande ki zot fer sa bann reform parey. Donk i bann bon lentansyon.

Si nou asize nou kalkil li byen. I bann bon lentansyon me ki malerezman i pou pran nou en pe letan pou konvenk dimoun pou vwar son lobzektif kler pou konpran semen kot nou le pase. Me ki nou bezwen pran bann desizyon menm si i

difisil pou pa kit zenerasyon fitir avek serten *worry*.

Parey mon dir 2009 Gouvernman Prezidan Michel e ansyen Prezidan Faure ki ti Minis pou *Public Administration* sa letan ki ti anonse sa bann mezir.

Me malerezman ladministrasyon avan in tap sa boul pli lwen e la prezan setyenm Lasanble ki pe bezwen dil avek. Akoz si nou pe kalkile 2009 sete katriyenm Lasanble e la ozordi nou 3 Lasanble pli tar.

So, zot pe konpran ki manner nou bezwen sezi. Nou bezwen fer sa ki nou bezwen fer ozordi. E lekel sa bann prensip e konsep ki nou pe koz lo la Mr Speaker?

Nou bezwen parey Onorab Zialor bomaten dan son prezantasyon in dir, nou bezwen en servis piblik ki en pe pli pti. Me ki asire ki servis piblik i servi son bann resours dan e fason efikas. Nou ogmant nivo responsabilite sak sa bann travayer servis piblik, felisit zot kot i byen, ankouraz zot pou koriz sa ki mal.

Me zot bezwen osi konpran poudir bann rezilta ki nou bezwen se en servis piblik ki efikas, ki transparan, ki prodiktiv.

E enn bann mezir ki pe ganny pran zisteman ki mwan

mon vwar dan sa *Bill*, en lobzektif kler se de-politiz size saler. Mon ava repet sa, de-politiz size saler. Akoz souvan annou mazin byen, saler i vin en kestyon politik popilis. En kote i dir mon pou donn plis, an krwayan pou ki travayer i donn mwan sipor politik. Lot kote i zwe pli bon boug, i dir pa ase.

Eski nou pe kontinyen fer saler vin en size foutbol politik? Mwan personnelman mon pa anvi. Me solman letan mon get sa size saler servis piblik, Mr Speaker mon war li parey en dinanmit - en dinanmit, en keksoz ki kapab eksploze swa lo en nivo ekonomik, ouswa lo en nivo politik. I kapab politik, i kapab kout en Gouvernman en eleksyon.

Me solman mwan mon enterese avek lavenir. Akoz mwan mon'n nabou viv omwen ziska 50an. Me mon fir ki bokou pli zenn ki mwan, mon anvi war li viv dan en Sesel, kot li osi byen parey ozordi e ki nou pa kit zenerasyon fitir mon repete avek bann problem striktirel, ki nou ti kapab rezourd ozordi koman bann dirizan ki pare pou pran bann desizyon brav, malgre i difisil.

Alor ler nou pe koz de-politiz size saler Mr Speaker, logmantasyon saler pou mwan i bezwen pirman en size teknik,

akademik, syantifik si ou le apel li. Kot en group teknisyen i zwenn ansanm e zot *advise* Gouvernman, zot konsey Gouvernman, lo akoz tel ou tel lannen nou kapab abzorb en logmantasyon saler dan Bidze. Vwala pou tel rezon nou kapab donn sa kantite, ou pa donn ditou. Me byen ganny *advise*.

E ki sa Gouvernman mon apresye ki pe pran sa direksyon. Parski *LDS* i le annan konfyans dan bann teknisyen. Letan mon get lo latab la devan, i bann dimoun ki Leta in investir dan zot letid e bann konsey, e bann Seselwa talante ki nou bezwen *trust*. Nou bezwen *trust* zot.

Nou pa kapab zis kit li pou en group politisyen ki si i santi i pe perdi sipor alor i deside ogmant saler. Nou bezwen retir politik dan size saler Mr Speaker. E ozordi, ozordi mon'n dir ki sa size saler i kapab en dinanmit, en keksoz ki kapab eksploze en, lo nivo swa ekonomik ouswa politik.

Annou get Bidze 2023, nou vwar poudir nou'n aprouv en *Appropriation Bill* R10.7bilyon. Dan sa R10.7bilyon, 3.44bilyon i pe al pou reminerasyon avek saler dan servis piblik. Ki ekivalan 11.3poursan nou *GDP* ouswa dir prodwi domestik brit,

konpare avek sa sonm i annan en logmantasyon baze lo sif ki ti ganny aprouve an 202,2 ouswa i 428.3milyon ouswa 14poursan plis ki 2022.

Ou vwar nou koman en Lasanble, nou pe koz si sa zafer saler i retire dan Lalwa nou pou napa *oversight*. *I respectfully disagree*.

Akoz sa sif ki mon'n mansyonnen, nou ti'n aprouve. E dan Staz Komite Bidze nou kapab dir poudir swa i tro pti gin, swa i tro bokou, nou *still* annan en kontrol lo la. E nou merit pe fer nou travay *oversight* dan sa fason Mr Speaker.

Me an menm tan letan mon dir i en dinanmit swa ekonomik swa politik, nou bezwen konsernen nou koman setyenm Lasanble. Parske annou regard en pe ki mannyer sa larzan i vini, sa 10.7bilyon?

Nou vwar poudir ozordi i annan 35mil944 dimoun dan Sekter Prive ouswa ki reprezant 66.2poursan nou popilasyon travayer. I pli gran group li. Solman ozordi bomaten nou pa pe koz lo logmantasyon saler pou li. Solman li i pou finans sa 10poursan logmantasyon dayer ki ti anonse dan Bidze, vwala en fe ki nou pe baz sa lo la dan Bidze.

Paraetatik i annan 8mil33 travayer ouswa i reprezant 14.8poursan. Nou pe dir wi zot Bidze pa vi devan Lasanble Nasyonal. Me mwan mon enn bann Manm, zot ava tann mwan tanzantan koz lo la yer mon demann *VP* kestyon pou kestyon nou met en lord dan Sekter *SOEs*, i bezwen osi zot annan zot *salary grid*. Kot nou kapab met en lord e nou pa les *SOEs* ale koumsa konmsi *Wild West*.

Now, prezan li dan Sekter Gouvernman i annan 10mil321 travayer ki reprezant 19poursan nou Sekter Travayer. Me li i kontinyelman ganny logmantasyon. Alor dan sa deba ozordi, tou sa bann size pou mwan koman Manm Lasanble nou ti merit pe regarde ki mannyer nou kontinyen siport Sekter Servis Piblik an term saler ek bann *allowances*, pou fer sir i soutenab.

De ou trwa semenn pase nou ti pe koz lo soutenabilite Fon Pansyon. Soutenabilite saler travayer servis piblik i osi en size ki nou bezwen trakase. I en tyer nou Bidze Nasyonal. *We have to be worried about it!*

Akoz nou bezwen *worried about it*? Akoz ler nou get koleksyon reveni dan pei Mr Speaker. Ozordi sa ki'n

prozekte dan Bidze 2023 R9.2bilyon ki pou kolekte an term *tax*. I annan en kantite *tax*, i annan apepre 11 kalite *tax*. Zis *tax* lo *personal income tax* i 1.2billion.

Ankor dan 4an sa sif i pou egal *social security*. So, zot konpran ki mon pe dir? Nou annan en kantite keksoz ki nou bezwen trakase lo la e i normal alor ki Gouvernman ozordi in vini in dir ek nou koman parti sa traze reform striktirel dan Sekter Piblik, nou bezwen osi kalkil kestyon saler.

Ki mannyer nou pou zer li? Ki mannyer nou pou deside donn logmantasyon ou non? E mwan letan mon war sa de-politizasyon kot nou ava met sa dan lanmen en Komite, en Komisyon ki endepandan, profesyonnel, bann teknisyen ki ava vin avek bann fe ki zot ava kapab defann. Se sa kalite transformasyon ki mon oule pou Sesel.

E Mr Speaker, mwan mon ti ava kontan ki nou koman en Lasanble vwala bann pwen ki nou ti ava met avek *panel*. Pou dir letan zot sorti la kontinyelman reflesir lo la.

Zisteman, dan *setting up of an independent Committee, Commission whatever you want to call it*, pou regard lo sa size saler.

Eski saler dezormen dan Sekter Piblik i bezwen ganny *cap*? Eski i bezwen ganny *cap*? I en kestyon ki nou bezwen demande. E prezan li si sa dimoun i santi poudir demen mwan mon anvi plis, mon pa anvi ganny sa kalite saler ki zot in met en *ceiling* ki mon pa kapab sote, mon ava al dan prive.

Gouvernman pa oblize anploy ou. Anfet sa ti ganny dir par ansyen *Chief Secretary* pou *Public Administration* isi dan sa Lasanble. Gouvernman pa oblize, pa forse anploy ou.

Mr Speaker, ki rol Linyon Travayer dan nou pei ozordi? Enn bann keksoz ki atriste mwan se retisans travayer Seselwa pou organiz li. Pou ki li i annan en lavwa pou li kapab koz avek son anplwayer (son anplaye?) son anplayer enkli Gouvernman pou kapab negosye son saler.

Parti lot kote laba zot annan en Linyon Travayer zot. Akoz zot pa ti *request* pou ki zot *Trade Union* i ganny *empower* pou fer sa kalite negosyasyon avek Gouvernman lo par travayer ki zot le koz lo la. *We cannot leave them out in this debate.* Tousala i bann refleksyon ki nou, nou bezwen fer.

Mr Speaker, ki kalite lenterval nou donn logmantasyon saler dan servis piblik? Ozordi Lalwa ki nou pe amande i dir 5an. Eski 5an i tro bokou? Eski 5an i tro pti gin? Sa i kalite refleksyon ki nou bezwen fer koman en Lasanble Nasyonal.

Ki bann fakter ki nou pou konsidere ler nou pou donn logmantasyon saler? *Cost of living*, detrwa dimoun i apel li lenflasyon. Ki bann eleman ki nou regarde? Sa i bann kalite refleksyon ki nou bezwen anvoy nou *panel* dan lakour avek, ouswa dan zot biro.

Size promosyon dan Gouvernman. Pou nou kapab *retain the best talents* ki annan dan Sesel. Parske ozordi bokou dimoun i kapab ganny dekouraze avek sa. Ki kalite promosyon ki nou pou donn nou bann travayer? Ki mannyer nou fer saler dan servis piblik vin konpetitiv ki nou ganny *the best talent* e ki nou kapab compete avek Sekter Prive? Ki mannyer nou fer sa? Sa i kalite refleksyon ki nou merit pe anvoy *panel* avek dan biro.

Ki loportinite *training*? Promosyon mon'n mansyonnen. Ouswa kreasyon ankor nouvo lanplwa. I bann refleksyon ki nou merit pe fer. E anfet dan sa reform ki mon'n dir

dwatet komanse dan Sesel depi 2008 e in aksele 2009, nou konnen poudir ti merit annan serten louvraz ki ti'n merit disparet dan Gouvernman akoz Gouvernman ti'n merit *slim down*.

E ankor koman en pei ou a krwar nou'n zis *park* sa konversasyon. Akoz sak fwa letan en eleksyon in vini nou'n bezwen restak *public service* avek travayer ki probableman nou pa ti bezwen.

E anfet nou pe fer tou sa bann letour. Enn bann keksoz ki annan a nou dispozisyon koman en Lasanble serye, nou ti'n kapab demande ki nou, nou kre en Komite pou fer en lanket dan zafer Sekter Piblik pou etidye diferan keksoz.

Kondisyon travay, kote ki annan Kontra, saler. E fer en rapor prezant ek Gouvernman avek bann rekomandasyon serye. Nou pa fer apre nou konplent. Nou zwe politik avek.

Setyenm Lasanble i bezwen elev bar. E mwan mon pe envit nou koman en Lasanble pou nou fer en refleksyon ansanm.

Mr Speaker toultan mon dir, i annan bann size ki nou bezwen oubliy *the political divide between* nou e regard ansanm ki nou le pou Sesel e Seselwa.

Parski sa zafer size saler si nou pa sezi li, i en dinanmit ki pou eksploze ekonomikman ouswa politikman, pou nou koman en pei. Nou, nou'n kapab ale, me mon pa anvi kit Sesel avek mon zanfan dan en degenn ki mwan mon pa ti pou anvi viv ladan.

Alor mon pe enplor nou tou pou reflesir. E ou, ou osi dan lakour ki pe ekoute. Reflesir lo sa size akoz i konsern ou. Ou manmi, ou papa, ou vwazen, en dimoun ou konnen i travay dan servis piblik.

E alor Mr Speaker, nou pa pou kapab zis fini la. I annan bann lezot reform ki nou osi bezwen gete. Kestyon saler bann pozisyon konstitisyonnal.

Prezidan dan Leta Lanasyon enn bann size ki i koz lo la se *quality of leadership*. Si nou le *the best* nou bezwen pey zot selon sa. *The worry* ki nou, nou sa, mon pa konnen. Mwan yer swar a size ki devan mwan la in gard mwan ganny sonmey tar.

Akoz mon war mwan poudir dan nou Bidze si nou get bann sif nou dwatet pe war *the warning* poudir Sesel *as a small* - mon zanmi, bon zanmi Sid Afrik i apel nou '*the village in the sea*' - pa pou kapab soutenir li.

Nou en pti Nasyon ki pe, nou parey en zanfan ki pe bezwen dil avek bann konplikasyon medikal en adilt. *It is worrying. So SOEs the next reform.* E nou koman Lasanble *we have to show leadership* lo tou sa bann size. Alor mon war sa Prozedlwa ki devan nou - mon ava termin lo la Mr Speaker - i osi senp. I osi senp kot in retir tou referans *public servant* dan sa Lalwa pou ki *the Government of the day* ozordi i LDS, ankor dan 35an i kapab US. Kot li i pe demann pouvwar administrativ pou zer son Sekter Travayer. Akoz i en anlwaye li.

Parey prive ozordi nou pa demann *salary grid* pou prive li. Ler ou vin travay dan Gouvernman li i donn ou son Kontra. *Terms of condition* i dir ou, ou pe vin koman en PS mon pou pey ou *at that level*. Apre ou ava ganny tel ou tel *allowance*.

Ou si ou anvi pran ou ava pran. Si ou pa anvi ou ava al rod en *better deal*. Gouvernman *is entitled to do this*. Zis parey nenport ki dimoun ki anploy dimoun. Akoz nou pe dir sa?

E lot parti lot kote i konnen sa zot. Akoz ler nou, nou ti dir zot nou pa pou aprouv sa 5poursan logmantasyon, kan lekonomi ti bon zot ti kapab

donn plis, rikord *tourism* ti 340mil, zot ti kapab donn plis, zot ti trouv en fason pou servi en zouti administrativ pou entrodwir *supplementary allowance*, ki nou koman Manm Lasanble nou pa gannyen. Zot rapel? E zot ti anmenn nou Ankour *over sa!*

E nou ozordi selman 2an apre COVID. Zot rapel zanvye 2021 ki sityasyon nou pei ti ladan? Saler nou ti pres pa konnen mannyer pou peye. E se pou sa rezon ki ziska ozordi mon remersi Bondye sa pei pa'n koule anba LDS e i pa pou koule.

2an pli tar Mr Speaker nou anmenn en logmantasyon kot nou pe dir avek dimoun, zot pou ganny *10percent increase*. E *10percent* ou konnen ki i vedir Mr Speaker?

Ozordi, (kote mon'n ekrir sa?) Letan en dimoun ki ganny li R5mil – vwala - saler pli ba an Gouvernman ozordi i R5mil485 e avek propozisyon ki devan nou saler pli ba pou monte pou vin R7mil343. Ki sa i vedir?

Pou Onorab Manm Elekte pou Zil Pros Mr Speaker, i vedir en logmantasyon R1858. I plis ki R1000. I plis menm si nou'n dir *the minimum* ki nou pou gannyen i R1000. *So, you see on minimum wage.*

Me selman sa ki i vedir, i pou deklans en - prive pa krwar poudir zot pa pe obzerve ki pe arive. Zot pou ankouraze zot travayer, zot pou donnen en pti logmantasyon parske Gouvernman in donn zot lespas, in donn zot lespas.

(murmurings off-mic)

MR SPEAKER

Onorab, mon a les Onorab Henrie prosede.

HON GERVAIS HENRIE

Wi, *I will not* Mon pa pou *concede, I have the floor.* Sa ki mon'n dir se ki saler pli ba dan servis piblik ozordi i R5mil485. E avek sa logmantasyon ki'n dan prezantasyon *VP* in dir, pli ba i pou monte i pou vin R7mil343.

Pran *calculator* en pti kou nou tou nou fer sa kalkil. *I am pretty sure* mon *calculator* pa'n fer vot, me R1885 ki enkli pou en Digwa. Ouswa Perseverance kot Onorab ki pe sey *disturb* mon pe fer kanpany. I enkli pou zot tou laba.

So Mr Speaker alor mon ava fini lo la. Sa ki nou vwar devan nou i pe retir politik dan zafer saler. I pe permet Gouvernman li zer *public servant* ki li ki anploye. Alor i kontinyasyon en reform ki Sesel

koman en Nasyon - pa *LDS* ki ti la an 2009, *US* ki ti apel Parti Lepep ki ti komanse, nou pe kontinyen.

I en traze long. Alor, i pa en louvraz *piecemeal*, i pa en *misalignment* ouswa pa direksyon pa kler. Me koman en pei, koman en pei avek en Nasyon, nou pe pran en desizyon brav me difisil, pou ki nou kapab soutenir Sekter Piblik a lavenir dan devlopman nou Nasyon. E i en transformasyon ki mon siporte 100poursan.

Mersi Mr Speaker.

MR SPEAKER

Mersi Onorab. Onorab Gill.

HON CHURCHILL GILL

Mersi Mr Speaker. Mr Speaker an traver ou, i *common knowledge* parmi tou politisyen la anndan espesyalman bann ki'n ganny elekte, si i annan en Onorab ki plenny plis la anndan, san ki i dir okenn keksoz ki sibstansyel - e i en lopinyon ki voter Grand Anse Praslin i *share*, se Onorab Woodcock.

(APPLAUSE)

HON CHURCHILL GILL

Mr Speaker, *VP* in donn tre byen lesplikasyon, me selman

domaz bokou Manm ki'n koze zot pa'n sezi ki *VP* in anmenn devan nou la ozordi.

VP li in dir in anmenn en amannman dan *public service salary*. Lo kote ogmantasyon, sa depi ler Bidze ti anonse sa konversasyon i fini ganny fer. So ozordi nou, nou topik konversasyon se pou nou dil ek sa amannman. So, i napa naryen ki *US* pe lager kont ogmantasyon.

Sel kon tansyon ki annan se *VP* dan son prezantasyon in dir en nouvo Polisi in fini ganny aprouve. Sel keksoz ki nou pe demann *VP* nou, Onorab ki'n koz avan mwan i dir ti annan en kad administrasyon ki ti ganny fer letan Gouvernman *US* ti la.

I korek, me selman 2020 ti sipoze pou sanze pou fer pli byen. Prezan nou ki nou pe demande nou - ki nou pe demande nou, fer nou war sa Polisi. Zis pou nou konnen ki i annan ladan. Se tou.

Nou pa pe lager pa donn logmantasyon, donn ogmantasyon. Pa sa nou largiman. Eski *VP* i kapab dan son *summing up* dir nou akoz ki nou pa kapab ganny sa Polisi, ki pou govern ler sa Lalwa i fini pase? Se tou nou largiman.

Akoz problem ek sa se nou pa konnen lekel ki pou annan pouvwar total avek sa

lamannman. E lekel ki pou egzekit li dan son totalite? E sa dimoun ki pou egzekit li, ki kantite pouvwar i annan lo sa Polisi? Mon krwar i enn *fair question* ki devret ganny reponn. Me se tou.

Depi bomaten nou pe lager, nou'n al, nou'n pran deba nou'n anmenn Anse Boileau, kan saler nou la kot Lasanble.

(laughter)

HON CHURCHILL GILL

Mr Speaker, sa bann kalite travay koumsa i annan dimoun deor ki swiv nou. Zot war poudir par ler en travay ki kapab pran *half a day*, nou, nou pe balbise, san ki nou pe koz sans, san ki nou *grab the sense* ki *VP* in anmenn la devan nou.

Si nou kapab fer sa dan nou travay, nou pou amelyor bokou fason ki nou delivre dan sa Lasanble. Atraver ou Mr Speaker, nou, nou napa okenn problem pou ogmantasyon. Nou konnen ki Seselwa in pas ladan e i *high time* ki en keksoz i ganny fer pou zot.

Me selman nou, nou sorti Praslin. Nou i en different *ball game* laba. Akoz kantite dimoun ki travay dan servis piblik i bokou pli pti git e

dimoun ki travay dan Sekter Prive i bokou e i dominan.

Natirelman nou, nou pa la pou nou al trangle Sekter Prive. Me selman ler sa ogmantasyon i fini donnen avek Sekter Piblik definitivman pou soulaz zot. Me selman nou lo zil Praslin nou pa pou neserman benefisye parey ki bann dimoun dan *public service* pou benefisye.

Alors en keksoz osi ki mon ava demann *VP* se nou bezwen kontinyen koz avek Sekter Prive. Nou pa pou donn zot lord ki pou fer, me selman annou koz ek zot. *At least* sa pti bout nou kapab fer, koz ek zot e gete ki solisyon nou kapab ganyen. Akoz le 30 Avril ler sa bann dimoun i ganny zot *paycheck*, ler zot pou la laboutik sa dimoun dan Sekter Prive pou al aste sa konmisyon ki menm pri parey sa dimoun.

Me selman, sa dimoun dan *public service* i pou soulaze akoz i annan en azisteman saler ki pe ganny fer pou zot. E sa bann dimoun osi zot in kontribye pou met nou la tou lede kote latab. Prezan ler nou deside fer en keksoz pou bann dimoun ki'n met nou la, annou sey rod en *common ground* kot en keksoz i kapab ganny fer.

I annan en nouvo Onorab ki'n mansyonn sa ladministrasyon i pe fer

posibilite pou annan en pe fleksibilite. Be selman nou pa war - nou pa war li nou pou nou konnen be ki kantite fleksibilite i pou annan. Fodre nou vwar. Akoz sa i tous pos dimoun.

I en senp kestyon e mon krwar *VP* i konpran poudir enn fwa ki dimoun i konpran sa *new policy*, mon krwar tou kestyon pou bann eliminen akoz dimoun pou'n konpran ki i annan ladan, ki fason ki i protez zot. Ki mannyer zot pou bezwen, zot pou benefisye ler sa i vin an fors.

E an menm tan mon ava *reiterate* annou koz avek Sekter Prive. Akoz sa bann group dimoun sa ki zot in santi ansanm ek sa bann dimoun dan *public service* tou sa letan, zot pou ankor kontinyen pou fer fas avek pou ankor en pe letan.

So sey gete ki nou kapab fer dan sa direksyon. Mersi Mr Speaker.

MR SPEAKER

Mersi Onorab. Onorab Monthy.

HON PHILIP MONTHY

Mersi Mr Speaker. Bonzour *VP*, bonzour Mr Speaker e tou dimoun a lekout e tou travayer Sekter Piblik. 2 pti parol lo sa *Bill* Mr Speaker, avan mon komanse mon ti le zis dir ki in deza annan en konversasyon

avek Sekter Prive ki Gouvernman in dir, in ankouraz zot pou fer parey pou donn en logmantasyon zot travayer parey pe ganny fer dan Sekter Piblik.

So, in deza annan serten keksoz dan sa laliny ki pe arive Mr Speaker. Me Gouvernman pa la pou enpoz naryen parey Gouvernman avan ki ti la ti abitye fer.

Mr Speaker, ler mwan mon'n ekout bann *MNA* Lopozisyon koze la bomaten, mon demann mon lekor si zot vreman senser avek sa bann dimoun ki ti met zot la? Bomaten la nou'n tann diferan kalite versyon sorti lo lot kote latab. Olye apresye sa zefor e partaz sa lakontantman avek sa pep, zot in swazir pou sey vin konfiz Seselwa. An di-z-an ki sa *Bill* napa naryen pou fer avek logmantasyon saler.

Wi i vre ki logmantasyon saler in deza fini ganny anonse dan Bidze. Me parey Onorab Georges in fer resorti, sa *Bill* ki la i annan en koneksyon avek logmantasyon saler. So annou pa sey vin konfiz pep Seselwa.

Mr Speaker, apenn 2an kot Sesel e tou Seselwa ti war li dan en moman difisil e enserten kot saler pa ti garanti e kot sa ki ti dan Egzekitiv ti pe mank sonmey, lo ki mannyer pou

asire ki sak papa, sak manman, sak frer e sak frer pou kapab anmenn en saler dan lakour.

Mr Speaker, la ozordi apenn 2an, i en moman lafyerte akoz i montre ou ki kalite travay ki sa Gouvernman in fer dan sa pti peryod letan! Zot in esey vin fer nou krwar ki ler bann *allowance* i ganny konsolide lo saler debaz, sa pou en dezavantaz pou travayer.

Mr Speaker mwan mon rapel byen ler mon ti dan servis piblik koman e *teacher* anler Lakademi Tourizm. Nou ti ganny en *meeting* avek *DPA* en fwa e enn bann pwen ki nou ti fer resorti avek reprezantan ki ti la, sete akoz bann *allowance* pa ganny konsolide, met ansanm lo saler debaz?

Akoz ti annan plizyer *staff* ki ti pe ganny difikilte pou ganny en *loan*. Repons ki nou ti gannyen sete "Gouvernman pe mazin lo la." Parey Gouvernman avan sa zot ti bon lo la - mazin lo la, get ladan - me zanmen zot pran bann aksyon konkret.

Nou ti ganny dir poudir sa pou kout Gouvernman tro bokou ler pou kalkil zot bann tann servis. Akoz evidaman sa pou monte. *Ok*. Apre ki ou'n travay pandan plizyer lannen dan Sekter Piblik, ler ou pou pran ou retret pou kalkil ou

gratwite, ou pou ganny bokou plis. Akoz sa i vedir ki ou saler debaz pou ogmante.

Be Mr Speaker, ozordi la Gouvernman *LDS* pe fer sa li. E mon pa konpran ki mannyer i annan i sey vin fer nou krwar ki sa i en move keksoz! Onorab Cosgrow atraver ou Mr Speaker in sey vin fer egzakteman sa bomaten. Ki mannyer ou'n pran ou *allowance* ou'n azoute, ou saler debaz in ogmante, ki sa i en dezavantaz? Fransman mon pa pe konpran. Mon pa pe konpran Mr Speaker.

Mr Speaker, mwan mon ti ava kontan ozordi bomaten la oubyen lafen dimwan Avril, en Manm lo lot kote latab i vin avek en legzanp, kot ler nou'n konsolid tou bann *allowance* ansanm lo en travayer, nou'n kalkil son 10poursan ogmantasyon, e ler *tax* in ganny retire lo la. Ki sa dimoun pou sorti pli ba ki i ti ete avan.

Mon ti ava voudre ganny en legzanp mwan. Akoz ler mon'n ekout bann Manm lo lor kote koze bomaten, zot in al dan sa direksyon. Zot in sey fer pep krwar poudir i pou zis annan en gro sonm lo zot saler, me an realite ler *tax* pou'n ganny retire zot pa pou ganny naryen.

Oubyen zot pou ganny pli ba ki sa ki zot ti pe gannyan avan. Se sa ki apel *mislead*

Lasanble e *mislead* Seselwa Mr Speaker!

Mr Speaker, parey Onorab Andre in fer sorti, mon pa konpran ki mannyer Seselwa pou vwar ki 10poursan pa en bon keksoz. I annan dimoun ki'n dir mwan, zis 10poursan? Ti annan en koleg a kote li sa dimoun ki t dir mwan sa, son koleg ti dir li, "omwen i touzour keksoz" Mr Speaker. 10poursan i pli bon ki naryen ditou.

Ler ou pran kont osi kot pei i sorti, i fer ou pli apresye sa zefor ki Gouvernman pe fer. E sa sakrifis ki Seselwa in fer pandan sa 2an, kot nou menm nou koman *MNA* souvan anler ou pran lapenn, ou pran pitye pou ou zabitan, ler nou war bann serten desizyon ki pe ganny pran me ki nesaser. Akoz nou en Gouvernman ki brav.

Menm si annan de ler, ler ou pas devan serten laport dimoun i annan serten lenkyetid, me nou fer zot konpran poudir sa i bann mezir ki nesaser, nou pa pe get limedya me nou pe get pli devan. E pou byennet pei. E ozordi mwan mon fyer e mon kontan ki menm si i zis 10poursan, i touzour keksoz Mr Speaker.

En lot keksoz avek sa *Bill* ki mwan i enteres mwan, se sa de-politiz, tir politik dan Sekter

Piblik Mr Speaker. Mwan mon'n travay 22an dan Sekter Piblik dan ledikasyon. E mon'n war en kantite politik deroule dan Sekter Piblik.

I annan *staff* ki pa ti donn naryen, me ki touzour ti pe ganny bann privelez. Ler pou al Lasin pou al aste souvenir tas 'Leker dan Leker', revey, triko, zot ganny *release* zot ale zot. We. E zot *appraisal* tou kou i *best*, ou ganny mwan?

Si sa *Bill* pe ede pou tir sa eleman politik pou evite ki sa bann keksoz i repet son lekor Mr Speaker, mwan mon pou donn li tou mon sipor.

Mr Speaker, parey Onorab Georges in fer resorti, sa *Bill* i en pa dan bon direksyon. I en premye pa, me i enn ki nesaser, e i enn ki pou anmenn servis piblik pli devan.

Avek sa detrwa mo mon pou akord tou mon sipor Mr Speaker. E mon pou demann bann Manm lo lot kote latap pou silvouple lev zot lanmen anler pli o, nou pep i merite sa pti logmantasyon saler. Siport sa silvouple. Mersi Mr Speaker.

MR SPEAKER

Mersi Onorab. Onorab Herminie.

HON WILBERT HERMINIE

Mersi Mr Speaker. Bonn apre midi Mr Speaker. Bonn apre midi tou bann koleg Onorab. Bonn apre midi VP avek ou delegasyon e tou dimoun a lekout.

Mr Speaker mon bezwen riye ler mon'n tann Onorab Henrie atraver ou Mr Speaker, kontinyen vin koz lalang avek sa Lasanble.

In pran en saler R5mil584 avek en logmantasyon 10poursan, in tonm lo R1800. Mon pa konnen kote sa kalkilasyon i sorti, me kekfwa taler i ava montre nou.

Mr Speaker, tou dimoun i kontan ler zot tande zot pe al ganny en logmantasyon. Akoz ki mannyer i ete, pri lavi i ete konmela ki'n pet plafon, kot nou met R500 lo kontwar ou ganny zis de pti konmisyon.

E en logmantasyon definitivman pou soulaz sa pep. Nou napa okenn problemm avek logmantasyon nou. Me kwa ki nou pe diskite?

Sa *Bill* devan nou ozordi pe zis tir zofisye piblik dan Lalwa, e met li anba en kad administrasyon. Nou pa tro konnen kwa sa kad ladministrasyon akoz nou pa ankor war sa Polisi. Nou pa konnen kwa ki vreman zot anvi fer.

Me solman, kwa ki nou konnen Mr Speaker se ki mezir tanporer in ganny tire. Laz Sekirite Sosyal in monte, pri bis in monte, pri lavi in monte. Bann proteksyon pou nou bann trwazyenm az in ganny tire.

Sa R10mil ki ti ganny promet in evapore. Prezidan ti dir nou ki laz Sekirite Sosyal pou sorti 63an pou desann, sa osi in evapore. Ki nou'n war lekotrer? In monte.

Mr Speaker, sa kad legal ki nou war devan nou, mon pa war naryen ki pe fer avek logmantasyon saler. Mon war plito zot in tir saler Sekter Piblik ki ti dan en Lalwa, ki ler i dan en Lalwa politik pa kapab antre. Zot in transfer li met li dan en kad administrasyon.

Ki dayer dimoun i kapab ganny manipile. E la kot politik i antre. Sa landrwa ki politik pou antre. Ler i dan en Lalwa i ganny kouver. La nou'n ganny dir pe al ganny met dan en kad administrasyon ki nou pa konnen. Nou pa konnen.

Nou bezwen zis *trust* zot. Be nou nepli kapab fer zot konfyans. Akoz zot koz ek nou de parol. En zour zot dir nou zot pa *believe* dan *survey*, lannmen zot pe fer *survey*. En zour zot dir nou koumsa laz Sekirite Sosyal pou fer desann, landmen i fer monte.

So Mr Speaker nou pe war li difisil pou nou kapab zis *trust* zot, donn zot en *carte blanche* pou zwe avek saler Sekter Piblik. Nou war sa vreman difisil. Akoz pou nou kapab vot lo en keksoz nou bezwen war li kler. Nou bezwen konpran kwa ki nou pe vot lo la.

Nou tou nou kontan ganny logmantasyon. Ki dayer sa 5poursan logmantasyon bann teknisyen la devan spesyalman enn ki ti travay lo la, en garson byen entelizan, i ti travay lo la li, zot lot kote latab zot ti vot kont, zot pa ti aksepte. Zot ti dir donn tou dimoun parey.

Be si mon ti'n ganny mon 5poursan logmantasyon la e mon ti ganny mon 10poursan logmantasyon. Seselwa pa i pou kontan zot in ganny 5 zot in ganny 10, i monte.

Nou, nou kontan donn travayer Sekter Piblik larzan nou. Nou kontan met larzan dan pos Seselwa nou. Nou pa fer politik avek nou. Sa bann letan zot ti dir nou koumsa 2019 zot in fek dir nou ki, Sesel ti pe fer byen, solman mon rapel byen dan deba dan sizyenm Lasanble, zot ti dir a sa moman, a sa moman letan zot pa war li normal pou donn sa logmantasyon 5poursan. Zot ki ti dir sa, pa mwan.

Zot ti dir, donn tou dimoun parey. Gran, gran kalkilasyon zot ti al fer, pake kalkilasyon zot ti ganny fer pou zis vi met retar pou Seselwa ganny en 5poursan.

La ozordi ki zot pe dir, nou ki pe met retar. Nou pa pe met retar dan naryen nou. Nou kontan Seselwa pe ganny zot logmantasyon. Nou, ki nou pe dir, keksoz pa kler. Keksoz pa kler la devan nou. Nou pe fer en kad ladministrasyon ki nou pa konnen kwa ki i *entail*. Nou pa war. Nou pa war fransman.

Ki dayer ankor Onorab Andre atraver ou Mr Speaker in dir koumsa i annan serten defo. Zot pe fer li *ad hoc* an servi son mo. Be si zot pe fer li *at hoc*, ki mannyer nou pou kapab *trust* zot ki zot pe fer en bon louvraz?

Ki mannyer nou kapab *trust* zot ki zot pe fer en bon louvraz si zot pe fer li *ad hoc*?

Nou ti ava kontan war en keksoz konpreansiv ki nou kapab vot lo la, pou nou kapab siport travayer servis piblik. Parey mon'n dir ankor, mon pou repete. Nou an faver logmantasyon 10, 15, 20poursan pou nou bann travayer. Sa i toutafe normal sa.

Nou, nou *issue* se kwa ki zot pe kasyet? Akoz i difisil pou nou fer zot konfyans. I bezwen annan en keksoz zot pe kasyet

ladan. Akoz nou pa pe war tou keksoz, nou pa pe war *the whole picture* la. Nou pe sey rode kwa ki zot pe sey fer akoz zot in vin avek, zis zot in *repeal*. Mon war partou kot *public officer* i vini zot in tire.

Nou pa konnen egzaktaman kwa ki zot pe sey *achieve*. *SOEs*, parastatal, zot osi zot in travay. Ki dayer Gouvernman i annan *share* ladan. Ki pou arive avek sa bann travayer?

La mon pe mazin bann travayer *IOT*, *PUC*, ki pou arive avek zot? I enportan pou nou konnen. Akoz nou pe pran en desizyon pou donn zot tir en keksoz ki'n ganny ankadre dan Lalwa pou fer travay administrativ avek.

So, sa bann kestyon i bezwen ganny reponn. Nou bann dimoun aze, zot in esper sa R10mil ziska amen, zot pa'n gannyen, mon ti ava kontan konnen si sa 10pousan logmantasyon pou aplik pou zot tou? I enportan konnen. Pa zis koz ek nou kad administrative.

Akoz Mrs Benoit in esper son 10poursan, in espere, in espere. Ki in war li, in war son laz Sekirite Sosyal sorti 63an vin 65an. I pa ankor war sa R10mil li.

So Mr Speaker, an terminan mon bezwen dir, apre

ki zot in byen organiz zot lekor avek zot larzan palto, zot larzan ledan, 2an edmi pli tar, 2an edmi pli tar lavey en eleksyon zot vini zot vin pas dimyel o bor ver an krwayan ki Seselwa pa pe war zot.

Be nou ki nou pe dir zot, tou Seselwa annou pran nou 10poursan i normal sa. Sa i apel pou nou sa. Nou ava pran nou 10poursan epi 2025 nou ava met zot *out!* Sitan senp ki sa.

Mr Speaker, an terminan mon ti ava anvilans en lapel avek tou nou bann siporter pou desann le 30 Avril, nou ava zwenn zot Baie Ste Anne Praslin. Kot nou ava kontinyen sa diskisyon an plis an detay lo ki mannyer sa Gouvernman i kontinyen bat nou latet, avek serten Lalwa ki zot vin dan Lasanble ki krwar zot kapab kontinyen fer nou latet vin kare. Mersi Mr Speaker.

(APPLAUSE)

MR SPEAKER

Mersi Onorab. Ou annan en *point of order* Onorab Henrie?

HON GERVAIS HENRIE

Mr Speaker anba *Order 61(1)(d)* mon le koriz en *misapprehension* ki Onorab Herminie in fer vizavi mwan,

kot in dir mon kontinyen koz lalang avek piblik Seselwa.

Mon le atir latansyon Onorab Herminie atraver ou Mr Speaker dan en sirkiler ki date le 13 Mars 2023, sirkiler limero 3 2023, ki zot parti ti *leak* lo *social media*.

Lenformasyon i *comme tel*; - *the existing salary grid* dan *band 1, step 1* pli pti saler dan Sekter Piblik 1 R5mil485. Mon repete R5mil485.

Avek propozisyon ki pe ganny, pou revize apartir Avril 2023. Pli pti saler dan Sekter Piblik *band 1, step 1* i pou vin 7mil343. Si in fer en pti pe matematik lekol, mon'n fer en *long subtraction* i apele, son diferans i R1885.

Now ou pa pou pey *tax* lo la aköz i par anba 8mil500. Sa ki apel met larzan dan pos Seselwa! Mersi Mr Speaker.

(APPLAUSE)

MR SPEAKER

Bon, nou ava pran poz la, nou ava anvoy deba pou pli tar apre midi aköz i deza apre midi. Lasanble i ava rebran 2er e mon *remind* bann Mann *Assembly Business Committee* ki nou annan *meeting* parey labitid. Nou ava pran poz.

(BREAK)

MR SPEAKER

Bonn apre midi tou dimoun, *staff*, nou zofisye Lasanble. Mon ti anons zot ki mon pou bezwen fer determinasyon lo letan e mon annan 5 Manm ki lo lalis pou koze. E i annan plis ki pe lev lanmen.

E mon ti averti zot mon pou 10minit sakenn, akòz i mon lentansyon fini deba pandan sa peryod pou nou kapab pran *Committee Stage* apre *break*.

So, 10 minit pou lemoman pou sa ki'n lev lanmen. E si i annan ki lev lanmen ankor. Onorab Bistoquet, Onorab Romain, Onorab Lemiel, Onorab Aglae, Onorab William.

Bon sa bann Manm, Onorab Larue ou lo la deza ou, wi, boner. Bon tou sa bann Manm in lev lanmen ansanm la dernyen alor mon'n pa pou swiv egzaktaman, mon pa konnen mon pou pran enn sak kote ler nou ale.

HON WALLACE COSGROW

(Off-Mic)

MR SPEAKER

Onorab Cosgrow napa naryen ki'n arive la. Be ki?

HON WALLACE COSGROW

Mon annan en *point of order* baze lo en *statement* ki'n ganny fer par Onorab Henrie dan son lentervansyon Mr Speaker.

Anba Seksyon 61 (d) en *misapprehension* pou korize Mr Speaker.

MR SPEAKER

Onorab Henrie in koriz en keksoz ki Onorab Herminie ti dir. So, in deza annan en deba lo la.

HON WALLACE COSGROW

I pa en deba Mr Speaker, i pa en deba me dan lentere donn lenformasyon korek pep Seselwa, mon ti a kontan si ou *allow* mon en pti morso letan zis pou mon koriz serten sif ki.

MR SPEAKER

Mon *allow* ou 1 minit.

HON WALLACE COSGROW

Ok, Mr Speaker. Mr Speaker dan son, mersi. Dan son *statement* Onorab Henrie in dir ki *from* sa, sa *chiffre from* sa vye grid saler, pli ba saler lo vye grid saler R5mil485 pou mont R7mil285, in dir poudir i en logmantasyon R1800. Mr Speaker mon ti ava kont met a latansyon Lasanble e osi manm piblik, ki pli ba saler dan *public service* ti R6mil206. Se sa ki'n

ganny enplimante par sirkiler Mr Speaker.

E Mr Speaker, sa *grid* ki pou al ganny servi i en *consolidated grid* ki enkli tou bann *allowances* avek sa logmantasyon 10poursan.

Mr Speaker, ler mon fer en kalkilasyon, si nou pe servi en saler R6mil206 ler ou'n azout sa *supplementation allowance* 5poursan, ki en total R310, i fer R6mil516 ki annefe Onorab Henrie i mal pou dir ki i annan en logmantasyon R1800 kan i neserman annan zis en logmantasyon R669.

So pou mwan in *mislead the House*, in *mislead* Lepep Seselwa e mon krwar i devret ganny korize. Mersi Mr Speaker.

MR SPEAKER

Ok, mon pa pou permet en deba lo la Onorab. Mon ava donn Onorab Georges laparol pou fer en pwen. Si i annan lezot keksoz pou eklersi i pou responsabilite *panel* eklersi apre.

Onorab Georges, wi?

HON BERNARD GEORGES

Mersi Mr Speaker. Mr Speaker pwen ki mon anv i fer se ki avek tou respe Onorab Cosgrow ti napa okenn drwa a laparol. E tou sa ki i fek dir la mon

demande i ganny *strike off the record*.

Akoz, anba *Order 61* i kapab enteronp a *Member who is speaking* ti *correct a misapprehension*. E selman si sa *Speaker is willing to give way*.

E ler in seye pli boner Onorab Henrie in dir *I am not conceding. He did not give way*, e donk Onorab Cosgrow ti napa drwa a laparol e tou sa leksplikasyon ki i fek fer la in fer *off-mic, off the record*. Nou pa devret pran okenn konsiderasyon. E dimoun dan lakour i devret inyor e bliy sa ki i fek dir. Mersi.

MR SPEAKER

Mersi.

HON WALLACE COSGROW

Ou pa kapab inyor en keksoz ki koriz en fot.

MR SPEAKER

Onorab Cosgrow terminen.

HON WALLACE GOSGROW

Ou pa kapab inyor en keksoz ki koriz en fot. Li in deside pa sede, be in fer en fot.

MR SPEAKER

Order! Onorab Henrie, arete!

HON WALLACE GOSGROW

E in ankoler akoz i konnen i mal.

MR SPEAKER

Onorab Cosgrow mon'n dir ou nou'n terminen avek sa. Mersi. Onorab Cogrow dernyen fwa, si ou pa oule mon met ou deor silvouple aksepte.

Bon, nou a rebran lo deba. E evidaman avek nonm manm ki'n lev lanmen mon krwar mon pou bezwen restrikte letan ankor plis apre sa premye *round*, dimoun ki ti'n lev lanmen deza.

Premye nou ava komans avek Onorab Adelaide.

HON FRANCOIS ADELAIDE

Mersi Mr Speaker. Bonn apre midi Mr Speaker, VP avek ou delegasyon. Tou Manm Lasanble Nasyonal e tou dimoun ki a lekout.

Mr Speaker, dabor mon le remersye VP avek son lekip tre profesyonnel. Mon'n vwar zot en pe letan. Mon konnen poudir zot bann dimoun ki kapab e zot in ganny sa responsabilite dan en moman ki vreman enportan. E mon trouve poudir zot in komans bouze – zot in komans bouze pou zot kapab fer en diferans dan lavi Seselwa.

A an plis VP avek ou delegasyon petet apre sa deba

dan Lasanble Nasyonal, petet mon pa konnen mannyer zot pou medya tiz sa lanons, sa *Bill* ki'n ariv dan Lasanble Nasyonal, pou fer bann dimoun konpran vreman ki zot pe fer.

Akoz mannyer i pe pase la ozordi, mon konnen mazorite dimoun i konpran. Me sa pti gin *US* ki annan e avek sa bann lenformasyon ki zot bann dirizan pe donn zot, mon panse ki zot pou pli konfize ankor.

So, mon ti ava kontan ki ti ava annan en bon deba petet menm dan *News Extra*, mon pa konnen mannyer zot fer li. Me pou ki Seselwa i ganny *the right* mesaz pou, ki pou ki sa *Bill* i pe demande pou fer.

Mr Speaker bomaten mon'n ekout Sekreter Zeneral *US* - Onorab Cosgrow - ler in fer referans in dir lo kote sa *Bill* ki devan nou napa naryen pou fer avek saler.

Be solman mon ler mon pe gete mon pe lir son tit, i met *Public Service Salary (Amendment) Bill, 2023*. So savedir definitivman i bezwen annan *something* pou fer avek saler.

Be Mr Speaker, mwan mon pa en profesyonnel parey mon pe fer krwar mon ete, mon en Manm, Lasanble. Me mon pou enplik sa *Bill* dan en fason tre senp pou ki nenport dimoun

laba deor, i kapab konpran ki i annan e ki i espekite de sa Lalwa ki nou sipoze pase.

Mr Speaker, nou fek sorti 2an pos *COVID* e nou tou nou konnen poudir mannyer keksoz i ete lavi ti difisil. E sa Gouvernman ki ti ganny elekte an 2020 mon krwar zot in pa'n les lebra tonbe menm si lepok ti difisil, me zot in sey zot mye.

E ozordi apre tou sa bann lezot *incentive* ki'n annan, nou'n vwar bann pri redwir lo bann komodite, nou'n vwar kot *PUC* tarif elektrisite in ganny revize.

En bon pe bann keksoz ki sa Gouvernman in fer ki'n ede pou pez en pe sa kou egzorbitan ki ti lo ledor Seselwa. E la avek ankor sa 10poursan logmantasyon ki Seselwa sirtou Sekter Piblik i sipoze trouve lo zot lapey, *be it* i kapab lafen Avril, si petet en pti problem, i kapab petet Me.

Me solman 10poursan Mr Speaker, mwan mon krwar ki Gouvernman *LDS* i pa'n zis koze, me in vremen met aksyon. E la mon war poudir aksyon in ganny mete kot nou pa'n zis koze larzan pou monte, larzan pou vini. E la nou pe la vwar en fe akonpli ki Gouvernman *LDS* ti dir dan son manifesto e la i pe fer sir ki sa pe ariv kot pep Seselwa.

Mr Speaker, be oli problem si nou'n komans avek 10poursan? *At least* i en pti keksoz. E mwan mon krwar dan plas pou nou dekouraz nou bann dimoun. Pou donn zot tou sa bann kalite mannigans mon krwar nou devret vin en pe pli serye koman, parey dimoun i dir Mr Speaker bomaten ou'n repet sa ankor, annou bann Manm Lasanble Nasyonal mon krwar i enportan ki ler pep in swazir nou petet pou reprezant zot, nou sey *at least* nou sey nou mye pou nou kapab *feed* zot avek bann keksoz ki laverite.

E *once* ki nou fer sa mon konnen, wi pa tou keksoz ki nou kapab fer ki pou fer plezir tou dimoun. Be selman ler i annan en keksoz ki bon, mon krwar nou devret kapab tonm dakor koman en Lasanble. Pa les zis nou lo kote *LDS*.

Be mon krwar zot osi, sirtou bann Manm ki'n ganny elekte dan bann distrik, mon krwar poudir tou bann dimoun pou kontan. E mon ti a kontan osi petet nou ganny *feedback* bann piblik a lafen, petet a lafen Avril. Tou sa bann ki annan zot *pay slip* nou get en kou lo la.

E si i annan enn ki dan servis piblik ki pa'n gannyen, mon ti a kontan ki zot raport ek Lasanble Nasyonal. E petet

kantmenm zot pa pou vin kot nou bann *MNA LDS*, Mr kantmenm bann *MNA US* laba. E mon ti ava kontan poudir ti ava annan en rapor ki vini poudir ki sa bann dimoun pa'n gannyen sa logmantasyon.

Mr Speaker ler mon pe - mon kontinyen lo sa ton ki en dimoun ki ler ou annan en dimoun ki pe ganny en pti kontribisyon en pe plis, Mr Speaker, mwan mon panse ki e bon keksoz.

Annou pa sey fer krwar - annou pa sey fer krwar pou nou anbet nou pep pou dir sa Gouvernman ki la ozordi i pa en Gouvernman ki serye.

So pou konklir Mr Speaker, mon ti a kontan dir ankor en kou avek Lepep Seselwa ki sa Gouvernman *no matter what* ki mannyer keksoz i ete, nou pe travay tou pou tou, nou pe tap tou pou tou parey Minis Rangasamy i kontan dir - nou pe fer tou pou tou, nou pe tap tou pou tou pou ki lavi Seselwa i amelyore.

E mon demann Seselwa pou pa les zot ganny anbete, me plito zot servi zot konesans, servi tou zot bann *IQ* ki zot annan, pou zot kapab vreman konpran lekel ki serye dan sa pei e lekel ki pe zwe ek zot.

E nou pa pe fer sa parey pe dir, ni pou ganny eleksyon.

Mon konnen poudir a lavenir si keksoz i amelyore *VP* avek son tim mon konnen zot pou kontinyen get dan posibilite kontinyen organize, aranz Seselwa.

E petet ankor parey mon pe dir la i pou Sekter Piblik - petet pli tar osi parey nou konnen poudir nou bann pansyoner osi petet zot osi anmezir lavi i monte servis piblik zot ganny en pti azisteman o fir a mezir, mon konnen ki Gouvernman pou petet get osi dan zot *welfare*.

E parey Gouvernman in fer li osi, in ankouraz Sekter Prive petet zot osi pou gete kot zot kapab pou zot kapab petet met en pti zafer lo zot bann travayer ki dan Sekter Prive.

Dan en fason ki nou ava ganny gete koman en sosyete ki pe kontinyen bouz devan, san kit personn deryer. Be mon konnen parey zot dir napa baton mazik. Ki tou keksoz i bezwen ganny fer fir a mezir. E nou, nou konvenki ki nou pei i dan bann bon lanmen e la nou pe fer sir ki nou pe donn profesyonnel sans pou zot demontre ki zot in kapab fer.

E byensir mon konnen zot pou fer en bon travay pou Sesel. Akoz mon trouve menm kantmenm zot ganny tou sa bann saboule, par ler mon osi

mon kanmi pou zot akoz Lasanble, par ler i annan en serten ki fer nou ganny gete koman nou bann dimoun irresponsab.

Me selman mon konnen poudir zot devan lo *panel* zot trouve lekel ki senser, zot trouve lekel ki anvi ed zot. E nou, nou pa la pou nou blanm personn. Nou la kontrer pou nou siport zot pou ki zot fer en bon travay pou Lepep Seselwa e kot nou tou, tou Seselwa i ava fyer. *Reap the benefit* ki nou Gouvernman pe anmennen pou Sesel.

Avek sa de pti mo Mr Speaker mon ava remersi ou. Mersi bokou.

MR SPEAKER

Mersi Onorab. Onorab Loizeau.

HON NORBERT LOIZEAU

Mersi Mr Speaker. Pou sa pti gin letan ki ou'n donn mwan la. Mr Speaker mon'n ekout *VP*, solman i pa vedir ki mon pou al repet tou sa ki *VP* in dir. Mwan mon pou koz lo merit zeneral sa *Bill*. *VP* in fer son prezantasyon e mwan mon pou koz lo merit zeneral sa *Bill*. Parey Onorab Gill in fer pou li, li osi.

Mr Speaker, e la osi pou komanse mon anvi felisit Onorab Gill pou ki in rekonnèt ki travayer Seselwa ti pe mal

pase, la zot pe al ganny sa logmantasyon 10poursan. Mon felisit li pou li war sa omwen.

Mr Speaker, an 2022 Lepep Seselwa ti elekte Gouvernman *LDS* dirize par Mr Ramkalawan koman Prezidan. Nou ti ganny elekte pou deservi sa pep Mr Speaker. Akoz Seselwa ti anvi war en nouvo komansman. En nouvo fason fer keksoz. Parey nou pe fer ozordi.

Pou nou Mr Speaker, nouvo fason fer keksoz i normal ler ou fek antre dan Gouvernman. Akoz nou nouvo nou pa kapab fer parey zot, zot ti fer avan. Aprezan zot akoz zot, zot in *fail* Lepep Seselwa Mr Speaker. Zot deside ozordi tou keksoz zot boykot! Menm 10poursan lapey ki nou pe dir nou ava donn sa Seselwa deor, nou konnen i pa bokou, me omwen en keksoz. Ki zot zanmen zot i donner Mr Speaker.

Zot konplent, zot *disturb* Lasanble. Pou fer dimoun krwar ki sa Lasanble pa serye Mr Speaker, kan zot ki pa serye. Me nou isi nou serye. Akoz nou pe fer keksoz pou Lepep Seselwa.

Mr Speaker, ou kapab mazine ler nou ti pran pei ni lapey ti napa pou bann travayer dan Sekter Piblik. Nou rapel sa, mon krwar ti annan anviron

mon krwar pres zis R17milyon. VP i a konfirm sa ek mwan, apepre. (VP i balans latet laba.)

Ozordi Mr Speaker avek travay dir, ozordi nou'n fer sir ki tou travayer Seselwa pe ganny en lapey ki zot pa ti pou gannyen, akoz ler nou ti pran pei ti napa larzan.

E ozordi nou pe fer sir ankor. Apard sa lapey ki nou'n fer sir ki zot in gannyen, nou pe fer sir i nou pe donn zot en logmantasyon 10poursan ankor. Mr Speaker be sa i mal? Be sa en keksoz fantastik pou en Gouvernman ki fek vin o pouvwar.

E Mr Speaker nou rikord koman en Gouvernman i prop. Onorab Woodcock in fer resorti pli boner ki Oditer Zeneral in dir. Ki zerans larzan par Gouvernman LDS i byen, in fer li dan en fason byen.

Sa se bann lakonplisman ki nou koman en Gouvernman nou merit apresye. Nou merit selebre sa Mr Speaker, akoz pei ti an rin ler nou ti pran.

E pou sa rezon ki la ozordi, nou pe get nou bann travayer. Mr Speaker ou kapab mazine pandan zis 2an edmi nou pe fer sa ki nou pe fe la. Pa 43an! Nou pa'n pran 43an pou fer sa nou, 2an edmi!

Zot pandan 43an, zot pa'n kapab elev nivo lavi nou

bann dimoun laba deor. E nou nou'n pran pei Mr Speaker dan en moman kritik. Dan en moman kritik kot nou ti bezwen pran bann desizyon drastik; bann desizyon ki ti anmer; bann desizyon ki pa ti bon, pa ti popilis; bann desizyon ki ti kapab fer nou perdi eleksyon.

Me selman Mr Speaker, nou, nou get lavenir pei an premye nou. Nou pa get eleksyon. Nou get keksoz dan en lot lizye konpare ek zot laba lot kote.

Mr Speaker, ozordi zot ti ava kapab fer parey, si zot ti valoriz nou bann eksper, nou bann profesyonnel. Get devan Mr Speaker, get sa, zot ti la sa bann dimoun. Zot ti anvi travay, me zot lopinyon pa ti ganny ekoute. Keksoz ti ganny fer pou rezon politik.

Kan saler sa bann dimoun ki devan, sa bann profesyonnel, zot annan kalib Mr Speaker. Ozordi dapre konpran zot pa pe travay anba stress. Akoz? Zot pa pe ganny enpoze travay lo zot sorti kot Egzekitiv.

Se zot, se zot nide. Se zot bann dimoun ki'n al *train*. Pourtan zot in *train* pandan letan ki US ti o pouvwar, me selman US pa'n valoriz zot.

Mr Speaker be nou, nou valoriz nou bann profesyonnel.

Nou ekout zot, nou pa met presyon lo zot, nou le zot fer zot travay byen. E nou, nou pa en Gouvernman ki Prezidan pou vini pou dir fer sa, fer sa. Prezidan i ekoute, Vis-Prezidan i ekoute, parey in ekout nou bann profesyonnel i ki la devan e bann lezot dan biro ki pe travay, pou nou kapab ozordi vin en keksoz parey.

Ozordi Mr Speaker atraver lespri nou bann profesyonnel devan Mrs Mohideen – *performance-based*. Ozordi nou'n fer ki ozordi ki Sekter Piblik ou bezwen performen, ou bezwen performen pou ou kapab ganny rekonpanse.

Pa parey zot, kantmenm ou pa performen zis ou en sekreter sekter ou asize ou vey zaksyon dimoun lo flat partou, ou ganny rekonpanse, ou ganny promosyon, ou ganny mete pou ansarz en konpanyen parey *Cleaner's Agency*. Parey bann konpanyen parey "Dan Simityer ki Onorab Cosgrow ti dir li ki ti formen.

Se sa bann keksoz ki zot fer Mr Speaker. Zis pou ankadre zot bann dimoun pou donn zot dimoun en keksoz. Nou non Mr Speaker. Nou, nou anv i ki nou bann dimoun i perform e ou ganny rekonpanse dapre ou performans.

E sa se bann profesyonnel i apresye sa. E mon anv i dir sa bann profesyonnel mersi, pou nou tor Sesel kot i ete pou nou fer li vin pli performan. Pou ki nou bann dimoun i ava annan sa kiltir travay. Travay, travay dir. E ozordi sa fri ki nou pe rekolte la se travay dir ki nou fer, ki pei in fer.

Mr Speaker, ozordi nou pe, i annan pe koz lo distribisyon larises pa'n ganny fer byen. Mr Speaker, pa'n ganny fer byen, 2an nou pe distribye en pti larzan lo nou bann dimoun? Zot ki zot ti fer? Nou ler nou ti pe koze nou ti pe dir fer logmantasyon lapey sa letan ki ti R3mil50 e Sekirite Sosyal fer monte, zot ti dir nou non. Zot ti dir nou, nou fou, zot ti dir nou pa krwar, apre napa lot swa zot ti bezwen fer Mr Speaker.

Be nou, nou pa bezwen zot vin dir nou fer. Nou pa bezwen zot vin komann nou. Akoz zot, zot ti merit fer sa pandan tou sa bann letan pase ki zot pa'n fer. La ler nou, nou pe fer la zot, zot napa drwa pou vin dir nou mannyer pou fer. Akoz zot, zot pa'n fer.

Mr Speaker, zot dir lalang i mars ek voler? Mr Speaker nou le koz lo lalang i mars ek voler? Lekel pli gran mansonz

ki nou'n tande, pli gran lalang?
Ler Prezidan Michel ti vini ti dir
"Tou son Minis pa pou pran
larzan! Pa pou pran!"

Pas deryer ti pran Mr
Speaker. SG ti pran.

MR SPEAKER

10 minit Onorab.

HON NORBERT LOIZEAU

Wi Mr Speaker mo pe al fini la
mon pe al fini. Wi i konnen li
ekspre mon dir sa mo i konnen.

MR SPEAKER

Onorab silvouple nou aret fer
referans avek bann Manm dan
sa lasal. Parske si ou dir en
keksoz ki fo, mon pou ganny en
konplent lo lot kote. So arete.

HON NORBERT LOIZEAU

Zot ti pran zot larzan. E i annan
i konnen. Ekspre mon servi sa
mo "i konnen", pou zot kapab
fer en video pou dir "zot konnen
lekel" al fer en *video* lo la. Pou
nou konnen lekel ki ti pran sa
voyaz Mr Speaker.

Mr Speaker, nou pe koz
trust...

MR SPEAKER

Terminen silvouple Onorab.

HON NORBERT LOIZEAU

Ziska aprezan 2an edmi napa
okenn dimoun ki'n anmenn en

ka konmkwa nou Gouvernman
i annan larzan ki'n perdi.

Pourtan *trust*, ki mannyer
nou kapab *trust* zot, i annan
serten Onorab in koz lo *trust*.
Trust, Botanik nou'n perdi en ta
larzan, ler sa Onorab ti Minis.
apre zot ti met dife dan *building*
Mr Speaker.

(Interruption off-mic)

HON NORBERT LOIZEAU

Trust? Mr Speaker nou pou
trust sa bann dimoun ki laba?

(Interruption off-mic)

MR SPEAKER

Onorab mon'n demann ou
terminen.

HON NORBERT LOIZEAU

Wi Mr Speaker mon pe al
terminen. Mr Speaker ou
konnen nou problem? Nou
problem nou Gouvernman pe
delivre.

(Interruption off-mic)

MR SPEAKER

Onorab, ou pe terminen?

HON NORBERT LOIZEAU

Mr Speaker i pe pran mon letan.
I pe pran mon letan. Mr
Speaker nou Gouvernman pe

delivre. E toultan ler Gouvernman i delivre la, Lopoziyon pou fer sa li. Akoz? Zot pa'n kapab fer parey.

Aprezan zot le dikte nou ki pou fer. Zot pa pou dikte nou. Nou, nou pou fer keksoz dapre ki nou bann profesyonnel pe *advise* nou. Zot la devan. Ti ek zot sa bann dimoun, zot pa servi sa bann dimoun byen. E nou, nou pou servi zot byen Mr Speaker.

Sa *Bill* Mr Speaker i en nouvo pa dan en bon direksyon. I anmenn plis fleksibilite kot i retir en pe politik. Kot mwan mon pa pou kapab ansarz larzan.

MR SPEAKER

Mersi Onorab pou ou lentervansyon.

HON NORBERT LOIZEAU

Mr Speaker mon annan detrwa zafer la ankor. Mr Speaker mon a termin lanmenm. Selman mon anv i dir ek Lepep Seselwa deor, pa ekout sa bann dimoun. Pa ekout parti minoriter akoz Mr Speaker zot pou la zis pou konfiz zot deor.

Mr Speaker mon a termin la malgre mon annan ankor pou dir. Mersi.

MR SPEAKER

Meri. Laparol pou Onorab Flory Larue. 10 minit silvouple.

HON FLORY LARUE

Bonn apre midi Mr Speaker. Mersi Mr Speaker. Mr Speaker nou bezwen retourn nou *focus* lo sa travay ki devan nou. Akoz parey nou'n ganny dir depi bann premye dimoun ki'n koze sirtou lot kote latab spesifikman atraver ou Mr Speaker - Onorab Cosgrow.

In dir nou koumsa ki nou pe koz lo en bann zafer pou fer ek saler, me solman sa *Bill* napa naryen pou fer k saler. In ganny mansyonnen avan ki mon'n koze ki sa *Bill* ki devan nou spesifikman i la pou *amend the Public Service Salary Act*.

Alor nou bezwen refer piblik byen konpran ki nou pe koz lo Sekter Piblik e saler ki zot gannyen dan Sekter Piblik.

Mr Speaker sa *Bill* prensipalman nou pou tande apre i koz prensipalman lo zis bann amannman ki pe ganny fer e sirtou *repealing*.

Ki i pe *repeal* Mr Speaker? I dir nou i pe *repeal the Public Service Salary Table*. Sa i sorti dan Lalwa ki Lalwa orizinal ki *Public Service Salary Act, 2013*.

Letan nou *repeal* sa latab nou vwar ki i vin en latab ki bouz anba en sistenm administrativ koman en

administrative tool. E nou vwar son kontinyasyon kote, ki arive avek li an traver en sirkiler.

Mr Speaker, wi nou pe diskrit lo *Bill* me sa sirkiler i donn valer sa travay ki nou pe fer la ozordi dan Lasanble. Sa sirkiler i sirkiler limero 3, 2023 e i date le 13 Mars.

Mr Speaker, sa sirkiler ki annan 4 paz, i eksplik ki manner, ki sa amannman dan sa Lalwa pou *mean* pou dimoun dan Sekter Piblik. Nou ganny eksplike ki i annan en Lalwa an egzistans, sa sirkiler i eksplike ki i annan Lalwa an egzistans. E la Mr Speaker mon pou bezwen pran 2 minit pou dir letan nou pou konpran sa de latib, i annan e *existing table* ki nou pe servi la, e an Avril - lafen dimwan Avril pou anna en nouvo latib an sirkilasyon.

Lo *band 1 Step 1* ki en serten Onorab pe fer referans avek, mwan mon vwar klerman letan mon *magnify* mon paz Mr Speaker. Sonm ki lo *Step 1 Band 1* i R5mil485 parey Onorab Henrie ti fer referans avek. Sa nouvo sonm ki sa lot Manm pe dir, mon pa war mon Mr Speaker.

Comme d'habitude Mr Speaker letan nou pe koze dan Lasanble olye fer referans faktyel avek dokimantasyon ki an egzistans. Nou tann en bann

kalite *statement* ki ganny fer ki napa fondasyon.

La nou pe fer referans avek en sirkiler, si zot, zot napa fer zot demars pou zot rode avan bann ki larestan pou koze, i koze koumsa zot kapab fer referans direk avek en dokiman tanzib, pou zot Seselwa sa lenformasyon ki zot bezwen.

Mr Speaker, sa sirkiler i eksplik nou ki pou annan en konsolidasyon *allowance*. Alor nou pou war premyerman ki saler lo sa latib ki nou pe servi la pou lemoman i pou ganny totale avek bann *allowance* ki an egzistans ki pou ganny azoute avek pou fer en sonm total.

Sa i enkli *marketable skills allowance, graduate allowance, PSC performance allowance*, e osi Mr Speaker sa *5percent supplementation allowance*.

Sa 5poursan li nou bezwen retourn lo la, i en *increment* ki ti ganny donnen letan *salary grid* ti pe ganny amande an 2019, kot sa lepok letan tou dimoun ti pou ganny 5poursan *increment* dan zot saler zot ti pou ganny li lo zot *gross salary, zot basic salary*. San zot bann *allowances*.

Sa letan, letan nou ti fer deba dan Lasanble Mr Speaker, ti annan en propozisyon sorti

kot Lopozişyon sa letan *LDS*. E nou ti dir olye fer li 5poursan *across the board*, annou total sa ogmantasyon ki pou gannnen e annou fer li *equal* pou tou dimoun pou ganny menm kantite.

Sa letan Mr Speaker nou ti demann pep Seselwa pou solider, akoz ozordi nou pe koz lo kou lavi Mr Speaker, menm sa lepok ti annan bokou difikilte, pou en Gouvernman ki ti pe fer byen sa letan Mr Speaker, akoz *mismanagement* souvan piblik pa ti gannnen bann benefis ki zot ti devret gannnen.

Me nou, nou ti pe fer sa zefor pou sey dir avek zot, zot ki ti fer desizyon, zot ki ti Egzekitiv, nou ti pe sey dir zot ki konsidere pou fer li pli *fair* sa bann letan pou donn tou dimoun menm parey.

Mr Speaker, sa letan 5poursan *increment* ti zis R274 pou sa dimoun ki lo pli ba *band*. Mr Speaker, nou ozordi sa ki nou pe propoze, i tou sa bann *allowance* azout ansanm avek sa *basic salary*, e letan nou'n ganny en total nouvo saler i pou *include* en *increment* 10poursan.

Mr Speaker, nou al pli lwen pou dir ki si sa 10poursan pa ariv R1000, nou nou'n dir nou pou *increase to R1000*.

Savedir en dimoun ki ganny pli ba ki R10mil letan in azout tou son *allowance* ansanm, i pou ganny li R1000 *increment*, me non pa R880 ouswa R910, i pou ganny R1000 *minimum*.

Sa i en keksoz ki nou pa'n tandre lot kote latap pou dir pep Seselwa ki *salary* pli ba, li i pou garanti R1000 *increase* lo son saler.

Mr Speaker, sa pe vin dan en letan kot nou fek sorti dan *COVID*. Lemonn antye pe pas dan difikilte ekonomik. Pri lavi in ogmante akoz en keksoz ki'n arive an deor kontrol Gouvernman.

Me akoz bon zeran nou larzan e larzan pep Seselwa Mr Speaker. Zis 2an apre nou kapab *increase the salary grid* dan *public sector* e garanti sa dimoun ki lo pli ba saler anba R10mil en *increment* R1000.

Mr Speaker, si sa pa en Gouvernman ki enterese ek son pep, mon pa konnen ki kalite Gouvernman ki Seselwa pe rode Mr Speaker. Akoz la nou'n war enn ki li i pe fer tou sa zefor pou *increase* saler son pep.

Mr Speaker letan nou kontinyen dan sirkiler, nou vwar ki sa pou ganny aplike direkteman an lafen Avril. E tou dimoun pou benefisy e avek sa bann nouvo sanzman ki pe vin devan.

Mr Speaker - letan nou, nou'n koze parey mon dir - nou pa koz lo fabrikasyon. Nou koz lo fe! E i vremen deplorab letan en Manm parlman i vin devan i dir ek nou koumsa ki en lot Manm ki'n fer en kont, in mal fer son kont. San li fer referans avek en dokiman pou dir sa Manm ki mannyer in fer son kont.

Mr Speaker, Onorab Henrie in dir bomaten ki nou bezwen get devan nou pou nou get ki kalite *leaders*, kalite travayer nou le dan nou Gouvernman dan le fitir.

Mr Speaker, i annan ozordi i montre nou ki zot saler pa vo sa travay ki zot fer. Si konte zot pa konn konte Mr Speaker!

Alor sa ki nou pe sey dir lo kote Sekter Piblik. Annou met en zefor pou nou pey dimoun byen, pou annan travayer ki kapab donn valer son saler.

Mr Speaker, nou'n tann lo pansyon R10mil. E la mon ti ava kontan fer en siplikasyon avek lot kote pou silvouple anmenn fe reel, pa fabrikasyon Mr Speaker. Dir nou kote, ki dat ki sa ti ganny dir?

Akoz mwan mon rapel en *statement* ti ganny fer letan larzan pansyon ti sorti R3mil ekek pou mont plis ki R5mil,

kot en referans ti ganny dir ki si 2 dimoun aze dan en lakour pe anmenn plis ki 5mil an traver zot pansyon, i fer ki en lakour en koup i kapab ganny li plis ki R10mil.

Sa mon rapel lo kote R10mil Mr Speaker. Kote ki nou ti dir pansyon pou mont R10mil i en konfizyon total ki zot pe abiz en group dimoun ki pli vilnerab pou krwar ki ti annan en dimoun ki'n dir ki pansyon pou vin R10mil.

Mwan mon demann zot ozordi Mr Speaker, mon fer en siplikasyon ek zot pou anmenn sa fe devan nou pou dir nou kote sa dokiman i ete ki dir sa!

Mr Speaker, mon konnen mon letan in preske fini. Me solman mon pa kapab fini san dir ki Sekter Prive pou osi bezwen zwe en rol. Nou ganny fe, nou ganny dir ki dan Sekter Piblik i annan 10mil ekek travayer me dan Sekter Prive i annan plis ki 35mil ekek travayer Mr Speaker.

Mr Speaker parey Gouvernman i en anplwayer i annan son kad travay ki i pran dimoun. Sekter Prive osi letan i anploy en dimoun i annan son kad travay. Alor mon krwar Sekter Prive i deza pe zwe son rol, pou li letan i pran en dimoun ofer li en saler ki i *up to*

sa dimoun pou li decide si sa i vo ouswa non.

E mwan mon vreman krwar ki lefe ki Sekter Prive ki mentenir - ki mentenir Bidze Gouvernman, nou bezwen donn li son respe ki i devret gannyen pou nou konnen ki li i pe fer son travay pou kapab soutenir sa Bidze ki ozordi in ariv plis ki R10bilyon. E la i pou *increase* ankor ek sa *increment* Mr Speaker.

MR SPEAKER

Terminen Onorab.

HON FLORY LARUE

Mon remersi ou Mr Speaker.

MR SPEAKER

Mersi. Onorab Naidu.

HON SATHYA NAIDU

Mersi Mr Speaker. Bonn apre midi VP ek ou delegasyon ek tou koleg Onorab.

Size ki devan nou se sa 10 poursan *increase* dan saler pou nou bann *public servants* e sa i ekskli bann *Constitutional Appointees*. E i pou annan en sanzman dan latab e tou lenformasyon i dan sa sirkiler.

E parey mon koleg Onorab Adelaide in demande, i enportan pou vin devan avek medya pou eksplik sa fason fer, akoz i en nouvo fason fer e

byensir Lopozisyon i pa abitye avek en nouvo fason fer. Zot abitye avek en vye *mindset*, vye fason fer e bann fason fer ki pa pou *attend* en rezilta tel ki en *public service* ki pe perform alaoter.

E nou pep i annan en lekspektasyon atraver sa lamannman nou pou war nou bann *public servants*, pou ganny en *increase* e ler zot pe ganny sa *increase* mon swe se ki *service delivery* osi pou sanz en pti gin, an sa ki konsern la fason ki nou *public service* pe fonksyonnen ozordi.

E an menm tan fodre ki nou pram konsiderasyon ki bann mezir ki *PSB* pou bezwen pran pou kapab osi asire ki i annan en bon *retention rate* dan nou *public service*. Parfwa nou tant pou perdi dimoun dan Gouvernman akoz zot al dan Sekter Prive e zot dir ki dan Sekter Prive lapey i pli bon laba.

E se pour sa rezon nou'n koman en legzersis e ler lekonomi nou pei pou permet fodre ki nou regard bann *Scheme of Service* pou bann ansennyan, pou bann ners e lezot kad travayer ki santi ki fodre ki zot *welfare* i ganny get ladan.

Me selman nou bezwen konsyan poudir ki pei kot in sorti pou kot nou arive ozordi,

nou'n fer en travay remarkab. E parfwa dan lavi tou keksoz i ariv pou en rezon. Si Oktob 2020 se Prezidan Ramkalawan ki la koman Prezidan se akoz sa pep in santi in plis ki ler pou en sanzman.

E Bondye osi ki mon fermeman krwar ladan in osi zwe en rol pou fer sir ki nou en *leadership* ki responsab. Si nou ti annan sa *leadership* ki ti la pandan sa dernyen 43an mon krwar pa si nou ti pou asiz isi dan sa Lasanble pou diskite en *10percent increase*. I ti pou bokou pli grav e tou keksoz parey mon'n dir i ariv pou en rezon.

E a sa ki konsern *public service* i osi annan en nesesite pou nou kapab *do away with dead wood*. Parfwa i annan en dimoun ki pe deservi en responsabilite be parfwa ou pa bezwen de diferan travayer pou desarz menm responsabilite! An dot mo i annan diplikasyon ki ankor la me sa sistenm gouvrenans ki nou'n erite, sistenm gouvrenans 43an nou pa pou kapab sanz li *within a matter of days*.

I annan en ta travay ki nou, nou pou bezwen fer. E i enportan i nou idantifye sa dan tou bann departman respektif.

An sa ki konsern sa Prozedlwa ki devan nou i fer

mon mazin ler nou ti pe diskite trezyenm mwan, ki bann pwen ki Lopozisyon ti pe fer, zot ti pe distort sa demars ki Gouvernman ti pe fer pou garanti 50poursan e sa lot 50poursan travayer i performen pou li ganny son larzan.

Be ki zot, zot ti pe dir zot ti pe dir le kontrè e zot ti pe promouvwar en latitud trenn lipye, en latitud parese! E la mazorite sa pep pa oule war sa. E mon demann mon lekor en kestyon, eski nou vreman annan en Lopozisyon ki responsab?

Lafason ki zot a pe fer zot politik i pa byen ditou. E la mon pe lans lapel avek bann dimoun ki serye la deor, vin devan avek zot pwennvi, dir nou Gouvernman kot nou kapab fer pli byen, donn bann propozisyon pou nou kapab bouz de lavan.

Akoz sa Lopozisyon lo lot kote latab pa pe perform zot responsabilite e pa ti a mal war en lot Lopozisyon dan plas Parti *US* dan wityenm *cohort*.

(APPLAUSE)

HON SATHYA NAIDU

Mr Speaker bokou in ganny dir lo Sekter Prive. Me konbyen dimoun dan en *household* i sorti dan Gouvernman e son

msye par egzantip i pe travay dan Sekter Prive be sa madanm ki travay dan Gouvernman i pa pou ganny en pti *increase*? Ok, i pa pou anmenn en *household income* pa pou monte? Ou konpran?

E an relasyon avek Sekter Prive Lopozisyon pe enpoz lo Gouvernman pou dir ou bezwen dir zot fer monte. Be si zot fer monte saler zot travayer, eski kou lavi pa pou monte ler zot pe rann en servis? Kote zot pou tir larzan pou donn en logmantasyon?

E pa zis sa, nou fe sorti en moman ekstrememan dir, kot en bon pe biznes in bezwen fermen e zot in bezwen re ouver e pou zot kapab ganny en lelan pou zot kapab kontiny zot aktivite, en sel kou zot pou ekspekte donn en logmantasyon?

Parfwa bann pwen ki zot fer napa okenn lozik ladan, napa okenn sibstans ladan se zis bann largiman ki vreman mon pa kapab dekrir li.

Me selman an relasyon avek sa i kler ki Gouvernman dizour i annan en plan transformatif e i annan en kantite keksoz pou nou aranze. Partou kote ler mon regarde sa kantite problemanm osi ki nou annan pou nou kapab adrese e trouv solisyon.

E *when you look at the society that we are living in today*, i annan en kantite eleman ki vreman pozitiv. E enn bann keksoz ki pozitiv ki mon koleg Onorab Loizeau in soulinyen, se nou annan en Gouvernman ki pe valoriz bann teknisyen. Nou pe donn zot sa plas ki zot merite.

E mon oule dir mersi a sa ki konsern tou bann endividi ki'n enplike dan sa travay; ki sa sirkiler ki zot, zot pa pe war kler zot pa pe war ki bor i ete ki la, i la koman laprev travay ki'n ganny fer, pou kapab asire ki lafen dimwan Avril ler en dimoun i war son *pay slip* i pou war son *increment*.

E parey mon koleg Onorab Adelaide in dir li si i annan okenn laprev poudir pa pe ganny son *increase* la anmennen devan Lasanble.

Mon pe lans en lapel avek Lopozisyon si zot *at least* kapab fer sa bout sa travay *at least* akoz zot pa pe delivre. An sa ki konsern *the road to transformation* i vreman annan en kantite keksoz pou nou fer, selman pandan sa dernyen 2an edmi tou bann Prozedlwa ki'n vin devan in dan lentere nou pep, in dan lentere nou pei.

E byensir i pou annan lezot enterven an apre e mon swe se lot kote latab silvouple

vin fran ek sa pep, pa *distort* lenformasyon. Dakor nou annan en *droit des expressions* nou annan liminite dan sa Lasanble me annou pa abiz li. Mersi Mr Speaker.

MR SPEAKER

Mersi Onorab. Onorab Johan Loze.

HON JOHAN LOZE

Mersi Mr Speaker. Bonn apre midi Mr Speaker, tou koleg Onorab e tou dimoun a lekout.

Mr Speaker pou komanse zis pou kadre keksoz zen pti pe dan lord, *Botanical Gardens Foundation* letan ti pas vol e dife ti ganny mele i ti fonksyonn anba en *Board*. Pa anba Minis me anba en *Board*.

Now Chairmanship Board sa lepok ti dan lanmen en Mr Flavien Joubert - enportan note. Pa SG, pa *ex-Minister* Mr Flavien Joubert mon'n zis poz sa la trankilman.

Mr Speaker nou'n komans lir *Bill* ki devan nou Lasanble nou pou lir *Bill*;

“Public Service Salary Amendment Bill, 2023” Onorab Adelaide ou ti aret la. *Explanatory statement of objects and reasons for the Bill*;

“The object of this Bill is to amend the Public Service Salary Act, 2013 in order to sever,

sever” koupe *“the provisions for the salary payable to public officers, generally from the ambit of the Act, and retain only the salary payable to those occupying specified constitutional posts.*

Upon the enactment of this Bill the Public Service Salary Table shall continue to apply in respect of the officers occupying constitutional posts as specified under the Second Schedule until the salary review in relation to them is completed. For that reason, the definition of public service has been amended to restrict the application of the Bill to those categories of officers.”

Onorab Adelaide ler ou'n lir *“Public Service Salary (Amendment)”*- Onorab Larue ler ou pe dir sa pou fer ek *salary*.

MR SPEAKER

Onorab! Onorab!

HON JOHAN LOZE

Yes Mr Speaker. Mon demann leskiz, mon demann leskiz Mr Speaker.

MR SPEAKER

Ou pa adres bann Manm silvouple.

HON JOHAN LOZE

Mon demann leskiz Mr Speaker. Me ler zot pe dir poudir *public service salary* i *apply* pou travayer dan servis piblik lanmenm la anba i dir;

“for that reason the definition of public service has been amended to restrict the application of the Bill to those categories of officers”.

Vedir lapwentman konstitisyonnèl *mes chers amis*. Lala travay ki devan nou se pou nou protez nou saler aköz nou logmantasyon pa ankor pare. *Faute rien* pou fer avek travayer dan servis piblik, zot in ganny tire! *Severed* in dir *severed*, zot in ganny tire zot in ganny pous akote.

Devan nou napa 10poursan. Devan nou i annan sa ki mon'n lir la okenn mansyon 10poursan napa ladan i annan zis *repeal, repeal, repeal* apre i met Anbasader. Kote zot in war 10poursan ladan zot?

Travay devan Lasanble Nasyonal ozordi napa 10poursan, napa logmantasyon, zot pe *mislead* Lepep Seselwa. zot pe koz *la..lang!*

(APPLAUSE)

HON JOHAN LOZE

Arete! Arete!

Mr Speaker sa bout papye ki mon'n lir la i *Bill* ki devan nou sa i Lalwa ki nou pe travay lo la sa, zot soufer menm par natir zot i travay ki nou pe fer ozordi. *Now*, mon oule ganny en leklersisman ek Madanm Clerk si Madanm Clerk in ganny akse avek en sirkiler limero 3 sepa limero 4 e si Madanm Clerk in sirkil sirkiler avek nou?

Parske nou lo sa kote latab nou pa'n ganny akse ek okenn sirkiler. Yer mon *attend Bills Committee* Mrs Mohideen ti la, Mrs Mohideen mon pa pou apel ou Mrs Mohideen *Performance-Based* parey kelken fek fer. Mrs Mohideen ti prezan i pa'n nonm nou sirkiler li, i pa'n dir nou i annan sirkiler pou nou travay lo la pou nou diskite ozordi.

Now Mr Speaker eski ou Sekretarya eski Madanm Clerk in kasyet nou en sirkiler? Eski i annan en sirkiler ki nou, ou sipoze pe travay lo la ozordi ki nou'n ganny kasyet mon ti a kontan ganny en larepons? Parske nou'n ganny dir nou pa pe refer lo sirkiler.

MR SPEAKER

Mon pa'n zanmen tande ki ou kapab kestyonn Clerk dan deba lo *Bill*.

HON JOHAN LOZE

Mr Speaker *but then* mon pe kestyonn ou eski i annan en sirkiler ki zot pe kasyet nou?

MR SPEAKER

Kontinyen avek ou lentervansyon Onorab.

HON JOHAN LOZE

Mersi Mr Speaker. Be mon anv ganny en leklersisman parske nou pe ganny akize konmkwa ki i annan en sirkiler pou travay lo la, ki pe travay lo la e nou, nou pa pe fer referans ek sirkiler nou bezwen al fer resers.

E mwan mon'n dan sa *process* mwan. *Bill* pe pas ozordi *Bills Committee* in *meet* yer, yer ki nou'n zwenn *sponsors*, yer ki nou *meet*, nou'n travay, nou'n fer lesansyel. Ti napa sirkiler. I sipoze annan Polisi nou'n ganny dir e depi yer dan *Bills Committee* nou'n ganny dir poudir i annan *strong* Polisi.

I annan *strong* Polisi ki pe vini. Me personn pa'n met Polisi devan nou! Personn pa'n dir nou *rien a voir...*

MR SPEAKER

Onorab! Arete! Arete Onorab! Aret en pti kou!

Nenport keksoz ki annan pou klarifye VP i a klarifye letan i a rann repons lo deba se pa

bann Manm ki reponn deba en lot Manm, se VP ki'n prezant *Bill* ki reponn en lot Manm. Mersi. VP i a klarifye. Onorab Kontinyen. Onorab terminen silvouple ou pe al lo 10 minit.

HON JOHAN LOZE

Mersi Mr Speaker. Mr Speaker dan nou travay ki devan nou ozordi, se lamannman sa Lalwa, lamannman sa Lalwa se pour tir travayer servis piblik anba sa Lalwa.

Be sa Lalwa i napa zis logmantasyon. Nou, nou lobzeksyon ki nou ti pe sey fer se ki i annan en kantite *based protections* ki travayer i gannyen anba sa Lalwa, ki'n ganny anleve. Letan in ganny anleve prezan nou anv konnen kot narle.

Mrs Mohideen ou dir nou ou pou viz *towards strong policies*, sa ki ou'n dir nou yer devan *Bills Committee*. *We have to take it on trust* dir *the time being* ki ou pe viz *towards strong policies*. Mon ti a kontan si sa bann *policy* ti'n ganny *laid before the National Assembly*, ki nou tou nou ti a ganny akse avek nou ti a kapab *peruse*.

E la mon pa pe dir zis sirkiler la. Mon ti a kontan ganny *Policy document* ki *-from what I understand has already been approved by Cabinet* - be i

paret ki i an en kantite lenformasyon ki pe ganny kasyet avek nou lo sa kote latab!

E *furthermore* lenpresyon ki mwan mon annan se ki lot kote latab *they are going based*, lo en kantite lenformasyon ki zot in deza ganny akse avek, avek Gouvernman.

E nou, nou napa nou! Sel keksoz ki nou annan pou travay avek devan nou se sa morso Lalwa, ki pe tir travayer servis piblik anba en kad legal anba en proteksyon legal e i pe met zot nou pa konnen kote. In met zot dan en *limbo as far as we are concerned*.

E nou ki pe asiz isi anndan ki pe ganny demande pou lev lanmen pou sa demars.

Be i annan en bout ki manke, *this is all we are saying*, kote zot pe ale? Eski nou kont logmantasyon 10poursan be kote ki annan logmantasyon 10poursan la? Ki bor ki annan logmantasyon 10poursan la ki nou kont? Napa!

nou anvi konnen nou osi kote logmantasyon 10poursan i ete be montre nou! Ler zot in montre nou, nou tou nou a trouve. Zot in dir al lo medya, mediatize, be lala in fini medyatize mon'n fini lir ki annan ladan.

Tou dimoun i tande ki annan ladan mon'n lir be ki plis medya pou ale? Zot in nou en bout louvraz pou fer ler nou fer sa bout louvraz dan sa fason restren ki'n ganny met devan nou zot ankoler. Be se sa ki zot in dir nou fer. Amann sa *Bill* ki la, e nou, nou zis anvi konnen kote bann *based protection of* travayer Seselwa pe ale. E zot dir nou, nou konfiz dimoun.

Enn i vini i dir li *base minimum* pou annan logmantasyon R1800, Onorab Larue i vini i dir si ou ganny mwens ki R1000 nou pou fer li vin R1000, be *based* pa ti fek 1800? *Minimum* pa ti fek 1800? En pti moman i si ou ganny mwens ki mil? Si ou ganny mwens ki mil nou fer li vin mil? Be zot SG in dir 1800. Keler ki annan mwens ki mil?

(Interruption off-mic)

MR SPEAKER

Onorab! Onorab!

HON JOHAN LOZE

Wi Mr Speaker?

MR SPEAKER

Mon senserman krwar ou pe mal lenterpret sa ki'n ganny fer, sa ki'n ganny dir avek ou bann komanter lo *minimum*. Mon pa'n tann Manm dir sa mwan.

Alor mwan pran sa Lotorite pou koriz ou lo sa pwen. Silvouple kontinyen.

HON JOHAN LOZE

Wi Mr Speaker. Dan ou kapasite koman Sef LDS ou koriz mwan, mon aksepte, *I bow down to your authority* koman Sef LDS.

(Interruption off-mic)

MR SPEAKER

Order!

HON JOHAN LOZE

Mr Speaker ozordi dan sa Lasanble nou'n arive trouv 2 avoka pa enn 2 avoka ki per Lalwa. Ou kapab krwar Onorab Georges ozordi in arive per Lalwa?

Avoka ki son louvraz *is to advice the Law* i dir nou tir proteksyon travayer dan Lalwa, met kekpar. Nou pa konnen kote - *again* mon repete nou pa konnen kote nou. 2 avoka.

Onorab Clifford Andre i vini i fer parey i dir nou deley Lalwa ki protez travayer met kekpar. Be konmsi Lepep Seselwa pa war en keksoz drol? Zour avoka ki son dipen son *bread and butter* se Lalwa i vini i dir nou meyer keksoz ki nou kapab fer ozordi se deley Lalwa efase?

MR SPEAKER

10 minit Onorab.

HON JOHAN LOZE

Mr Speaker in annan en gran lenteripsyon dan milye mon *speech* mwan.

MR SPEAKER

Mon'n donn ou 2 minit an plis.

HON JOHAN LOZE

Mr Speaker lot keksoz, zot pe fer bokou referans lo logmantasyon ki ti donnen 2019. Mon pa vreman anvi al laba me mon zis an vi fer en referans e Vis-Prezidan Afif ti fer sa letan.

Zot realize poudir ler ti donn ogmantasyon par poursantaz e mon pa pe koz lo konbyen poursan la, Prezidan Ramkalawan sa letan ti dir koumsa logmantasyon par poursantaz i ogmant lekar ant sa ki pli o avek sa ki pli ba.

Sa ti son rezonnman, tan ki nou donn par poursantaz lekar pou kontinyen ogmante alors annou donn en sonm annou donn tou parey akoz ler ou donn poursantaz sa ki anler i ganny plis e lekar i ogmante.

MR SPEAKER

Onorab terminen silvouple.

HON JOHAN LOZE

Mon a terminen avek sa refleksyon Mr Speaker. Dan sa Lalwa la ti annan en proteksyon pou sa. Konmkwa ki *the lowest band* ek *the highest band* sa enn pli o pa ti kapab zanmen e 20 fwa pli o ki sa enn ki pli ba ant sa de in tire la.

La nou pa konnen ki kalite melimelo pe al vini la, e zot pe vin fer egzakteman sanmenm ki Prezidan Ramkalawan ti dir pou arive, ki zot pe kre lekar ant sa ki pli ba avek sa ki pli o e sa lekar ki zot pe kree pou kontinyen ogmante. Parol Prezidan Ramkalawan. Mersi Mr Speaker!

(APPLAUSE)

MR SPEAKER

Bon mon'n termin sa lalis ki mon ti annan, i reste bann ki'n lev lanmen lo dernyen moman i reste mwan 30 minit pou deba e i annan 6 zot. Mon pe donn zot 5 minit sakenn. Onorab Rosie Bistoquet.

HON ROSIE BISTOQUET

Mersi Mr Speaker. 5 minit i en pti pe ptigit. Mersi Mr Speaker. Bonzour tou dimoun. Mr Speaker avan mon koman mon pti lentervansyon atraver ou Mr Speaker mon oule pas en mesaz avek bann zabitan Pointe Larue

pou note ki mon'n ekrir mon lentervansyon mwan menm à *ma façon*.

(APPLAUSE)

HON ROSIE BISTOQUET

Napa personn ou okenn Manm dan Lasanble ki'n donn mwan lanmen pou ekrir mon pti lentervansyon.

Mr Speaker mon pou siport sa *Bill* aköz Seselwa i bezwen met larzan dan son pos pou soulaz zot fanmir, menm si Lopozisyon in plennyen kot zot in dir ki sa *Bill* i pa koz m pa pe koz lo saler nouvo saler dan *salary grid* pou bann travayer bann *civil servant*.

Zot pe fer krwar Seselwa lizour pou aswar. Mr Speaker *COVID* in anmenn en kantite problem. Sa ki nou konnen malgre in anmenn problem me in osi anmenn sa ki bon pou nou e kot nou trouve poudir nou pei in pas dan en kantite sityasyon.

Me avek *LDS* ki'n pran sa pei atraver eleksyon demokratik Sesel in anmenn en kantite in trouve letan in antre dan sa pozisyon Prezidan Ramkalawan in pas dan en kantite kosmar, nou pei in pas dan en kantite kosmar letan nou ti pran. Parey nou konnen

COVID in ganny met a lafen gras a *LDS*.

Ti napa prodiksyon me selman napa okenn zonm, okenn fanm, okenn zanfan ki'n mor lafen napa personn ki'n dormi vant vid. Malgre tou pandan *COVID* tou travayer - sirtou bann travayer esansyel ti donn zot tou pou fer sir ki Sesel i met *COVID-19* avek tou son varyan anba kontrol.

Me menm si *COVID* ti ganny met anba kontrol lekonomi, i mondyal ti ankor pe fer fas avek diferan problemn sirtou parey nou konnen lager ant *Ukraine* avek *La Russie* kot Sesel in bezwen kontinyen siport son pep.

Dieu soit béni ki personn pa ankor mor lafen avek laswaf parey mon'n dir sa sey aköz Gouvernman *LDS* i kontan son pep i kontan tou son zanfan se pour se la Mr Speaker ki Sesel Pou Tou Son Zanfan in enstri dan nou *manifesto LDS*.

An plis ki sa Mr Speaker Gouvernman *LDS* in fer sir ki tou son zanfan espesyalman zanfan lekol, in ganny asiste avek en *breakfast* toulezour pandan letan ki zot pe lekol.

Isi Sesel i annan bokou bann *single mothers* e sa nou konnen sa ogmantasyon i pou kapab ed zot pou zot kapab met en lasyet manze ki en pe pli

meyer lo lataz zot fanmir aköz nou Gouvernman i kontan tou son bann madanm. I pa zanmen 'eksite' ler i war zot.

Mr Speaker avan mon vin dan mon pou al lo kote, avan mon ti vin dan Lasanble mon ti en *civil servant* mon osi se sa ki mon pe santi ki mon bezwen siport sa *Bill*. E mon pe ankouraz tou mon bann koleg ki travay dan lasante aköz mon ti travay laba mon bann frer ek ser, ki sa saler pou osi soulaz zot bokou.

Sa i fer mwan mazine Mr Speaker ki fodre ners ti fer lamars anba sistenm *US*, pou kapab ganny en pti ogmantasyon zis 5poursan, zis mazine dapre *Scheme Ners* ki lontan in la en bann syek de syek en ners kalifye ti pe ganny R7200 ziska 2020 zis mazine.

E Mr Speaker ti pran lasosyasyon avek bann tim ners 3an pou kapab negosye e ou konnen kan ners ti komans ganny ogmantasyon? An Septanm 2020 zis avan zot konnen kwa. Pa bezwen dir. E Mr Speaker ozordi mon kontan pou war ki bann ners in kapab ganny soulaze.

Avek sa *Bill* i a osi anmenn plis sourir lo zot figir. E Mr Speaker eski sa pa i anmenn en soulazman pou tou bann ners dan Sesel e osi bann lezot

travayer? Mr Speaker mon pa kapab pa nonmen akoz i annan bann lezot travayer ki napa en kad legal ouswa en kad administrativ.

Par egzanp en sanniter kalifye pe ganny li R8mil.

MR SPEAKER

5 minit Onorab. Terminen *please*.

HON ROSIE BISTOQUET

Wi Mr Speaker. Be selman i pe ganny li R5mil, R8mil be selman mon krwar sa logmantasyon i a kapab soulaz zot.

En drayver Mr Speaker ganny li R8mil parey en *porter*, e sa mon krwar sa ogmantasyon i a kapab ed zot kapab kontinyen fer sa travay ekselan. En *cleaner* osi pe ganny li zis R6mil e mon krwar sa osi sa ogmantasyon i ava asiste zot pou aste en pti pe plis *omo* pou lav zot lenz.

En asistan ners pe ganny li R7200 eski sa ogmantasyon sa 10poursan pa i a ed zot pou ate en pti pe plis legitim sirtou protein pou met repa lo zot fanmir toulezour.

Mr Speaker wi nou Gouvernman LDS in mazin tou son zanfan. Prezidan in fer parey nou tou dan lakour nou abitye fer dan lakour Seselwa i

pa'n fer gaspiyaz in anmas tou sa bann pti sou i pa'n les personnn donn bal dan *taxpayers money*.

Alors tou sa pti *savings* ki in partaz avek- ki ozordi i pe partaz avek son pep i pa'n zanmen mazin li avan Seselwa.

Mr Speaker avan mon terminen parey ou'n dir mwan mon letan pe fini. Mon ti a kontan petet atraver ou pou demann VP i annan en kantite lezot kad travayer ki napa en *scheme*. Par egzanp mon konnen sanniter i annan enn de ki pa'n gannyen eski administrative ki mon pe dir.

Eski Gouvernman i annan okenn sistenm baze lo sa RBM ki pou anmenn en soulazman pou zot? E osi sa ki mon'n trouve par egzanp i annan bann post ki'n ganny bann dimoun pe travay ladan, par egzanp mon a donn en legzanp;

Manager; i annan *manager* kot HFC, i annan *manager* kot Lakaz, i annan *manager* kot Lasante, *manager* kot Minister Ledikasyon sirtou bann teknisyen *manager* ki mon pe koz lo la eski-. Me selman tou sa bann *managers* zot *scope* i diferan.

Avek sa Mr Speaker eski petet avek sa sistenm RBM pou kapab ede pou met zot lo menm saler?

MR SPEAKER

Mersi, Onorab ou a terminen.

HON ROSIE BISTOQUET

Avek sa Mr Speaker mon pou siport sa *Bill* e mon pou dir tou bann dimoun Pointe Larue ekoute, gete, zize zot menm, nou a gete si nou *MNA* pou siport sa *Bill*. Mersi.

(APPLAUSE)

MR SPEAKER

Onorab Georges Romain.

HON GEORGES ROMAIN

Mersi Mr Speaker. Bonn apre midi Mr Speaker. Bonn apre midi *VP* ek delegasyon e tou dimoun a lekout bonn apre midi.

Mr Speaker zis avan mon komanse mon ti a kontan dir Onorab Loze sa 10poursan ti anonse dan Bidze lannen pase.

Mr Speaker mon'n asize mon'n ekout lot kote latab koze, mon santi i mon devwar pou dir enn de mo. Mr Speaker ler *LDS* ti vin o pouwar an Oktob 2020, Gouvernman ti vin ek Lalwa pou sispann trezyenm mwan saler an vi ki pei ti napa larzan pou kontinyen donner.

Me ki nou ti vwar Mr Speaker Lopozisyon ti lager

lebra kase pou dir fodre donn trezyenm mwan saler.

Mr Speaker an 2022 Bidze ti fer provizyon pou donn trezyenm mwan saler 50poursan garanti e lot 50poursan ti pou baze lo ou performans. Ankor ki nou ti vwar Mr Speaker Lopozisyon ti dir fodre donn 100poursan.

Mr Speaker apartir sa mwan Avril, tou travayer piblik dan Gouvernman pou ganny en ogmantasyon 10poursan lo zot saler sa apre ler nou'n fini azout bann *allowance*. Ankor enn fwa Lopozisyon pe konplent menm olye siporte zot rod tou kalite leskiz pou konfiz nou pep la deor.

Mr Speaker mon oule fer Lopozisyon okouran ki sa i pli o ogmantasyon ki en Gouvernman in deza fer dan sa pei. Oli problemm Mr Speaker?

Mr Speaker eski Lopozisyon pa oule vwar Seselwa ganny en meyer lavi? Mr Speaker mon osi okouran ki i annan lakonpanyen prive ki pe al donn ogmantasyon saler son travayer. Sa i tre ankourazan Mr Speaker.

Mr Speaker mon pa pou long, pou fini Mr Speaker mon'n tann Onorab Herminie dir wi zot pou pran sa 10poursan ogmantasyon saler.

Onorab Herminie zot merit pran akoz sa pa larzan en parti politik parey zot ti fer nou krwar ler zot ti donn R50 nou bann dimoun aze tou le lannen ler sa Prezidan ti ganny son lanniverser. VP avek ou delegasyon pou ganny mon *full sipor* lo sa *Bill*. Mersi Mr Speaker.

(APPLAUSE)

MR SPEAKER

Mersi Onorab. Onorab Lemiel?

HON SYLVANNE LEMIEL

Mersi Mr Speaker. Bonn apre midi tou dimoun a lekout. Mr Speaker depi bomaten nou'n tann en bon pe koze mon kapab dir an sa ki konsern en senp *Bill*, ki'n vin devan nou ki pe demann nou pou fer en amannman lo *Public Service Salary Bill*, 2013.

E sa in ganny anmennen ozordi le 12 Avril kot nou e mwan mon ti a kontan tous lo enn de pwen ki sanzman ki sa lamannman dan sa *Bill* nouvo *Public Service Salary (Amendment) Bill*, 2023 in anmennen.

In annan manm ki'n tous brefman lo la, me selman ler nou pe get sa *Public Service Bill*, 2013 ki li i ti konpri tou keksoz

an sa ki konsern saler en travayer dan servis piblik.

Ladan sa ki nou pe war pe ganny amande pe ganny *repeal* ozordi i, sa ki pe ganny kite ki i pe dir nou fodre amande i seksyon 4 sa i sa *Public Service Salary Table* kot zot pe *get rid of* sa latab saler, ki ti annan li 20 *band* avek 15 *step* e zot pe ranplas li par sa *salary table* 12 *band* 15 *step*.

Sa i en amannman ki pe ganny fer pou dimoun la deor konpran en pti pe. Kot mon bann koleg in fer resorti kot dilenm petet i vini *or* en pti pe leksplikasyon ki nou bann dimoun la deor i merit konpran, bann seksyon ki pe ganny *repeal* ki nou, nou pe ganny dir par egzanp seksyon 5 i pe ganny *repeal* li, i ti koz lo *basic principles of Public Service Salary Table*. I ganny *repeal*.

Parey mon'n dir tir sa lot latab anler i met sa enn anba. Seksyon 6 li menm "*salary in case of promotion or transfers*", travayer pou bezwen rode ki arive prezan?

Wi nou pe ganny dir pou vin ganny met dan en nouvo Polisi. Depi bomaten Mr Speaker atraver ou VP ler in prezant nou i dir i pe vin prezant sa *app* ki pou konpri striktir e Polisi saler. Sa ki in koz lo la.

Sa ki mon bann Manm in koz en pti pe for lo la ki lev en pe kontansyon *or* tansyon avek lot kote, i se ki nou dan *United Seychelles* Mr Speaker personn pa kont saler *increase*. O kontrer nou dir donneren donn plis, sa 20poursan i pa ase si ti annan nou donn plis.

Me mwan mon konnen e nou lo sa kote latab nou konnen, en revizyon saler i ganny fer letan lekonomi en pei i pe fer byen. Ozordi *LDS* li i vwar i anv i donn 10poursan sa i meyer ki li i kapab fer, i ti dir i pe vin fer byen in war meyer ki i kapab fer i pe vin donn 10poursan.

Mwan mon ti ava rekomande mon osi koman lekonomi pei i kontinyen fer byen, kontinyen aranz saler traver pep Seselwa! Kontinyen don travayer Seselwa larzan dan son pos!

(APPLAUSE)

HON SYLVANNE LEMIEL

Kontinyen met larzan dan pos Seselwa parey ti ganny dir, ti ganny promet. Pou donneren larzan? Wi donneren ler i annan ou pou bezwen donneren aköz zot ki o pouvwar ozordi! I pa nou ki o pouvwar se *LDS* ki o pouvwar.

E *LDS* li zot pou bezwen realize Mr Speaker i annan

bokou manm in koze laba ozordi nou lo sa aköz saler me bokou zot in koze in dir 43an pa'n fer naryen napa ki zot pa'n dir. Zot in ganny zot sans koze les mwan koze.

Prezan mwan ler mon pe regarde Mr Speaker lavi Seselwa, lavi Seselwa in amelyor en kantite *ok*? Lavi Seselwa in amelyor en kantite depi pandan sa 43an. Saler, lekel ki'n komans donn logmantasyon saler dan sa pei, *LDS*? Be pa *LDS*!

Ti'n komans avek *SPPF*, Lepep, nou'n vin *whatever name* ki nou'n annan ziska ozordi *US*, nou'n kontinyen pe donn larzan pep Seselwa. E ozordi Seselwa in vot pou zot *LDS* in met zot la o pouvwar, pou zot - swadizan in donn zot benefis *du doute* pou vin fer pli byen.

Seselwa ti anv i en sanzman li e in gannyen son sanzman ozordi!

(APPLAUSE)

HON SYLVANNE LEMIEL

E son sanzman ki in gannyen la, i annan mazorite zot ek sa sanzman ki'n in gannyen- (pa bat lanmen, pa pou bat lanmen sa) aköz Seselwa ape kriy lasasen ek sa sanzman la deor.

E ozordi i zot devwar pou zot ki o pouvwar pou zot aranz lavi sa pep, parey zot ti promet li dan letan eleksyon. Zot in fer en ta fo promes Mr Speaker e zot pou bezwen travay lo zot promes.

Zot in dir dan zot manifesto zot in dir zot ki pou amelyor lavi Seselwa, zot pou met plis larzan dan pos Seselwa. So mete e zot pou bezwen kontinyen mete larzan dan pos Seselwa!

(APPLAUSE)

HON SYLVANNE LEMIEL

Mr Speaker, ler ...

MR SPEAKER

Bann Manm kote *LDS* kalme silvouple! Permet nou termin deba. Onorab 5 minit in pase.

HON SYLVANNE LEMIEL

Wi be zot pe *disturb* mwan laba.

MR SPEAKER

Ale, terminen silvouple.

HON SYLVANNE LEMIEL

Mr Speaker letan ozordi i annan e kantite *meeting* ki'n ganny fer avek travayer Seselwa la deor konsernan sa zafer saler. I annan en kantite travayer Seselwa ki annan en kantite

kestyon ki pa ankor kapab eklersi.

I annan bann dimoun ki zot in *attend* bann *meeting*, zot pe pas serten lenformasyon me *still* i annan travayer ki dan konfizyon. *Ok?* I annan en kantite kestyon ki dimoun pe demande ankor ki petet i pa ankor kapab ganny reponn.

E ozordi ki nou pe war avek sa logmantasyon saler? Zot pe dir nou ti donnen logmantasyon saler nou avan 2019 dernyen mon krwar ti donnen, kot zot ti dir poudir - mon bann koleg in koz lo la - Onorab Ramkalawan ki ti la koman *Leader* Lopoziyon pa oule tro gran lekar, Onorab Afif poudir i la koman en manm lo kote *LDS* zot ti anmenn sa bann diskisyon.

Ozordi sa bann gran lekar i plis ki zanmen. Ozordi ki nou pe war travayer la deor menm si i kontan Mr Speaker i pe ganny sa R1000 *or* i pe ganny *whatever* 10poursan ki i pou pe gannyen lo son lapey, me ki son komanter? I dir ou sa ki ris pou kontinyen ris, zot ki napa ki pli ba saler zot pou kontinyen napa!

E se sa ki petet nou ti pou bezwen regarde revwar. Si nou ti pe dir nou pa oule *LDS* i vremen senser i pa oule sa gran lekar ant sa ki pli ba avek sa ki

pli o donn sa ki pli ba par egzanp en 20poursan. Sa ki pli o a ganny 3 poursan sepa 5poursan parey *PUC* pe fer dan son kalite ogmantasyon, ki li i pe sey ogmant travayer. 4poursan, 5poursan 6 poursan apre sa ki pli ba 10poursan.

Petet nou ti kapab vin avek en keksoz koumsa si vreman nou annan bann dimoun ki pli napa nou oule pran zot aker nou ti kapab fer sa. En lot komanter travayer Seselwa la deor Mr Speaker.

MR SPEAKER

Terminen silvouple Onorab. Terminen.

HON SYLVANNE LEMIEL

Travayer Seselwa i dir ou- (wi mon pou terminen Mr Speaker)

Travayer Seselwa ozordi i la deor i dir ou sa pti ogmantasyon ki zot pe gannyen wi nou tou dimoun i kontan i pe anmenn en pti larzan an plis, me *tax* pe anmas plis lo li.

E kestyon ki i pe demande i dir ou eski Gouvernman pe donn nou sa logmantasyon, pou li kontinyen anmas plis *tax*? I vre aköz i annan dimoun ki pa ti pey *tax* pe al pey *tax* prezan. *Ok?*

I annan ki pa ti peye ek sa ogmantasyon i annan ki pou pey *tax*. Pe enport i pou pey *tax*.

I annan dimoun aköz par lao. 8550 pa ti pe peye *tax* i annan dimoun ki zot saler ek sa logmantasyon pe al monte pou vin plis ki sa 8550 i pou pey *tax*.

Menm si i en pti bout i pou pey *tax*. Gouvernman pou kontinyen pe anmas reveni. So mwan Mr Speaker lo kote mon bann manm nou'n koz en bon pe lo sa size. Mwan sa ki mon annan pou mon dir Lepep Seselwa la deor, nou dan *United Seychelles* nou pa zanmen *against* - mon redir ankor mon ti'n dir taler - nou pa zanmen *against* pep Seselwa, travayer servis piblik.

E mwan mon pou dir tou travayer dan Sesel i ganny larzan pou met dan son pos. Aköz Seselwa i bezwen larzan pou li viv, Seselwa i bezwen larzan pou li anmase pou li pey son *loan* pou li pey tou son bann -pou fer son bann *needs* ki i annan.

Otan ki i annan pou donn li donn li e mwan mon oule dir annou arete fer Seselwa krwar ki dan *US* nou napa sa pep aker, i pa laverite sa, i pa laverite.

MR SPEAKER

Mersi. Onorab. Onorab terminen.

HON SYLVANNE LEMIEL

Nou annan Seselwa aker e nou, nou dir lalit nou dan *US* nou pou kontinyen lite! Nou pou kontinyen fer wi nou koze isi dan Lasanble la nou pe ganny limite, mon pe ganny dir depese, depese fini koze *as if* sa ki ou pe dir pa fer sans.

Me nou, nou pou kontinyen koze. Nou pou kontinyen lite pou sa pep Seselwa menm si nou ganny serten lobstak pep Seselwa isi dan sa Lasanble letan nou pe koz pou zot. Nou pou kontinyen koze nou pou kontinyen lalit mon dir zot lalit i kontinyen. Mersi.

MR SPEAKER

Mersi. Onorab si mon pres ou pou fini koze se aköz lazournen pe fini, nou travay pa ankor fini alor nou kontinyen. Onorab Aglae. Onorab Aglae 5minit.

HON EGBERT AGLAE

Mersi Mr Speaker. Bonn apre midi *VP* mon espere bann lezot Manm lot kote pa *disturb*.

MR SPEAKER

Wi mon osi mon espere.

HON EGBERT AGLAE

I en Prozedlwa enportan Mr Speaker e mon krwar ou ti devret fer nou sa loner si nou ti devret travay ziska tar nou ti a

travay. Aköz Lepep i bezwen konnen ki pe pase.

E Mr Speaker mwan sa *Bill* ki devan mwan parey mon koleg Onorab Loze in fer resorti, napa okenn mansyon 10poursan logmantasyon i zis fer mansyon avek en nouvo latab ki pou vin an fors apartir sa mwan pou kouver bann kad ki bann peyman i sipoze ganny fer.

E osi san pran kont osi se ki si ti napa sa latab ek sa *review* bann *constitutional appointees* ek sa bann lamannman ki ladan, ti riske pa war zot ganny en saler ouswa si nou ti pou ganny peye i ti pou *illegal*. Sa i enn.

Dezyenmman Mr Speaker mwan mon oule met lo rikord ki nou, nou pa kont okenn logmantasyon saler aköz pandan sa 43an se *SPPF*, Lepep ek *US* ki'n anmenn logmantasyon saler dan sa pei ziska kot nou ete ozordi.

(APPLAUSE)

HON EGBERT AGLAE

Mr Speaker mon osi konstata ki ler ti annan sa 5poursan logmantasyon saler ki Prezidan Faure ti anonse isi dan sa Lasanble an 2019, nou ti war en ta lipokrizi.

Ozordi zot vin donn 10poursan *across the Board* zot pa koze pou dir lo sa 10poursan annou donn tou parey. Pa pe arive akoz *VP* ozordi ou Vis-Prezidan atraver ou Mr Speaker letan ti pe donn sa 5poursan, ou ti vin ek ou *calculator* ou ti dir donn tou dimoun parey, pran sa R60milyon diviz li par 365 e la tou dimoun pou ganny parey.

Ozordi i byen ki ou matematik in sanze akoz se sa ki Prezidan Faure ti demande letan i ti pe donn 5poursan *across the Board*, akoz zot ti war poudir Prezidan pou ganny 4mil. Be la ki pe arive ek logmantasyon? Sa ki ti ganny plis pou kontinyen ganny plis. Sa en keksoz.

Mr Speaker atraver ou en kot size ankor ki mon anvi touse lo la se, letan zot pe tir sa bann provizyon ozordi mon kontan bann profeser de lwa i pe tir bann kad legal pou met li dan kad Polisi administrativ.

Mon napa problem ek sa mwan, me selman letan pou annan bann rekour legal ki pou vini, zot pe mansyonn *PSAB*, pe mansyonn lot e nou, nou konnen lekel ki kontrole sa bann keksoz.

Ou pe dir sa ki lo latet Servis Piblik li menm li, li menm li ki ansarz e li menm li ki

nominate sa bann prop lenstitisyon sa bann mam lenstitisyon, ki *oversight* i pou al fer avek sa kalite travay ki mon pe dir la?

So en keksoz se ki mannyer ou kapab met en dimoun ki nomin sa bann manm li menm li ki pou aprouve, ki ler pi annan en plent i pou kapab zwe sa rol *oversight checks and balances*? Mon pa war sa i *fair* pou en demokrasi ki nou pe dir nou pe *serve modern*.

Lot keksoz - zot i koz lo en striktir administrative, be oli sa striktir? Akoz zot pa montre nou? Kwa ki zot pe kasyet? Eski in pare sa? Eski in aprouve par *Cabinet*? Nou anvi war sa keksoz nou.

Se sa ki nou, nou pe dir zot ki i annan keksoz ki zot pe kasyet ki nou pa pe war, akoz si zot pe dir nou zot pou annan en striktir administrativ be montre nou.

Zot in koz lo sirkiler? Wi i annan en sirkiler ki'n ganny sorti. Sirkiler i fer mansyon, i fer mansyon latab e i pran kont pou *factor in* sa 10poursan logmantasyon e osi pran kont ki i met sa kad legal pou nou komans bann *constitutional appointees* kontinyen ganny en saler ki nou pa ti pou gannyen si nou pa ti fer sa.

So annou realite, annou vin fran. Zot pe kasyet serten keksoz ek nou e zot pa pe vin fran.

Lot pwen ankor Mr Speaker ki dimoun pe demande. *Ok*, ler zot in fer sa bann konsolidasyon, i byen zot pe dir in fer konsolidasyon be zot osi koz lo sa *PIT, Personal Income Tax* ki pou afekte serten bann *bracket* ki zot saler i en pti pe pli eleve.

Sa zot pa dir ditou sa pou annan dimoun ozordi ki pou pe pey plis *tax*. Ler ou'n fer tou sa bann konsolidasyon. Byensir si ou tonm anba R8000 i Lalwa i presize ou pa pey *tax* ou pa pou ganny afekte, ou pou war ou ganny en pti pe plis.

Be an ki tonm par lao byensir zot pe al pey plis *tax*. E letan nou pe koz 10poursan lenflasyon in antre i pran sa ki pou li e Gouverner Labank Santral li in fer sorti, sa logmantasyon in ganny *privy* ki ti ganny aranze depi Desanm, in fini ganny pran par lenflasyon li menm premyerman, e bann kou eleve ki ozordi pri lavi in pran kont.

So mes chers amis mwan mon pa war drol si en dimoun i ganny peye lafen dimwan i pou get son *pay slip* an Avril i pou war poudir be malgre lot kote latab in balbise poudir zot pou

ganny R1800, zot pou ganny isi. Letan tousala in fini pran kont ou pou gete i annan ki pou sorti ek li forse en R250, en R300. Sa mon asire pou arive.

So Mr Speaker nou koz osi lo depolorizasyon saler piblik tir politik ladan. Mon napa problem ek sa de pri politik ek saler piblik. E i enportan poi nou fer me selman lipokrizi ankor. Lekel ki ti komanse sa bann zafer politik ek *public service salary*? Be se *SNP* ki ti komanse sa.

Apré *LDS* in pran zot in anmennen pou zot napa *fuel* en azanda politik, pou fer Lepep krwar poudir ozordi tou politisyen pe ganny sepa konbyen, tou bann gro post dan bann Minister pe ganny pli o saler.

Me zot war poudir ozordi sa pe refoul lo zot prezan, aköz zot politik ki zot ti anmennen! Ozordi zot pa oule nou koz lo nou prop *allowance*. Zot pa oule nou kloz lo nou prop gratwite, zot per pou nou koz lo la - nou prop pansyon aköz zot ti anmenn en lager kont sa kad saler.

MR SPEAKER

Order! Onorab 5 minit.

HON EGBERT AGLAE

Mon pou terminen Mr Speaker. Akoz zot, ou bezwen fer sir ki kalite politik zot anmennen, akoz i pou zwenn zot dan lepase.

E pou terminen Mr Speaker, pou terminen Mr Speaker, mwan mon war en latitud ek sa Gouvernman liberal ki trakas mwan. Avek sa kalite pratik kot tou sa ki annan i letan ou pe get *grid* sa bann lekar ki annan. Sa ki annan pou kontinyen annan.

E nou pe war en sistenm ki pou vin en sistenm klas isi, akoz letan ou koz ek serten i dir ou be i normal pou li ganny sa kantite larzan. Be annou get sa ki pli pa pe gannyen annou fer li ganny plis akoz sa ki nou krwar dan en sosyete kot sa ki pli for, sa ki pli annan i tyonbo sa ki pli napa.

Me *sorry* atraver ou Mr Speaker, Onorab Georges i dir i pa krwar dan sa kalite. Li i krwar dan bef dan disab sakenn i vey son lizye. Li i krwar dan en sistenm ki pou annan klas, ki pou annan sa bann keksoz parey, tousala se en lagrenn bat latet ki i pe donn nou e nou, nou pa pe krwar ladan.

Alors nou Mr Speaker mwan mon krwar poudir i devret pli transparans avek sa Lalwa, vin ek sa kad

administrativ ki zot anvoy mete, akoz napa proteksyon ki dir ozordi si demen zot leve ouswa Mrs Mohideen ouswa VP menm i deside sanz keksoz dizour a landmen, i reve yer swar i dir be demen bomaten annou fer li koumsa, ki proteksyon ki pou annan? Napa proteksyon anba Lalwa.

Zot kapab sanz keksoz. Nou koz lo *salary review every 5 years* dan kad administrativ manner i pou ete? Eski nou poi *follow* sa, ouswa ler zot, zot santi zot anvi donn en logmantasyon ouswa fer *review* zot pou fer?

So tou sa i bann keksoz ki nou bezwen eklersi sa pep e dir kler sa. Alors Mr Speaker mon pou termin lanmenm. Mersi.

MR SPEAKER

Mersi. Mersi Onorab. I reste 2 manm ki'n lev lanmen mon pou termin la mon lalis la, me nou pou pran en poz me nou a rebran 4er. Mersi.

(BREAK)

MR SPEAKER

Nou rebran avek Onorab William.

HON WAVEN WILLIAM

Mersi Mr Speaker. Bonn apre midi tou dimoun ki a lekout. Mr Speaker lo sa Prozedlwa mon annan *comme* swivan pou dir;

Mon'n ganny lokazyon pou mon pas lo rapor *Bills Committee* lo *meeting* ki ti ganny fer yer. E mon'n vwar bann pwen i ase enteresan bann pwen ki'n souleve. Me an menm tan Mr Speaker mon'n osi vwar bann lesplikasyon ki'n ganny met devan par prometer Prozedlwa.

En bout ki'n *strike* mwan Mr Speaker, se ki promoter dan rapor i dir ki prometer ti'n kontinyen met lanfaz lo sa nesosite pou servis piblik adopte pratik modern, pou permet Gouvernman plis fleksibilite e pou bouz devan ek en *result-based management*. Mr Speaker sa i dir bokou dan li menm.

Mr Speaker sa kales kase ki nou'n transformen, pou kontinyen son larout malgre lisyen pou abwaye. Mr Speaker mon'n *translate* li sa pa mwan ki dir Angle i dir ki " kales i bezwen pase malgre ki lisyen pou abwaye."

So Mr Speaker ki mon pe sey dir la se ki en nouvo Gouvernman in vin o pouvwar e i annan son azanda, tou Gouvernman ki vin o pouvwar i annan son azanda. I pa vedir

poudir ki i bezwen sivre tou sa ki Lopozisyon i met devan. Nou annan lakourtwazi pou ekout zot, wi, me pa vedir ki nou bezwen fer tou sa ki zot dir nou fer, akoz ti annan en fason fer e prezan dan sa transformasyon, atraver sa sanzman i annan en lot fason fer ki pe ganny met devan pep Seselwa.

Mr Speaker zot dir zot napa konfyans dan nou - Mr Speaker me i pli pir se pep Seselwa ki'n tir zot akoz mank konfyans dan zot! Mr Speaker 2an edmi sa Gouvernman pa'n sede pe kontinyen avek demars pou anmenn sa transformasyon dan diferan sekter, dan diferan fason fer dan konzonktir devlopman ki'n arive.

Mr Speaker mon'n pas letan ekoute ki lot kote in dir me dan mon lespri in annan en ta keksoz ki pe pase letan mon ekout serten keksoz ki'n ganny dir, ki mon konnen akoz lot kote ti pe fer li.

Me mon pa la pou mon al dan listwar Mr Speaker. Me senpleman mon anvi dir ki zot pe sey trenn nou dan en rigol, zot in tonm dan lanmar e zot pe benny dan labou Mr Speaker mon pa pou al benny dan labou avek zot.

Mr Speaker mon konpran merit sa Prozedlwa e mon konpran bann transformasyon

ki pei i bezwen pas atraver e Vis-Prezidan avek ou lekip mon anvi dir ou ki mon pou sipòrt sa Prozedlwa. Mr Speaker *I beg to move*. Mersi.

(APPLAUSE)

MR SPEAKER

Mersi Onorab. Onorab Sandy Arissol.

HON SANDY ARISSOL

Mersi Mr Speaker. Bonn apre midi tou dimoun ki pe ekoute espesyalman nou bann travayer Seselwa.

Mr Speaker *Circular Public Salary Review 2023* sorti kot Lasanble Nasyonal, anvoye par Mrs Jeline Quatre. I anvoy *to group MNAs*, tou bann *MNA* Lasanble Nasyonal i ganny en kopi. I anvoy en kopi kot Sekretarya.

Apre Mrs Jeline Quatre i menm cc Eugenia Allagain, Nathalie Samson, Gerda Panagary avek Linda Gerry. Linda Gerry i Sekreter Depite Speaker, Gerda Panagary i Sekreter *LDG*, Nathalie Samson avek Eugenia Allagain zot travay dan Biro *Leader* Lopoziyon.

Letan Onorab Loze i vin dan nou Lasanble, i fer bann *statement* ki fo e i anbet piblik e i dir sirkiler pa'n ariv dan son

lofis. Problemm i kot son lofis Mr Speaker. Swa zot pe trenn lipye aba kot lofis, swa i annan sabotaz dan zot prop lofis, kot en bann i ganny lenformasyon e en lot bann pa gannyen.

Ozordi nou vwar nou dan Lasanble Nasyonal avek en Lopoziyon ki konfize;- en Lopoziyon ki en bann i dir pou napa logmantasyon, sa *Bill* pa pe fer naryen pou fer avek logmantasyon 10poursan.

Me en bann i vini, Onorab Wallace Cosgrow i dir ek nou, i pa war logmantasyon dan sa *Bill*, napa naryen ki pe ganny propoze dan sa *Bill* e nou pe *mislead* Lepep Seselwa. Onorab Loze i vini i dir ek nou “be napa byen dan sa *Bill* nou pe *mislead* Lepep Seselwa, napa okenn logmantasyon!”

Me Onorab Herminie i vini i dir ek nou i pe ankouraz bann dimoun pou pran. Pe pran kwa si napa naryen dan sa *Bill* ki Onorab Wallace in dir nou? Pou pran kisisa?

(laughter)

HON SANDY ARISSOL

Letan Onorab Uranie i dir ek nou i sipòrt travayer La Digue; bann travayer i konnen e i pe ankouraz zot pou fer; o kontrèr donn en pti pe plis akòz zot ki reste ko en zil zot lavi i pli dir -

be si napa naryen dan sa *Bill* nou pou donn kisisa bann Digwa lo La Digue?

Sa ankor bann konfizyon total ki egziste. Nou ganny Onorab sorti Pointe Larue Onorab Gabriel i vini lo sanmenm sa *Bill* i mansyonn zis *LOTO*, “*LOTO* pa la, *LOTO* pe fer en bon louvraz; *LOTO* in ganny met deor, *LOTO* in ganny penalize aköz *LOTO* pe fer en travay ekselan.”

Selman letan Onorab Woodcock i pas Beau Vallon, dimoun i dir ek li poudir *LOTO* i malelve tou dimoun i *raise* en *point of order*.

Aglae- Onorab Aglae Mr Speaker i al anba *Order 55(5)* rode Prezidan, Vis-Prezidan, Minis, anmenn en Mosyon pou zot kapab dil lo *LOTO*. I annan en konfizyon total! Ozordi nou'n *end up* avek Lopozisyon ki dimoun deor pe dir pa pe *perform*.

Zis zot rebel, zis zot *walk out* zot pa fer propozisyon, zot pa aksepte naryen ki nou fer. La soudennman lo dernyen moman, zot vini zot dir ek nou, nou, “nou krwar dan logmantasyon pou tou dimoun nou. Nou krwar dan logmantasyon e nou pa pe kont sa nou!”

Me sa ki nou pe dir ek zot fer sir ozordi zot donn nou

koudmen pou lev zot lanmen anler, pou nou montre poudir wi zot siport sa Seselwa ki zot pe koz lo la!

(APPLAUSE)

HON SANDY ARISSOL

Pa zis vin dan nou Lasanble fer nou krwar, zis zot ki reprezant Seselwa laba deor selman tou bann ki'n koz pli for zanmen in deza fer letour bonzour msye, madanm, zanmen in deza son portre lo poto elektrik, annan en bil bord, zanmen in deza pran par dan eleksyon e zanmen in *win* en eleksyon.

Selman dimoun i konn zis zot, dimoun i anvoy problem zis kot zot e personn nou pa koz ek nou. Mr Speaker zot napa konfyans dan nou, ou konnen aköz zot napa konfyans dan nou? Parske zot napa konfyans dan zot prop lekor! Zot napa konfyans dan zot prop *Leader* ki pe diriz zot.

Alors zot vini zot dir ek nou, nou pe rode ki sa Komite, nou pe rode oli sa *Commission*, zot pe kasyet nou isi.

Ler nou ti ferm *URS* zot ti kriy lasasen;- dimoun pou mor lafen, sa bann zenn pa pou ganny en plas travay. Ozordi si nou rod statistik mazorite bann zenn *URS* in ganny anploye ozordi.

(APPLAUSE)

HON SANDY ARISSOL

Zot pou form parti sa lekip dimoun, sa lekip Seselwa ki pou al benefisyen en logmantasyon.

Letan nou ti koup labi kot *welfare*, zot ti vin dan nou Lasanble zot ti dir ek nou Mr Speaker “bann dimoun pou mor lafen; la nou bann zanfan zot vant pou gonfle ek divan, zot pou mor ek malnitrisyon.” Ziska nou pe koze ozordi nou napa en rikord lot lopital Sesel kot menm nou zanfan Sesel in mor ek malnitrisyon.

Tousala zot ti dir nou koman Lopozisyon zis pou zot fer dimoun krwar, pou zot anbet dimoun pou fer dimoun desann lo semen pou fer dezord. E zot apel zot lekor Lopozisyon responsab, zot ki pe defann Lepep Seselwa.

Mr Speaker letan nou ti anmenn trezyenm mwan saler ou konnen ki zot ti fer? Zot ti tap lanmen lo latab. Zot ti dir “non fodre donn tou dimoun, fer tou dimoun kontan!”

Zot, zot krwar dan si ou pa travay ou pa delivre, ou vin sou dan travay parey sa *Tinky Winky* ki ti debout kot lorloz ou vin an retar ou menm ou.

Zot *walk out* parey zot, zot fer souvan, alor donn tou

dimoun trezyenm mwan saler Sesel. Sa pou zot *US* i *ok* zot pe travay e zot pe performen.

Be bann dimoun mon anvi di ek zot laba deor ki pe ekout nou enkli bann *US* ki la, sa ki *US* pa ankor ganny en konpran, se ki i annan en sanzman Gouvernman. *US* in ganny bate dan dernyen eleksyon e zot pa pou war ankor eleksyon dan sa pei!

(APPLAUSE)

HON SANDY ARISSOL

Sel sanzman sel konfizyon ki annan se zot ankor konfize poudir *LDS* ki dan Gouvernman.

Alor ler nou vin dan Gouvernman, i annan nou fason fer ki nou, nou Gouvernman i santi i anvi fer. Zot si zot pa annan konfyans ladan, si zot pa *happy* sa i zot problem, les nou travay!

(APPLAUSE)

HON SANDY ARISSOL

E nou, nou pe travay Mr Speaker nou pe travay. Se pour sa rezon ozordi atraver *VP*, avek nou bann dimoun ki la.

Kontrer mon ti a kontan felisit Mrs Shiela Mohideen ki byensir avek son lekip *SS* nou war li souvan, lot madanm nou

war li en pe souvan pou sa travay ki zot pe fer. Mwan mon *happy* ek sa mwan, parske in di ri annan en restriktirasyon dan sa ki nou pe fer i pou vin administrativ.

Mon kontan mwan ou konnen aköz mon kontan Mr Speaker parske ti annan en lepok dan nou pei pou ganny en promosyon fodre ou ti en aktivis veyer zakasyon ou bann dalon lo flat. Pou ou ganny en promosyon dan en logmantasyon saler fodre swa ou ti konn, sa sef ti kapab get ou tanzantan oubyen anvoy ou en pri vakans.

Si ou ti ganny en pti logmantasyon saler dan sa pei fodre ti kapris sa Prezidan, sak fwa eleksyon donn tou dimoun en logmantasyon saler san konsilte Minister Finans, san konsilte pei an relasyon avek lekonomi mannyer pe fer tou dimoun ganny en logmantasyon saker.

Sa ki'n arive dan nou pei, se pour sa rezon ozordi nou vwar poudir nou ki dan sa difikilte. Letan bann ansyen Gouvernman ti pran bann desizyon pou zot ogmant laz pansyon Sekirite Sosyal, zot ti dakor zot. Onorab Cosgrow ki asize la i ti dakor koman Sekreter Zeneral son parti.

La ozordi i dir nou i konfize aköz laz in monte. Sanmenm sa konfizyon ki egziste Mr Speaker. Letan mon ava terminen an vi ki mon ti anvi koz plis ki sa mon ti a kontan remersye tou bann travayer Seselwa ki pe kontribye dan nou pei, ki pe travay serye pou anmenn en saler kot lakour.

Mon anvi dezyenmman demann bann zenn ki pe kale dan bor semen pe apiy *bus stop*, ki pe mandyan dimoun kot laboutik, vin devan sanz ou lavi fer me kontribisyon pou nou pei aret les bann parti politik anbet ou e fer ou krwar i pou kontinyen soutenir ou, soutenir ou.

Napa larzan, larzan pou ou gannyen ou bezwen travay kontribye dan ou pei e met larzan dan fon pour ki pei i kapab soutenab pour ki lavenir nou a kapab annan ankor plizyer logmantasyon depandan baze lo performans ekonomik nou pei.

Letan mon ava konklir mon ti a kontan dir avek *VP* letan nou pe get bann reaniman travay saler *VP* pa bliy osi nou bann dimoun aze, pa bliy zot.

Parey mon ti fer referans dan mon bann entervansyon *State of the Nation address* i annan plizyer zot ki ozordi in

pran en pti zanfan, parske manman in dan drog papa in mor. Zot osi zot fer fas avek kou lavi. Soulaz zot en pti pe pour ki nou tou nou ava lo menm paz e an mezir firanmezir revwar balanse.

Pep Seselwa nou lo nou kote nou pe al lev nou lanmen tre o isi lo sa kote pou nou siport tou travayer Seselwa ki pe performen. Parey in dir baze lo performans pa baze lo dalon, ki parti politik ou siporte, baze lo performans e sa ki nou, nou krwar ladan.

Avek sa detrwa mo kantmenm mon ti annan bokou, mon ava aret la e nou pe prezant nou sipor pou VP ek son delegasyon ek tou Lepep Seselwa ki pe ekout nou. Mersi bokou Mr Speaker.

(APPLAUSE)

MR SPEAKER

Mersi Onorab. Prezan mon ava envit Vis-Prezidan pou fer son repons lo deba e son konklizyon.

VICE-PRESIDENT AHMED

AFIF

Mersi bokou Mr Speaker. Bonn apre midi Mr Speaker. *Leader* Biznes Gouvernman, tou bann Manm Onorab e tou dimoun a lekout.

Mr Speaker tou dabor permet mwan remersye tou bann Manm ki'n koz e in siport sa *Bill*. Zot in vwar son merit e ler mon'n ekout zot entervansyon, i kler ki zot in konpran sa sanzman ki nou ti anvi anmennen e zot in konpran rasyonnal e zot in siporte.

Bokou Manm in koz lo merit sa *Bill* e zot in demande akoz nou pe anmenn sa *Bill* la ozordi e zot in kestyonn sa koneksyon ant 10poursan saler.

Mon ti a kontan alors dir ki sa lamannman i pou permet sa logmantasyon ganny fer dan en fason ki bokou pli lozik, ki si nou pou al fer li parey *Public Service Salary Act* i ete ozordi.

Sa lamannman i pou de-politiz sa prosis e anba en kad ki pou administrativ. I pou pli fleksib e kot travayer zot menm zot pou benefisye pli tar dan mon entervansyon la mon pou eksplik ki mannyer travayer pou benefisye menm ki i pa'n ekout dan sa *Bill* 10poursan e benefis mon pou eksplike ki mannyer i pou arive.

I enportan pou note ki sa laranzman administrativ ki sa kote latab in kritike i deza egziste ozordi. Ler nou get peyman saler nou fer li tou le mwan, ozordi mon anvi dir zot

ki 53poursan saler ki ganny peye ozordi i bann saler ki preskrir lo *grid*. Me 47poursan tou saler ki nou peye ozordi o vin atraver *allowance* administrativ.

Sa i egziste ozordi e zot konnen, parske nou pa fek entrodwir li la ozordi sa ti egziste pandan tou sa letan - nou'n vin zwenn li koumsa. Alor si largiman sete be administrativ pou napa *oversight*. Be savedir zot ti napa *oversight* avan.

Alors eski *US* pe dir nou toudenkou sa *oversight* pe al disparet?

Mon pa tro konpran sa largiman, byensir larepons se non. In toultan annan *oversight* atraver en lenstitisyon ki'n ganny etablir dan Gouvernman, pou fer *oversight* lo saler dan sekter piblik e sa se *Public Service Bureau* lontan nou ti apel li *Department of Administration*.

An plis ki sa ou annan bann *HR* dan tou bann departman. Ou annan odit ki ganny fer e tou bann ki'n lo *FPAC* oubyen zot in swiv *FPAC* zot a vwar tanzantan i dir be dan *Scheme of Service* ti dir pou fer sa, be *Scheme of Service* administrativ li i dir zot ti pou fer sa be tel dimoun li i ti par lao, ti administrativ ti annan

oversight e finalman lekel ki annan pli gro *oversight*?

Be se zot Lasanble Nasyonal parske i annan en gro tit ladan *Wages and Salaries* e sa sonm 3milyon *or* nenport ki sonm ki ganny mete se zot ki aprouve, zot kapab redwir tou. Zot kapab dir be sa bann e zot in ogmant par 5poursan, oubyen par 10poursan eksplik nou akoz. E si zot pa ek zot kapab redwir li. Pa kapab ogmante byensir me selman zot kapab redwir li.

Detrwa Onorab enkli Onorab Woodcock e Onorab Gervais Henrie, in donn legzanp kler ki mannyer sa kad ozordi i marse. E ki mannyer kontrol administrative in egziste toultan. Zot a rapel e zot ti fer sa sorti byen ki sizyenm Lasanble ti *quash* sa *S.I.* ki ti pou met en logmantasyon lo *grid* li menm e sa ti ganny fer le 4 Avril 2019.

E ler sa ti ganny fer Gouvernman pa ti dakor e zot ti met sa devan Lakour Konstitisyonnèl. E le 29 Novanm 2018 Lakour Konstitisyonnèl ti *dismiss* sa petisyon. I ti dir zot wi Lasanble i annan toutafe pouvwar pou li *quash* sa *S.I.* E ki zot ti fer toudswit, toudswit lafen Novanm 2019 komansman

Desanm, zot ti entrodwir sa 5poursan administrativman.

Zot ti fer li, e lekel ki ti vin eksplik sa? Sete sa *Chief Secretary* ki ti dan Departman Ladministrasyon sa letan. E ozordi Onorab Cosgrow i dir nou poudir i pa konpran, pou fer perdi *oversight*.

Be mon krwar i enportan pou pep Seselwa konnen, ki napa naryen ki pe ganny fer dan en fason pou nou kasyet keksoz;- en fason pou donn pouvwar arbitrer avek Egzekitiv.

Mon ti trouv drol ler en Onorab i dir koumsa la nou pe tir pouvwar ek Egzekitiv nou pe donn *PSB* mon pa konnen si i krwar *PSB* pa Egzekitiv be i form parti L'Egzekitiv.

I annan bokou keksoz ki'n ganny dir bomaten ki mon ti a kontan klarifye parske zot pa korek. Par egzanp enn ladan sete ki, rezon nou pe fer sa amannman kot nou pe tir *allowance* nou pou fer li form parti saler, se parske ler nou pou fer sa ozordi *allowance* pa pe ganny takse e ler nou pou fer li form parti saler la i pou ganny takse. Pa korek. Pa korek ditou.

Sel konponan *allowance* ki pa ganny takse ozordi se *overtime*. Tou larestan, *marketing*, *education*,

responsibility tousala i ganny takse ozordi.

So nou pa pe fer sa pou nou anmas plis larzan *tax*, non! Nou pe fer sa parske nou anvi met en lord dan sa sistenm. Ti annan ki ti osi dir poudir Sekter Prive nou devret konmsi si nou pe fer sa ek Gouvernman, nou devret preski dir - ler mon'n ekoute - enpoz sa lo Sekter Prive.

Be mon ti a kontan demann sa kestyon pandan sa dernyen 43an ki *US* in la, kan zot in deza anmenn en *Bill* pou enpoz saler lo Sekter Prive? Zanmen mon'n trouve, zanmen mon tande.

Eski ozordi zot anvi nou, nou al entrodwir en tel Lalwa, pou met nou an konfrontasyon avek la realite lozik ek Sekter Prive li menm? pa fer sans. Zot in osi dir ki pou arive ek *State Owned Enterprise*, eski pou aplike pou zot?

Me dan zot letan e ler zot ti eksplike an 2019 ki zot pe fer sa 5poursan logmantasyon, pa pou aplike zot ti dir pou *State Owned Enterprise*. Li i pa pran larzan ek Gouvernman, sa bann ki pa pran larzan ek Gouvernman.

Zot, zot annan zot diferan, zot annan zot *Board*, zot annan zot *PEMC* ki osi i ed zot koman en regilater, e se atraver zot pop

mekanizm ki zot pou deside parske zot ki konnen ki kantite zot gannye zot pa antre dan larzan Gouvernman. Zot ki deside. Alor Gouvernman pa pou enpoz lo zot.

E la zot pe dir nou be fodre ou enpoz lo zot, be akoz zot pa to fer dan zot letan? Parske zot pa ti trouv li lozik. Mon ti a kontan osi prezan vin lo sa size - mon pa ti krwar i relye direktman me selman vi ki in ganny mansyonnen mon bezwen reponn lo la.

Poudir ti annan promes ki'n ganny fer pou met larzan dan pos Seselwa. Wi ti annan promes ki'n ganny fer ki ou ti anvi amelyor lavi pep Seselwa. Zanmen mon'n tann nonm okenn landrwa ki'n dir poudir nou pou donn *minimum* saler R10mil.

Si i annan mon ti a kontan konnen ki zour keler e lekel ki'n dir, parske mon pa'n war mwan. Mon'n la pandan bokou bann renyon piblik kot sa bann deklarasyon in ganny fer zanmen mon mazin sennla, alor annou pa anbet Lepep Seselwa silvouple.

Mr Speaker parkont lo kote met larzan dan pos Seselwa wi i annan bokou keksoz ki'n arive e mon a sit 4 legzanp;

Elektrisite; e zot ti pe dir sa pou aplik zis pou travayer Gouvernman be dan Sekter Prive ki pou arive ek zot? Be elektrisite ler ti'n desann an Zanvye e la an Avril in ganny revize ankor, sak sa revizyon ti pou redwir par mwayen. E sirtou bann ki zot *Bill* i en pe pli ba ti pou redwir li par omwen R300. 2 fwa in arive in vin 600 lanmenm.

Tou le mwan apartir la zot pou ganny R600 rediksyon, be sa pa i larzan an plis dan pos tou sa bann fanmir? Be i byen, be zot ti dir napa.

Fuel pa zis travayer Gouvernman ki servi *fuel*, tou dimoun i annan en transpor i servi *fuel*. Septanm 2022 lannen pase pri en lit sa ki nou apel bennzin *moto gasoline* ti R25.14 ozordi R20.25 en rediksyon R4.89 par lit. Pa tou dimoun ki annan en transpor, ki sanse i annan en transpor i servi.

E mwan leksperyans ki mon konnen par mwayen en fanmir si i ariv a pepre 150lit par mwan. E si ou met R4.89 koman *saving* akoz i en rediksyon i vin R733.50.

Azout avek ou R600 ou'n ariv R1333.50, be lo en dimoun k ti pe ganny R10mil saler i pa'n ganny 13poursan logmantasyon efektifman? Eski

sa i pa'n met larzan dan pos Seselwa enkli travayer dan Sekter Prive? Wi.

Mon a donn zot en lot legzanp kot sa lamannman prezan, i osi kapab ede met en larzan dan pos Seselwa. Bokou nou, nou pran en *loan* ek labank e ozordi ler ou al pran en *loan* ek labank, labank i demann ou, ou *pay slip*.

E lo ou *pay slip* i dir ou *sorry* mon war en ta *allowance* la mon pa pe pran sa aköz sa mon pa konnen si zot kapab koupe nenport ler sa ou saler de baz ki garanti.

Alor avek sa laranzman kot bomaten mon ti liste 4 diferan *allowance* ki pou form parti ou saler. E si nou pe gete ki 47poursan sa ki ganny peye i *allowance*, 53 i form parti en sel kou sa baz ki ou pou al avek devan labank. Si ou ti abitye montre li R6mil koman ou *basic*. Ou ti annan 3mil *allowance* sa 3mil ti trounen e form parti. En sel kou ou annan ou 50poursan abilite an plis ki sa larzan ki ou ti abitye anmenn kot labank.

Si en dimoun ki tin *entitled* avek en labank pou ganny R600mil atraver sa amannman i ganny sans al kot labank - depandan lo son bann kondisyon ki li i annan son saler - mon pe sit en legzanp kot

enn i 6mil son *allowance* i 3mil, sa dimoun i ganny sans ganny ziska R300mil an plis koman *loan*. Aköz sa amannman.

E zot a rapel byen poudir ler nou ti diskit saler dan lepase, ti toultan annan sa propozisyon;- zot be aköz nou pa pran sa bann *allowance* nou fer en sel; aranz sa *grid* fer en keksoz konmsi aköz dimoun i lo latab ganny plis *loan*. Be lala in arrive.

Sa letan mon krwar bomaten zot ti pe dir zot pou get ladan zot pou serten ekspresyon be zanmen in ganny fer, nou, nou'n pran en desizyon. E sa desizyon pou met larzan dan pos Seselwa.

Katriyenm legzanp trezyenm mwan; Ozordi ou trezyenm mwan i baze lo ou *basic*. Pa lo ou *allowance* e annou pran sa legzanp sa dimoun ki dizon li dan son kalkilasyon aköz i annan en bout ki mandatwar en bout i baze lo performans.

E dizon li i ti pe anmenn li R6mil koman son trezyenm mwan. Be la si tou son *allowance* i from parti lanmwatye sa bout saler i annan drwa anmenn li ankor R3mil dan lakour. Eski sa pa pe met larzan dan pos Seselwa atraver sa amannman?

(APPLAUSE)

VICE-PRESIDENT AHMED

AFIF

I annan plizyer lezot legzanp mon a donn zis en dernyen goute. Tir tou keksoz ki negativ zot in koz lo la ozordi tou keksoz ki negativ Gouvernman in fer sa dimoun in soufer. Be pa in edik sa pep.

Wi i annan en lager e wi i annan en kantite keksoz ki'n ogmante e wi i annan en kantite ki pa nou ki'n fer, pa nou ki responsab. Me annou edik sa pep, nou a dir li i annan en bon pe keksoz kekfwa ou pa realize. Me in arive.

E goute; konbyen zanfann ozordi ki pe ganny en goute dan bomaten ki zot pa ti abitye gannyen? E en goute mon pa konnen konbyen i koute petet i a kout Gouvernman R10 en goute.

Be R10 pou 22 zour dan en mwan, pa toulezour ki manrmay i al lekol be pa lanmenm la i ariv R220 azout ek sa 1300 laba prezan, azout ek sa 10poursan ki pe al monte la ou'n fini ariv dan 20ekek poursan logmantasyon.

Depi 6mwan pase. Eski sa Gouvernman pa pe met larzan dan pos Seselwa?

(APPLAUSE)

VICE-PRESIDENT AHMED AFIF

Mr Speaker mon konpran poudir ti annan osi en konsern ki anba sa lamannman nou pe *delete* en seksyon ki i annan pou fer avek afekte en drwa ki en dimoun gannyen atraver son saler.

Nou pa anvi afekte drwa personn nou, parske *de toute façon* anba seksyon 49 *Employment Act* i protez tou dimoun i annan en drwa.

I dir anba 49(1) *Employment Act* en anplwayer pa kapab varye term e kondisyon lanplwa en travayer dan en fason ki pou fer li mwens favorab, san ki i ganny permisyon sa travayer.

E permisyon *Union*. Me selman si li i pa anvi sa anplwayer i refize e i pa ganny sa permisyon ek sa travayer, i kapab termin sa Kontra. Be si i termin sa Kontra i bezwen al atraver *grievance procedure*. Alor i annan en prosedir ki protez en travayer.

Me mon pa pou vin lager lo la. Mwan mon krwar vi ki i ti'n deza la si Lasanble i santi poudir i devret gard sa provizyon, konmsi pou protez en travayer ki nou pa kapab sanz son drwa aki - nou napa

problenm ek sa nou a kapab rod en fason fer li.

Be vwala Mr Speaker an gro, mon'n ekout bann entervansyon bomaten mon'n santi i annan en kantite konfizyon ki'n sorti lo en kote. Lo lot kote mon kontan pou vwar zot in lir sa *Bill*, zot in konpran li, zot in konpran egzaktaman lenplikasyon; zot in vwar ki mannyer i pou afekte dimoun; zot in vwar lenportans pou anmenn li deswit.

Akoz nou, nou pa anvi tarde ek tou keksoz. Si nou'n dir Avril nou pe al fer sa sanzman e sa sanzman i ti pou vin en pe difisil si nou gard sa *grid* parey i ete. Mon a donn zot en pti legzanp.

En dimoun i lo *grid* ozordi, sa *grid* ki i ankor aplike ziska ler nou sanz Lalwa i lo *band 4 step 14*, i ganny R9518 son *basic* sa, prezan nou dir be donn li son logmantasyon 10poursan.

Sa dimoun ti pou donn li en logmantasyon 10poursan i pou bezwen sorti lo *band 4* i pou mont lo *band 5 step 9*, i ti pou ganny 10mil467 ki preski 10poursan, son 10poursan ti pou 10mil469.

Alors ou pou bezwen fer en dimoun sorti lo en *band* konpletman. Tandis ki lentansyon se pa tir li lo en

band, se zis donn li en logmantasyon be alor sa fleksibilite avek sa *salary grid* i vin en problenm. I vin en problenm. Be dan lepase ki zot ti pe fer zot ti pou dir be i *ok*, pa fer li sot *band* annou met an *allowance* an plis, be akfer ou annan sa striktir syantifik tou zafer selman ou pe zwe ek en *allowance* par kote?

Nou, nou pe dir annou fer li dan en fason korek; annou fer li kot ou annan en *grid* konplet, met sa bann *allowance* tou zafer ladan kit bann *overtime* bann zafer an deor la prezan i syantifik. Pibliy li e la prezan nou napa naryen pou kasyet nou.

Bomaten mon'n tande konmsi i annan en bann keksoz ki zot pe gard anba latap pa konnen ki nou pe vin fer. Non. Sel rezon se mon pa vin eksplik Polisi dan staz merit, parske i annan en ler ki ou eksplik Polisi Lalwa i fer provizyon pou sa striktir.

Prezan kot i konsern sa ki ou pou met ladan bann Polisi sa nou, nou'n pare zour Lasanble i donn nou sa loportinite nou a vin fer en *statement*. Nou anmenn tou bann teknisyen relevan zot a eksplik sa striktir, zot a montre ki mannyer i marse.

I deza annan en sirkiler ki deza endikatif lo sa ki nou anvi fer zot in ganny kopi, pa tou ki'n gannyen i parey me selman lo sa kote tou dimoun i gannyen.

Be napa naryen pou kasyet i evidan i sel sa ki nou anvi fer, nou anvi en keksoz ki meyer, i pi lozik e nou fer ki atan. Atan se la an Avril parske se la ki nou ti dir nou pou donn sa logmantasyon.

Alor vwala Mr Speaker i reste zis pou mwan remersye bann manm ki'n entervenir. Mon ti a kontan remersye tou bann teknisyen e dayer les mwan dir zot sa, i pa mwan or Prezidan ki ti leve en zour bomaten e dir zot be pa ti a bon tir sa *grid* fer li pa aplikab pou servis piblik e zis annan en lot keksoz administrative. Non. Ler sa papye ti vin kot *Cabinet* resaman, sete *Public Service Bureau* ki ti anmennen.

Bann teknisyen ki ti vin eksplike. I pa ti en linisyativ politik ditou i en linisyativ teknik e nou, nou kontan ekoute nou bann teknisyen. Nou valoriz zot en kantite. Nou'n *train* zot, nou'n fonn zot tou sa ledikasyon, ozordi ler i pe donn nou bann meyer pratik, akoz ou bezwen met sa dekote?

Akoz ou bezwen dir nou ki pli konnen? I annan moman kot sa bann lenformasyon teknik, i

enportan pou en Gouvernman ekoute parske i pli bon ou pei e zot in etidye ki mannyer pou fer li pli bon. Byensir lo nivo politik nou ava aksepte ou pa eksepte, me nou, nou'n aksepte parske nou respe sa ki zot in fer.

Alor vwala mon'n eksplik en pe rasyonnel e mon espere ki Lasanble apre zot Staz Komite, zot a ouver staz merit nou a vot an faver.

E i a permet Gouvernman fer sa travay serye pou fer sa prosesis pey saler, amann saler, revwar *scheme* bokou pli senp, bokou pli lozik e fer sa atan e met en lankadremman ki pou kler ki tou travayer i a konpran kot zot ete, ki tou dimoun a konnen kot zot debout sirtou dan Gouvernman.

E parey detrwa Manm in fer mwan osi mon pou profite pou demann Sekter Prive pou osi gete ki zot kapab fer. Mon konnen zot in fer bokou deza;- bokou - bokou dan lotelri; plizyer landrwa ki mwan mon konnen zot in ogmante saler e mon konnen si i annan posibilite zot pou fer li mon ankouraz zot fer li.

E avek sa Mr Speaker mon ti a kontan remersi ou e mon esper ki nou pas sa staz vot pou merit. Mersi bokou.

(APPLAUSE)

MR SPEAKER

Mersi Vis-Prezidan. Mon ava aprezan envit bann Manm pou vot lo sa *Bill* lo merit zeneral dan *Second Reading*. Manm i an faver lev lanmen silvouple?

Mersi. Manm ki kont? Lo *general merit Public Service Salary (Amendment) Bill, 2023* Manm in vot pour, 0 kont, 9 in *abstain*. Donk sa *Bill* in aprouve lo *general merit*. E Madanm Clerk i kapab fer *Formal Second Reading*.

MADAM CLERK

Mersi Mr Speaker. *A Bill or an act to amend the Public Service Salary Act*. Mersi Mr Speaker.

MR SPEAKER

Mersi. Bon nou ava aprezan gete ki travay nou annan dan Komite. Serzan nou a pas dan Staz Komite e mon a met direksyon dan lanmen *Bills Committee*. So *Chairman* pou pran. Onorab Andre?

HON CLIFFORD ANDRE

Mersi Mr Chairman. Mr Chair sa *Bill* ki devan nou - anefe nou annan son komansman son - nou'n dir ki, e nou'n tonm dakor yer dan *meeting* ki pou;

“*A Bill of an Act to amend the Public Service Salary Act, 2013*”. Akoz ou ti diskite ki nou

bezwen met lannen oubyen *cap, so it's 2013*.

Mon ava bouz lo dezyenm lamannman ki ou annan Mr Chair i an referans avek *repeal of section 8*. Savedir nou, nou pe dir pa bezwen *repeal section 8* - en *proposal* ki nou'n mete - so kit li parey i ete. E seksyon 8 mon konnen *LGB* i annan en *proposal* pou fer - seksyon 8 ki mannyer i ete la i lir koumsa;

“*Any person employed in, or elected to the public service of Seychelles, on the coming into operation of the Public Service Salary Table shall not be affected adversely and shall continue to enjoy the salary, not less favorable than those enjoyed by them before the coming into operation of the Public Service Salary Table*”.

Sa i pran konsiderasyon sa ki *VP* i fek dir nou anvi *Employment Act*. So mon ava les *LGB*. Mon konnen i annan en *proposal* pou li fer. So sa i sa lamannman. Anefe lo sa *Bill* ki devan nou - mwan mon'n propoz - *on behalf the Bills Committee* mon'n propoz ki nou pa *delete section 8* e nou kit li la. Alors sa i enn bann lamannman ki nou anmennen pou sa. Mersi mon ava, akoz mon konnen *LGB* i annan komanter.

MR SPEAKER

Wi, *LGB*.

HON BERNARD GEORGES

Mersi Mr Chair. Mr Chair anba *Order 72* mon oule *move an amendment to the amendment proposed*. Mon'n ekout *VP*, ki'n dir ki i napa okenn obzeksyon pou gard lespri sa seksyon 8, ki pou asir okenn travayer ki zot saler pa pou ganny redwir pli ba ki i ete ler sa *Bill* i vin an operasyon.

Alor mon pe propoz en *amendment* akoz *the Public Service Salary Table* prezan i nepli relevan avek sa ki nou pe fer. Akoz i annan en lot latab. Mon pe propoze ki kot i met *the "Public Service Salary Table"* ki nou war dan sa 2 landrwa dan *clause 8* ki nou ranplas sa par *"this Act"*. Setadir ki ler sa *Act* i vin an operasyon pa pou annan okenn rediksyon ki pou posib pour okenn travayer Sekter Piblik.

That's my proposed amendment to an amendment Mr Speaker. E mon bezwen demann ou egzers - *well it's an amendment to an amendment*. Donk *it's on the floor*. Alors mon pa bezwen demann okenn permisyon. Mersi,

MR SPEAKER

Wi mon konpran nou'n deza fer sa prosedir avan *on the floor*, selman Onorab atann, Onorab Loze ti'n lev lanmen avan.

HON JOHAN LOZE

Mersi Mr Speaker. Mr Speaker mon ti'n lev lanmen akoz letan mon'n lir *objects and reasons* *it's been written as a transitional clause*.

Be *objects and reasons* is not part of the *Bill*. E letan mon'n get dan *Bill* there is no *transition clause* that *encapsulates the spirit or essence of* sa ki'n ganny ekrir devan dan *explanatory statements of objects and reasons*.

E pourtant in ganny ekrir koman en *transition clause*. Mon zis oule port a latansyon *panel* ki *whatever* lentansyon i annan dan sa dezyenm paragraf *of explanatory statement of objects and reasons, has been left out of the Bill itself*, i pa dan *Bill* li, i dan *objects and reasons*. Mersi Mr Speaker.

MR SPEAKER

Mersi. Mon krwar nou bezwen pran keksoz enn par enn. Dapre sa ki mon'n konpran ou'n lev en lot size la, annou rebran sa ki Onorab Andre mon sipoze ou ti lo ou *amendment* ale. An

relasyon avek *amendment* ki Onorab Georges in fer, *yes?*

HON CLIFFORD ANDRE

Mr Chair sa lamannman ki Onorab Georges in propoze i parfetman fer sans, akoz e sa ki nou ti'n sey propoze yer. So nou napa okenn lobzeksyon an referans avek sa lamannman *this Act, coming to force of this Act.*

MR SPEAKER

Ok. Eski panel i an agreman lo la? *Panel* i an agreman. Onorab Cosgrow ou ankor lo la?

HON WALLACE COSGROW

Yes, Mr Speaker. Si nou ti kapab zis ganny en repetisyon sa lamannman ki Onorab Georges in propoze *for clarity please.*

MR SPEAKER

Onorab Georges ou kapab.

HON BERNARD GEORGES

Mersi Mr Chair. Mr Chair *Clause 8* prezan pou lir i egzaktaman parey i ete dan *the principal Act* e i lir koumsa;

“Any person employed in, or elected to the public service of Seychelles on the coming into operation of this Act, shall not be affected adversely and shall continue to enjoy the salary not

less favorable than those enjoyed by them before the coming into operation of this Act”.

Annefe *that’s what it reads now*, me dan mesaz ki mon pe lir sa mon war ki i amann en problemm avek *tense* dan *the original clause 8.*

Swa i ava bezwen *“to enjoy the salaries not less favorable than those or the salary not less favorable than that”*

Me i annan en *drafting* ki les en pe a dezire. So avek ou permisyon Mr Chair mon ava propoz en *amendment to the amendment to the amendment* pou fer li pli byen.

Clause 8 i komans avek;

“Any person”, alor nou pe koz en dimoun nou bezwen gard li sengilye *right across*. So mwan amannman i ava lir;

“Any person employed in or elected to the public service of Seychelles, on the coming into operation of this Act shall not be affected adversely and shall continue to enjoy a salary not less favorable than that, enjoyed by the person before the coming into operation of this Act”. Mersi.

MR SPEAKER

Byen, nou'n konpran sa *amendment*, mon krwar i annan

Lagreman zeneral lo la. So Onorab Cosgrow, wi?

HON WALLACE COSGROW

Mr Speaker, si mon konpran byen nou ti'n tonm dakor ki sa *clause 8* atraver *Bills Committee* ti pou ganny retire *altogether*. Pa ti pou reste.

MR SPEAKER

Wi, be mwan dapre mon konpran prezan Onorab Andre i dakor ki i pou ganny *amended* plito ki - Onorab Andre?

HON CLIFFORD ANDRE

Mr Chair *initially* letan sa *Bill* ti ganny anmennen, zot pe demande pou *repeal section 8*. Dan diskisyon i nou'n annan dan *Bills Committee* yer nou'n dir annou pa *repeal section 8* annou kit *section 8*.

E nou'n annan en *further discussion* kot nou'n tonm dakor ki poudir pou nou met "*this Act*" la mon osi mon konpran, selman mon mazinen akoz sa lepok "*those*" akoz ti annan ki ti annan plis Onorab Georges plis ki en saler. So be la prezan ki mannyer nou pe aranze, nou pe fer li vin pli rafinen si oule.

E se sa rezon akoz nou pe kit li pou annan sa garanti ki anba *Employment Act* i osi annan. Mersi.

MR SPEAKER

Mersi. Bon lentansyon i kler pou mwan koman en *lay person*. *Obviously* nou pe tir sa 9 la ki *repeal section 8*, *is that correct?*

Me sa *amendment* la kote i ganny reflesir espesyalman? Akoz ou'n azout en pti *amendment* avek. *Yes please* Onorab Georges?

HON BERNARD GEORGES

Dapre lord Mr Chair propozisyon *Bills Committee* sete pou *delete* pou- non plito propozisyon dan *Bill* se pour *repeal* seksyon 8.

Bills Committee e atraver zot Chairman, in propoz en amannman pou pa *repeal*, *so to bring the old clause 8 back* e mwan mon'n fer en propozisyon pou amann *the old clause 8*. Mersi.

MR SPEAKER

Correct. Mon krwar mon pa'n santi okenn obzeksyon, mon krwar nou kapab aksepte sa amannman.

Onorab Andre. *Arr sorry* mon annan pwen Onorab Loze. *Panel* eski zot kapab adres pwen Onorab Loze? Likel ki kapab pran laparol. *Yes Mrs Legal Person?* Mersi.

LEGAL DRAFTSPERSON**JULIA JEAN**

Mersi Mr Chair. Sa *objects and reasons* sa dezyenm paragraf *basically* ki pe-

MR SPEAKER

Sorry mon pa tann ou tro kler eski mikro i on?

LEGAL DRAFTSPERSON**JULIA JEAN**

Yes. Ok. Sa dezyenm paragraf dan *objects and reasons basically* i *for clarity*. Ler nou'n-nou pa bezwen nou pa bezwen en *transitional provisions*, aköz nou'n *retain* tou bann provizyon ki *refer to constitutional appointees*.

Akoz sa Lalwa la parey in ganny amande la i pou *still apply to constitutional appointees*, sa *table* dan sa *Schedule 1* pou *apply* pou *constitutional appointees*. Me selman i pa pou *apply* pou bann zofisye dan servis piblik.

So sanmenm sa ki nou pa bezwen *transitional provisions* menm si apre pou annan sa revi, Lalwa pou retournen pou retir sa bann lezot provizyon sa pou pli tar. Me selman *right now* nou pa bezwen *transitional provisions* pou fer sa, sa dezyenm paragraf i zis pour *clarity basically*.

MR SPEAKER

Thank you. Onorab Loze?

HON JOHAN LOZE

Mersi Mr Speaker. So ou *basically* pe dir mwan ou'n ekrir la ki ou pe sanz definisyon *public service for the-* pou sa *Bill*, selman ou pa'n sanz definisyon *public service* pou sa *Bill* aköz ou pa bezwen sanze selman ou'n sanze. Mersi Mr Speaker.

LEGAL DRAFTSPERSON**JULIA JEAN**

Public service son definisyon in ganny sanze, *for the simple reason* ki *Public Service Salary Table* i pa'n sanze li.

Prezan nou'n bezwen sanz *public service* pou reflekte sa lamannman li menm, ki pou bann *constitutional appointees* vi ki nou tir “*public officers*” ladan prezan nou'n bezwen *alter public service definition* pou li *in line* avek sa ki nou pe fer dan sa lamannman *basically*.

MR SPEAKER

Thank you, Madam mon krwar mon'n konpran sa byen. Onorab Andre ou annan ankore pou fer? Amanman.

HON CLIFFORD ANDRE

Yes mon annan en pti dan lamannman ki'n anmenn devan Lasanble, an referans avek 13 Mr Chair. Kot in dir *in part (a) by inserting 13(b) sorry en, in part (a) par inserting "after item 10 the following item Ambassador, High Commissioner or other principal representatives"*.

Mon konpran mon'n gete, me selman mon krwar nou devret kot "*principal representative*" an deor. Sa ki nou, nou ti diskite yer, me selman zot in dir mwan i reflekte dan Konstitisyon kot i dir;

"The President may with the approval of the majority of Members of the National Assembly appoint a person as Ambassador, High Commissioner or any other principal representative of Seychelles to represent Seychelles abroad".

So ki nou, nou ti pe demande par lefe ki dan sa lamannman ki ou'n anmennen i pa definir "*principal representative*" akoz nou pe met li la eski i devret ganny mete la oubyen i devret ganny mete koman en "*public servant*", eski i nesaser nou met li koumsa la ki manner i ete?

So nou, nou ti pe propoze Mr Chair ki nou, dan sa enn

nou zis *delete "principal representative"* nou kit *Ambassador, High Commissioner.*

MR SPEAKER

So ok sa i en lamannman mon vwar. Panel?

LEGAL DRAFTSPERSON

JULIA JEAN

Mersi Mr Chair. Nou'n deside pour- panel i agree pou kit "*principal representatives*" because this is what it refers to in the Constitution e osi dan *Constitutional Appointees Emolument (Amendment) Act.*

Act 27 of 2016 ti enkli sa dan *Constitutional Appointees Emolument (Amendment) Act.* So sa wording nou'n pran li direktaman from the *Constitution and Constitutional Appointees Emolument (Amendment) Act.* So sa ki ganny refer to dan Konstitisyon. Mersi.

MR SPEAKER

Mersi. Onorab Andre.

HON CLIFFORD ANDRE

Mon konpran selman *what is a principal representative?* Eski en sekreter ki travay dan Lanbasad? Se sa ki konmsi ki konsern mwan akoz definitivman pou ou ganny

anvoye deor i annan en formalite ki ganny fer pou ou ganny anvoye deor.

So do we need to keep- si sa i en *post* konstitisyonnèl i mansyonnen dan Konstitisyon be selman i pa dir ou lekel. So sanmenm sa ki mwan mon ti dir dan sa lamannman kekwfa nou ti'n devret met definisyon sa pou nou konnen, akòz nou konnen ki savedir en Lanbasader, nou konnen ki savedir en *High Commissioner*.

So si nou pe zis pran *wording* mon konsèrn se si zis nou pe zis pran *wording* pou nou *transcribe* li dan en lot Lalwa, nou annan en pti problem. So mon konsèrn se sa. Mersi.

MR SPEAKER

Panel. Yes VP?

VICE-PRESIDENT AHMED

AFIF

Mersi bokou Mr Speaker. Mr Speaker mon pa en avoka me selman ler mon pe lir sa *clause* ki senpleman pran sa ki'n deza ganny ekri dan Konstitisyon avek *Constitutional Appointment, Emoluments Act as amended* i pe senpleman kopye sa e anmenn li la.

Sa largiman ki i pa'n definir be mwan mazine pareyman nou pa'n definir lekel

members of the Electoral Commission ki *item 10* anba sa, selman *it's a given* ki i bezwen *Electoral Commission Act*.

Likewise nou pa'n- *Public Service Appeals Board* i anba Konstitisyon. Be tousala i pe fer referans avek Konstitisyon, alor nou'n pran pareyman pou tou larestan, Oditer Zeneral *Ombudsman*, nou pa'n mete poudir *Ombudsman* parey in ganny definir dan Konstitisyon.

Me selman *it's a given*. So *likewise* nou pe azout en 11 *it's a given* sorti dan Konstitisyon e nou'n *quote* egzaktèman sa laliny ki mete dan Konstitisyon. So mwan mon krwar i *sous etendue* ki nou pe fer referans avek sa Lalwa. Mersi.

MR SPEAKER

Onorab Henrie.

HON GERVAIS HENRIE

Mersi Mr Chair. Nou konpran kot *panel is coming from*. Nou difikilte i se nou pa konnen ozordi. Mwan mon pa konnen e mon asire tou manm pa konnen kisisa en "*principal representative*".

Si ou ti pou donn nou en legzanp. Nou konnen lekel *Ombudsman*, nou konnen lekel en Manm Komisyon Eleksyon, nou konnen lekel Komisyoner

Lapolis, Anbasader *and all*, me *principal representative*.

E akoz yer nou'n rode kote e la ozordi nou pe antann poudir i dan Konstitisyon avek sa enn Lalwa. Wi nou ti pe rod en *cross reference* akoz nou napa en legzanp tanzib lekel sa endividi. Mersi.

MR SPEAKER

Mersi. Onorab Georges eski mon kapab poz en kestyon ki ou kapab adrese petet pou mon leklersisman?

Eski ler i met "*principal representative*" la eski i pa vedir nenport dimoun ki Prezidan i apwente koman en *principal representative and that therefore applies to that person?* Zis si ou kapab klarifye.

HON BERNARD GEORGES

Mersi Mr Chair. Annefe nou *legal draftsperson* in eksplike. Sa fraz i sorti dan lartik 64(1) nou Konstitisyon.

E Lartik 64(1) i dir "*The President may with the approval of the majority of members of the National Assembly Appoint a person as Ambassador, High Commissioner or any other principal representative of Seychelles to represent Seychelles abroad*".

E mon krwar konfizyon i vin atraver diferans ant

Konstitisyon avek sa ki dan Lalwa. Sa ki dan Lalwa i *Ambassador, High Commissioner or any other principal representative* e i aret la. I pa kontinyen avek *of Seychelles to represent Seychelles abroad*.

Me *legal draftsperson* i annan rezon, akoz sa fraz "*of Seychelles to represent Seychelles abroad*" i pa definir zis *principal representatives*, me i osi defini *Ambassador* e i definir *High Commissioner* e i definir *other principal representatives*. So it's common to all 3.

Appoint a person as Ambassador of Seychelles to represent Seychelles abroad an Ambassador, a High Commissioner of Seychelles to represent Seychelles abroad or a principal representative of Seychelles to represent Seychelles abroad.

Alors se pour sa rezon ki zot in aret li zis avek "*principal representative*." Me i kler ki si ou pa konnen *genesis* sa ki dan sa Lalwa i Lartik 64(1) ou pou annan sa dout. Mersi.

MR SPEAKER

Onorab Andre?

HON CLIFFORD ANDRE

Mersi Mr Chair. Mr Chair annefe sa sanmenm sa diskisyon ki nou'n gannyen yer, me si nou pe dir nou pe pran sa ki dan en Lalwa pou nou met dan en Lalwa, nou pe pran sa ki dan Konstitisyon, annou met li antye. Pou mwan i senp.

So si mon kapab propoz sa lamannman ki nou met li parey 64(1) i dir “*or any*” ki mannyer i mete; “*and principal representatives of Seychelles to represent Seychelles abroad.*”

Konmsi demen letan en *lay person* pe get sa Lalwa i konpran ki vreman i pe dir i pa bezwen al rod en enterpretasyon akoz en dimoun i kapab rod en enterpretasyon avek Lakour pou enterpret en Lalwa.

So eski nou gard sa *limbo* e Onorab Georges ti'n admet ki i annan serten sityasyon la. Alors pou nou ki ou sityasyon vi ki nou pe travay lo fer sir ki Lalwa i enn ki *comprehensive* e ki dimoun i kapab konpran, annou met sa. Sa mon *proposal*. Mersi.

MR SPEAKER

Thank you. Avan mon demann lopinyon *panel* mon a ekout pwen Onorab Cosgrow kekfwa zot a kapab adres tou ansanm.

HON WALLACE COSGROW

Yes, Mr Speaker. Mersi Mr Speaker. Mr Speaker mon konpran largiman ki Onorab Georges in vin avek me solman mon *still* pa kler lo sa zafer *representative* la.

Akoz i pa donn nou en pozisyon *as such*. Eski *envoyé spécial* i en (en pti moman en)-sa *principal representative*? Konmsi kwa ki klarifye en *principal representative*?

Eski konmsi i bezwen annan serten klarite kwa konstitisyon in dir en *principal representative it would be somebody* tanporer, *it could be somebody* avek en nivo bokou, bokou pli ba ki Anbasader.

So eski nou pe ouver en laport pou nenport ki reprezantasyon ki Prezidan i anvoy reprezant Sesel *abroad*, pou li antre anba sa Lalwa? So i pou bezwen annan serten klarite serten klarifikasyon lo sa term “*principal representative*” li menm mon santi Mr Speaker. Avan ki nou azout li ladan.

MR SPEAKER

Thank you. Yes Onorab Andre?

HON CLIFFORD ANDRE

Mr Chair zis kekfwa pou asiste. Mon napa probleman avek sa terminoloji. So si i kapab en dimoun parey Onorab Cosgrow

pe dir si i kapab annan en dimoun ki sipoze ganny apwente oubyen sa napa problem mon santi ki *that's what* dan *Bills Committee* ti dir. Napa problemm avek sa, aköz sa term i deza definir dan konstitisyon about 64(1).

So i definitivman *a constitutional definition*. So ki nou pe dir zis pou fer li pli kler dan Lalwa annou met li parey i ete dan Konstitisyon si sa i latansyon. Zis pou fer klarite. Mersi.

MR SPEAKER

Thank you. Panel zot annan en pwennvi lo la? Panel in nod. Mon krwar propozisyon in ganny aksepte tre byen. Onorab Cosgrow wi ou annan en lot pwen?

HON WALLACE COSGROW

Wi mon konpran ki zot pe dir me selman ki mon pe sey dir dan klarite pour piblik Seselwa konpran mon krwar i enportan ki nou kapab donn serten legzanp ki lentansyon par deryer azout *principal representative*, konmsi lekel ki nou anvi *extend* sa provizyon Lalwa to?

Konpran aköz pou mwan i *broad*, aköz Konstitisyon i dir me solman Konstitisyon i dir nou pa konnen kisisa en

principal representative. Konmsi ki son fonksyon, ki dir e letan ki i fer sa travay, petet serten klarite ladan aköz nou pe donn li en *entitlement* anba en Lalwa la.

MR SPEAKER

Selman, *that being said*, ou pa pou anvi konplik li tro bokou si soz- Onorab Georges ou ti'n lev lanmen ou pe al adres sa?

HON BERNARD GEORGES

Mon pe al propoz en legzanp Mr Speaker en *chargé d'affaires* par egzanp si nou anvi annan dan en Lanbasad, nou pa anvi en Lanbasader nou pa anvi en *High Commissioner* Prezidan i anvi apwent en *chargé d'affaires that's a principal representative of Seychelles*, enn par egzanp. Mersi.

MR SPEAKER

Ok sa i en legzanp. Me *panel* i satisfè ki propozisyon Onorab Andre i *meet zot criteria*. So mon krwar nou kapab prosede avek sa. Onorab Andre, okenn lot pwen?

HON CLIFFORD ANDRE

Sa i dernyen Mr Chair. Mersi.

MR SPEAKER

Mersi. Bann amannman in ganny aksepte. E nou a kapab

pas dan Staz Lasanble pour *Third Reading*. Onorab Arissol ou ki ansarz *Bill*.

HON SANDY ARISSOL

Mersi Mr Speaker. Bonswar tou dimoun ki a lekout. Mr Speaker anba *Order 76(1)* mon oule *move* ki *Bill Public Service Salary (Amendment) Bill, 2023* i ganny lir en Trwazyenm Fwa setfwasi *as amended*. Mersi.

MR SPEAKER

Mersi. Mon a ganny segonnman pou sa Mosyon? Onorab Esparon?

HON REGINA ESPARON

Mersi Mr Speaker. Bonswar tou dimoun. Mon segonn Mosyon pou ki *the Public Service Salary (Amendment) Bill, 2023 as amended* i ganny lir en Trwazyenm Fwa. Mersi.

MR SPEAKER

Mersi. Manm i a vote silvouple. Sa ki an faver lev lanmen? *Thank you*. Manm ki kont?

Lo *Formal Third Reading Public Service Salary (Amendment) Bill, 2023 as amended*; 23 Manm in vot pour, 0 kont e 9 abstansyon. *Bill* in aprouve par Lasanble e Madanm Clerk a fer *Third Reading*.

MADAM CLERK

Mersi Mr Speaker. *This Act may be cited as the Public Service Salary (Amendment) Act, 2023, and amends the Public Service Act, 2013 (hereinafter referred to as a "principal Act")*. Mersi Mr Speaker.

MR SPEAKER

Mersi. Bon avek sa nou'n met *the final full stop* lo sa *Bill* e pase par Lasanble.

I reste pou mwan remersye Manm pou zot kontribisyon e *panel* pou zot partisipasyon. Mon swet *panel* en bon depar e mon swet tou dimoun en bon wikenn.

Lasanble i ava *adjourn* e nou a zwenn Mardi prosen 9er. *Adjourn*.

(ADJOURNMENT)